

GAHUM SA PAGBAG-O



[Si Igsoong Branham ug ang kongregasyon nagalaylay og *Only Believe*—Ed.]

² Medyo malisud gayud kang kinsa man nga makapahayag sa ilang kaugalingon sa usa—sa usa ka kahigayonan nga sama niini, ang pagsulti kung unsa ka daku ang pagpasalamat ko alang niining pribilihiyo nga maania dinhi niining buntaga, ug—ug maania sa inyong taliwala, aron maihatud ang Pulong sa Dios, nga sigurado akong sinati na gyud mo. Ug—ug gusto kong pasalamat sila Igsoong Leo ug Igsoong Gene, ug kamong tanan, tungod niining dakung kahigayonan.

³ Ug samtang nagapaminaw ako kaganina sa—sa naunang himno, bisan ang ulahi, aduna gyu’y sa kung unsang butang bahin nianang pagkanta, usa ka pagsimba nga dili mo na makita sa karon. Ug kanunay kining usa ka dakung pribilihiyo alang kanako pagmakaanhi ako dinhi, usa ka beses sa usa ka tuig, o duha, aron mabati mo gyud ang pagkamaanindot nianang mga kanta.

⁴ Ug nahinumduman ko niining buntaga, sa dihang gipakanta ni Igsoong Leo ang kanta nga *They Come From The East And West*, ug nadumduman ko ang mahitungod sa akong asawa nga nagakanta niadtong milakaw ako para . . . niadtong gibilin ko siya ug—ug si Billy ug si Rebekah, aron masugdan kining dakung rebaybal, nga mapangunahan kini, diay, sa diha nga mikaylap kini sa mga kanasuran. Ug nadumduman ko, sa pagkakita ko niining mga matahum, pagkalimpyo tan-awon nga pundok sa mga kababaihan. Nadumduman ko si Meda niadtong usa pa siya kanila, batan-on pa ug itum ang iyang buhok. Ug karon sama na siya kanako, nagkatigulang ug ubanon na, ug paubos na ang among panahon sa kalibutan. Ug tungod niining dakung Paglaum, nga magkatigum kita pag-usab diha Kaniya, kon diin wala na’y katapusan, wala na’y pagkatigulang, wala na’y bisan unsa nga makababag ug makapahasol pa kanato.

⁵ Wala ko gatoo nga aduna pa’y ubang lugar nga nakita ko sa tibuok kong kinabuhi, ilabina sa niining kadaghan sa mga tawo, kon diin aduna og daghan kaayong mga Cristohanon nga may ingon niining paghigugma. Ayaw gayud ninyo tugoti nga mawala kana sa inyong taliwala. Timan-i gyud.

⁶ Aduna ako kaniadto og medyo og usa ka . . . mga panultihon sa mga tawo. Hope ang ngalan sa akong asawa; ang una kong asawa, nga inahan ni Billy. Naandan nila kaniadto nga . . . Tulo lang kami kaniadto, si Hope, ug ako, ug si Billy. Ginatawag nila kami kaniadto og, “Paglaum, pagtoo, ug gugma.” Ug medyo og kusog ang pagtoo kaniadto, mora’g ingon niana, niadtong

panahona, nga toohan nga kini nga Pulong matuod gayud; ug, nga kung unsa man ang gisaad sa Dios, buhaton Niya gayud.

⁷ Ug, apan, nakita n'yo, "Ang labing daku niini mao ang gugma, ang gugma." Sama sa gisulti ni Igsoong Leo karong buntaga. "Gugma gayud! Kung aduna ma'y pagsulti og mga dila, kini mangatapus ra. Kung aduna ma'y paghimo'g mga propesiya, kini igahiklin ra. Apan sa diha nga ang gugma, pag gugma na, kini magalungtad gayud." Kita n'yo?

Minahal nga himalatyong Cordero, ang Imong
hamiling Pulong
Dili gayud Kini mawad-an og Gahum,
Hangtud ang tanang tinubos nga Iglesia sa
Dios
Maluwas aron dili na magpakasala pag-usab.
Sukadsukad nga pinaagi sa pagtoo nakita ko
kadtong agas
Nga sa Imong nagabuhagay nga samad
nagagikan,
Gugmang nagatubos mao na'y akong tema,
Ug mamaingon niana hangtud nga ako
mamatay.

⁸ Sa tan-aw ko wala na'y mas labaw pa kay sa gugma. Ug ang gugma, kung dili nato kini maipabati . . . Karon, mahimo natong ingnon nga aduna kita'y gugma, sulti lang nato kana. Pero kung maipabati gayud nato kung unsa ma'y ginasulti nato nga aduna kanato, nan maipakita nato kini mismo.

⁹ Karon dili man kita'y mga tawong hingpit. Nagakasayup kita. Nagabuhat kita og mga butang nga sayup. Apan, nakita n'yo, ginataktan kana tanan sa gugma. Andam man kita, pagmakita nato ang atong sayup, nga mobalik ug mangayo'g pasaylo sa usa'g usa. Oo, ingon niana—ingon niana ang mga sundalo. Kana'y, kana ang mga maisug nga mga lalaki ug babaye. Ang si kinsa man nga lalaki puede man makig-away didto sa natad sa panggubatan, kadtong may igong kaisog nga moadto didto; apan ang importante maoy pagmatumba siya, nan nagabangon siya ug mosulay na usab, kita n'yo. Aduna'y usa ka kalantahan nga ginakanta kaniadto sa simbahan sa usa ka batan-ong lalaki ug babaye, "Kung matumba man ako o kung mapakyas man ako," kita n'yo, "kung matumba man ako o kung ako'y . . ." Nalimtan ko na kung unsaon kadto ipadayon. "Bangona ako ug paninguhaon ko pag-usab."

Pasayloa ako, Ginoo, ug sulayi ako sa usa pa
ka higayon. (Kita n'yo? Kita n'yo)
Kung matumba man ako o makasala man ako,
bangona ako ug paninguhaon ko pag-usab.
Pasayloa lang ako, Ginoo, ug sulayi ako sa usa
pa ka higayon.

¹⁰ Ug tungod sa kadaghan ingon nga mga usa ka gatus ug baynte ka mga tawong ania dinhi, sigurado gyud ka nga—nga makakita ka og mga butang usahay, nga dalhon sa kaaway sa taliwala ninyo, ug sa inyong mga hunahuna, ug—ug sugdan ang *ingon niini*, *ingon niana*. Babagi dayon pagbuhaton niya kana. Hunahunaa balik, hunahunaa ang karong buntag, hunahunaa ang maong mga kahigayonan nga ania kamong magkauban nga nagalingkod diha sa Langitnong mga dapit kang Cristo Jesus.

¹¹ Mahimong ang uban kaninyo mga tubero ug ang uban kaninyo mga panday ug ang uban *ingon niini*, *ingon niana* ug ang *uban pa*. Adlaw-adlaw kamong nagapakiglimbasog uban sa kalibutan, pag-atua kamo sa gawas. Apan pagmakita ninyo kanang mga butanga, ug grabeng mga tentasyon nga nagaabot, hinumduma lang kining gamay'ng, balaanong dapit kon diin kamong magkauban nga nagalingkod, nga mao lang ang bugtong butang nga magadugay. Ang inyong mga trabaho mangawala kana, usa sa niining mga adlaw. Ang inyong maayong panglawas mawala kana. Bisan ang inyong kinabuhi, dinhi sa yuta, mawala kana. Apan Kana dili gayud mahanaw. Ug kung Siya mao ang sentro sa tanang butang, nan padayon natong itutok ang atong mga hunahuna sa maong sentro nga Haligi, kung unsa ang nagpaduol kanato ngadto niini.

¹² Grabe, maanindot kini, pagkalimpyo tan-awon nga pundok sa mga tawo! Dili ko buot ipasabot tungod sa inyong mga sinina. Limpyo ang inyong mga sinina, siyempre, ug ingon nianang mga butang, kundi ang inyong mga nawong. Mahunahunaan ko kining mga gining dinhi, wala ni usa ka lama sa lipstick diha sa usa man lang kanila; tanan sila tag-as ang ilang mga buhok, mga bata man ug tigulang, bisan ang mga hamtong ug tanan na. Oo. Kita n'yo? Bueno, wala lang ninyo naamgo kung unsa ka dakung bahandi ang aduna kamo dinhi, kita n'yo, sa niining gamay'ng pang-kapelya lang nga panerbisyo.

¹³ Gusto kong pasalamatan sila Igsoong lalaki ug babayeng Shantz, usab, tungod sa niining pribilihiyo nga makabisita sa ilang panimalay. Ug taga-dinhi na sila karon, tungod nga gibaligya na nila ang ilang mga kabtangan, mora og, didto kini sa Canada, ug mianhi aron magpuyo uban kanato. Wala na kita'y pangyutan-on nga mga panag-iya. Nagapaabot kita alang sa usa ka Lungsod, Kinsang Magtutukod ug Magbubuhat mao ang Dios.

¹⁴ Ug akong ginapasalamatan sila Igsoong Leo ug Gene, tungod sa ilang dugay nang pagkamatitud-anon, ngadto sa panan-awon nga gikahatag kanila niadtong una kaming nagkahimamat. Walay pagduhaduha nga iya na kamong nasultihan sa makadaghang higayon. Pagkatalagsaon, nga wala ko nakita kadto sama niini sa karon. Kabalo ko nga aduna gyu'y butang nga mahitabo. Sa dihang miduol kanako ang maong batan-on pa nga lalaki kaniadto ingon nga . . . nga dala kadtong

damgo niya mahitungod sa usa ka pyramid, nga nagatindog kono ko sa niining pyramid. Ug mikatkat siya paingon sa kung asa ako, ug nagatindog kono ako didto sa usa ka mora og platito, sa usa ka plato, o butang nga sama sa usa ka kahayag.

Miingon siya, “Igsoong Branham, giunsa mo man pagkasaka dinha?”

¹⁵ Ug ingon kono ko, “Igsoong Leo, Dios kinahanglan ang magbutang sa usa ka tawo sa niining puwesto sa itaas dinhi.” Ingon ko, “Karon nga nakita mo na, balikan mo ang mga tawo ug sultihan mo sila nga nagatoo ka nga iya gayud kini sa Dios.”

¹⁶ Ug wala ko nahibalo niadtong napahimutang na ako sa usa ka posisyon. Akong—gimahal ko kining mga lalakiha, ug gusto kong ibutang sila sa usa ka posisyon kon diin makauban ko sila. Ug misugod sila sa pag-rekord og mga teyp. Apan, nakita n’yo, kung ako lang, nagsige pa unta sila sa pag-rekord og mga teyp, kutob sa nahibaloan ko. Apan mas daku nga butang ang gihimo sa Dios alang kanila, kay sa ang pag-rekord lang og mga teyp, kita n’yo. Halos tanang tawo makapag-rekord man og teyp, nga adunay kahibalo sa pagpaandar og teyp rekorder, o makahimo sa pagbaligya. Apan gikinahanglan ang paggiya sa Balaang Espiritu aron giyahan ang usa ka gamay’ng tibuok pundok nga sama niini, karong buntaga, ug padayon silang bugkuson diha sa pagkahiuyon ug pagkahiniusa, ug nga nagapanghawid sa gihapon sa Mensahe.

¹⁷ Dios, hinaut nga Imong—Imo untang ihatag, ngadto niining mga tawo, ang taas-taas pa nga kinabuhi dinhi niining kalibutana, og ang kasadya og kalipay, ug unya dayon ang “sumulod ka sa kalipayan sa Ginoo” pagkahuman sa ilang panaw niining kalibutan.

¹⁸ Karon andam na kita alang sa pagpakiggubat, patingogon na ang Trumpeta. Naiawit na ang mga himno, ania na karon ang Pulong. Siguro, sa dihang nagatindog ako, kana nahibaloan n’yo na . . . Oo, tingaling buhaton n’yo usab.

¹⁹ Ang madungog lang kining mga nasulti sa niining batan-ong mga sundalo sa Dios dinhi! Ug ako nga tigulang na, ug madungog, ang inyong mga pagtoo ug mga pagsalig, ug sa kung unsay inyong gipangtampo tungod sa inyong pagtoo niining Mensahe nga—nga gikahatag sa Dios kanako. Karon, kung dili pa tungod kaninyong tanan, ang Mensahe wala unta’y kapuslanan. Kita n’yo, kini—aduna gyu’y kinahanglan nga motoo Niini. Ug sa diha nga Kini nagagikan sa Dios, aduna gyu’y magatoo Niini, nakita n’yo. Naghatag ang Dios og pamaagi. Iya, Iya nang giplastar ang Iyang dakung plano nga sama niana, nga, pag aduna Siya’y Butang nga ipadala, aduna gyu’y magatagbo nianang Butanga. Ang Kahiladman nga nagatubag sa tawag sa kahiladman. Kini—kinahanglan nga ingon niana gyud kini.

20 Gusto ko kadtong pulong nga gigamit ni Igsoong Gene sa pag-ampo niining buntaga, “Diha sa Iyang hamiling mga sawang.” Ingon niana ang bation ko pagginatabok ko ang tulay didto, sa—sa pag-anhi ko kon diin ang Dios ginapasidunggan ug ginatahud. Ug kanunay n’yo kining ipadayon nga ingon niana. Bisan pa kon ang kaaway. . .

21 Karon hinumdumi, ayaw kini kalimti; Kang Igsoong Leo ug Gene, ilabina. Karon, nagadahum ba mo nga pasagdan na lang ni Satanas nga magapadayon kini nga ingon niini, nga walay pagbabag? Oh, dili. Siguradong dili niya kini mapahanugotan. Sa kalit lang magaanhi siya, usa sa niining mga adlaw, sama sa usa ka alimpulos. Apan sa diha nga—sa diha nga nagaabot ang kaaway nga sama sa usa ka nagabaha nga suba, pagahuypon kini sa gininhawa sa Espiritu sa Dios. Padayon lang nga ibayaw ang inyong kaugalingon diha sa pag-ampo sa atubangan sa Dios. Maghinawiray sa usa’g usa. Panggunit gayud ngadto sa Dios. Kay, kung ginahigugma ninyo ang usa’g usa, nagapakita kini nga nagahigugma kamo sa Dios. “Tungod niini ang tanan makaila, nga kamo Akong mga tinun-an, kon kamo maghigugmaay ang usa sa usa.”

22 Ug napamalandongan ko, kaganina, “Pagkamaanindot nga mga pagkanta! Pagkamaanindot nga mga tingog! Pagkamaanindot nga pundok sa mga kalalaken-an ug kababayan-an, mga bana ug mga asawa; mga batan-on, tigulang, ug mga hamtong, nga magkauban nga nagalingkod dinhi.” Sa hunahuna ko, “Bueno, ila unta kadtong gipahigayon dinhi sa Prescott, silang mga taga-dinhi mangadto usab didto ug magkaaduna usab og gamay nga pagpasibya diha sa radyo nga sama niana.” Kung ingon niana, kita n’yo, dili na kana mamahimong eksakto sa kung unsa ang pagkatawag sa Dios niining batan-ong mga lalaki nga ilang pagabuhaton. Kita n’yo? Kita n’yo? Ginatawag na pagawas ang Pangasaw-onon, kita n’yo, ginatawag na pagawas, karon ang buluhaton ko dinhi, mao ang pagtawag. Ug dayon kining mga butang nga sama niini, kon diin ginatipon ninyo ang inyong mga kaugalingon ingon nga usa ka komunidad, ug ginapahiluna ang inyong kaugalingon, kon diin dinha ninyo gustong ipadaku ang inyong mga anak, nga nagabantay ang matag usa sa matag adlaw, ingon sa mata sa usa ka agila nga nagabantay sa mga piso niini, aron nga dili kamong. . . Kung aduna kamo’y makita og unsa man nga sayup, nan inyong tawgon padaplin kana nga tawo ug iampo kini, ug mga butang nga sama niana. Ipapadayon kini nga putli, balaan, aron adunay dapit maduawan ang Balaang Espiritu.

23 Gusto sa Dios nga simbahan Siya. Ug sa diha nga ginasimba ninyo Siya, dili lang kini og eksaktong pagkanta og kalantahon sama sa atong ginabuhat, kondili ang pagkanta kini diha sa espiritu sa pagsimba, nakita n’yo, dayon dinha ninyo makita nga nagabalik ang Balaang Espiritu.

24 Ug makita ko kining dakuon nga batan-ong lalaki dinhi, hunahunaa lang ninyo ang adlaw nga kining pundok sa mga batan-ong mga lalaki nga nagalingkod dinha, mga batan-on pa ug uban ang batan-on nilang mga asawa nga nagalingkod usab dinha, ug mga dagku, bagison nga mga lalaking nagalingkod dinha ug manghilak na lang nga mora og mga bata.

25 Aba, tan-awa ninyo sa karon, atua sila sa kadalanan, diha sa ilang pagkinabuhi nagapanapaw ug anaa ang kahugawan sa kalibutan, ug ingon nianang mga butang.

26 Ug ang hunahunaon nga gilahi n'yo ang inyong kaugalingon ug nagtipon-tipon nga sama niini, nga sama sa giingon sa Salmista, “Ania karon pagkatam-is ug pagkamalipayon gayud sa mga magsoon nga managpuyo sa paghiusa. Sama kini sa lana nga igdidihog diha sa mga bungot ni Aaron, nga midaligidig diha sa mga sidsid sa iyang bisti.” Nga, kanang lana nga igdidihog. . . Nga, kabalo na mo kung unsa ang ginabuhat sa maong lana nga igdidihog, ginaandam siya niini sa pag-adto sa Presensya sa Dios. Kita n'yo, kinahanglan siyang mahaplasan nianang lana sa dili pa siya moadto sa Presensya sa Dios. Ug sa diha nga ang mga magsoon managpuyo nga magkauban diha sa paghiusa, mahisama kini nianang lana. Nagasulod kita kung ingon niana ngadto sa Presensya sa Ginoo, nga uban ang maong pagdihog tungod sa mga magsoon nga nagkauban diha sa paghiusa. Ang *Lana* nagarepresentar sa “Balaang Espiritu.”

27 Karon mahimong mag-ampo usá kita sa dili pa kita moadto sa pagtuon sa Pulong.

28 Langitnong Amahan, sama sa giingon sa among igsoon niining buntaga, ang pagsulod kini ngadto sa mga himiling sawang sa Ginoo! Karon, Amahan, naamgo namo sa niining pundok sa mga tawo dinhi, ug kung unsa karon ang akong igasulti, panubagon ko kini sa Adlaw sa Paghukom. Ug Imo kining mga kaanakan. Panalangini sila, Amahan, sa kanunay. Panalangini si Igsoong Leo ug si Igsoong Gene. Hinaut nga pagagiyahan sila sa Imong Balaang Espiritu, aron magiyahan usab kini nga mga tawo, samtang nga nagapanaw kami ngadto sa pagsalup sa adlaw. Ug dayon, Oh Espiritu Santo sa Dios, giyahi kami paingon ngadto sa Anak. Itugot kini, Ginoo.

29 Ipikas-pikas nganhi kanamo ang Tinapay sa Kinabuhi, pinaagi sa Pulong. Ug among. . . Among nasayran nga ania kami karon sa pagpakiggubat. Among ginapasul-ob ang mga bahin sa hinagiban, sa niining mga sundalo dinhi, aron magamit nila sa pagpakiggubat, diha niining nahibilin nga mga takna sa kinabuhi. Ug ginaampo ko, Ginoo, nga Imo kining ipahiluna sa tino ang matag bahin niini kung asa kini nahiangay, kon diin nga mapanalipdan sila batok sa—sa kaaway diha sa matag higayon nga atakihon niya sila. Itugot kini, Ginoo. Amo kining ginaampo sa Ngalan ni Jesus Cristo. Amen.

³⁰ Karon, medyo mahinay gyud ako sa—sa pagsulti, tungod ako—dili ako hanas nga ministro. Kabalo ko nga adunay mga tawo dinhi nga maantigo, maalam, mga intelektuwal, ug gipadaplin nila kana, sa ilang pag-anhi dinhi ug gipang-pugngan ang ilang mga kaugalingon, diha sa pagpaubos. Si halangdong Pablo, ang apostoles, nadumduman ko ang iyang pulong sa dihang miingon siya, “Wala ako moanha diha kaninyo pinaagi og kaigmat sa mga pulong sa tawo, tungod kay kung ingon niana man inyong igasalig dinha ang inyong pagtoo, apan nagaanha ako kaninyo diha sa gahum sa Espiritu.” Kita n’yo, ang dagkung mga butang nga nasayod siyang aduna siya, gipadaplin niya kadto. Ug mabati ko niining buntaga, sama sa mga tawong ania dinhi, sama kang Igsoong Hughy ug si igsoong babayeng, magtutudlo nga ania dinhi nga gikan pa sa pagmisyon, ug daghan pa kaninyong ania dinhi nga mga edukado ug maalam; ug akong—mabati ko gayud ang pagkaubos nga motindog dinhi nga wala gayu’y edukasyon, dinhi sa inyong atubangan. Pero akong. . . Ug dayon ang makita kamong mga tawo, nga ingon niana, nga—nga nagapaubos sa inyong mga kaugalingon sa niining mga butanga, mopadaplin, ug maglingkod lang ug maminaw sa usa ka tawo nga halos wala gani nahibalo sa iyang ABC, mao kana ang nagapahalangdon kaninyo. Dili kining tawong mopalabaw gyud sa iyang mga abaga, ug molakaw dinha ug. . . Kini mao kadtong tawong nagapaubos sa iyang kaugalingon.

³¹ Sa tan-aw ko, ang maayong pamatasan, masukod kini pinaagi’g. . . ang lalaki, masukod siya dili pinaagi sa mga muskulo nga anaa sa iyang bukton o tungod sa mga kubal sa iyang mga kamot, kondili tungod sa nagburot na ang tuhod nga bahin sa iyang karsones kon diin siya nagaampo. Mao kana sa hunahuna ko ang nagapalalaki sa usa ka lalaki.

³² Karon gusto kong magbasa, niining buntaga, og pipila diha sa Biblia. Ug gusto ko ang Pulong. Dili ba nga kamo man usab? [Nagaingon ang kongregasyon, “Amen.”—Ed.] Karon ginasimba nato ang Ginoo, ug padayon natong simbahon Siya. Karon pagasimbahon nato Siya ingon nga usa—usa ka nagapanghiwa nga Espadang mahait, sa diha nga manglihok kini sa taliwala nato, aron mahibal-an nato kung asa gyud kita.

³³ Ug ako—magapabilin ako, tungod usa kini ka lugar kon diin mabati kong mahimo ko—mahimo kong itudlo ang mga butang nga gusto kong isulti niining buntaga. Ug dayon, siyempre, si Igsoong Leo ug Gene, ug sila, ilang—ilang pagabuhaton ang mga niini, pagmobiya na kami, ug ilang igapahayag utro ang maong mga punto sama sa pagsulti niya sa iyang pagmensahe niining buntaga. Nga, iya kanang nasabtan. Pero dili mo basta na lang mawali kini gikan sa intablado nga susama niini o ang mga niini sa teyp, apan, kita n’yo, lingkuran gayud ug tun-an ang mga niini. Padayona lang ang pagtuon niini, sa sige-sige. Malisud

sabton. Daghang mga tawo ang dili makasabot Niini! Ug kabalo ba kamo, gamay'ng—gamay'ng pundok, nga ingon—ingon niana na kini sa tanan nga mga tawo? Ingon niana na kini sa una pa.

³⁴ Kung wala gani nila nasabtan kaniadto ang atong Ginoo ug Manluluwas, si Jesus Cristo, (bisan ang Iyang mga tinunan, kita n'yo) nan mapaabot ba diay nato nga masabtan Kini sa niining panahon, nakita n'yo. Ingon Niya, nga direktso lang Siya'g mosulti og mga butang, kabalo na mo, ug dili man lang Siya mohatag og katin-awan. Basta Niya na lang kadto ginasulti. Miingon kaniadto, sama pananglitan, “Gawas kon mokaon kamo sa unod sa Anak sa tawo ug moinom sa Iyang Dugo, wala kamo'y Kinabuhi diha kaninyo.”

³⁵ Karon unsa kaha, karon unsa kaha kung aduna'y—unsu kaha kung adunay doktor nga nagatindog duol didto, o usa ka nars o unsa man, diha sa kongregasyon, niadtong adlaw, nga Iyang ginasultihan? Bueno, moingon siguro sila, “Bampira gyud kining Tawhana, kita n'yo, gusto Niya kitang moinom sa Iyang Dugo.” Kita n'yo, wala Niya kadto gihatagan og katin-awan. Basta Niya lang gisulti. Pero pagkahuman niadto, miabot si Pablo ug gihatagan niya kadto og katin-awan, kung unsa nga pag-ambit kini og komunyon, kabalo na mo, “ang pagkaon sa Iyang Unod ug pag-inom sa Iyang Dugo.” Ug basta Niya lang gisulti kadtong mga butanga.

³⁶ Ug niadtong, ulahi, ang mga apostoles usa ka adlaw niadto, bisan pagkahuman na sa pagkabanhaw, aduna og usa nga mipauraray diha sa Iyang abaga, si Juan nga gihigugma Niya. Usa pa ka batan-ong lalaki si Juan kaniadto. Ug miingon si Jesus, “Unsa ma'y labut ninyo kung kining tawhana magapabilin hangtud sa Akong pag-abot?” Nabantug kanila kadtong sultiha, nga si Juan dili—dili mamatay hangtud sa pagbalik na ni Jesus. Dili kana ang gisulti ni Jesus. Iya lang, ang gisulti lang Niya, “Unsay labut kaninyo kung siya magapabilin?” Ug dayon, siyempre, inyong mabasa sa—sa atong Pulong, kung unsa nga—nga ang Dios kaniadto. . . Gisulti kadto nga may katuyoan. Kining tanang mga butang may katuyoan. Gidala sa Dios kadtong batan-on nga si Juan ug gipakayab siya diha sa Espiritu, ug nakita niya ang Iyang Pag-abot, paingon ngadto sa—sa kapanahonan nga moabot pa lang. Kita n'yo, miingon, “Unsay labut ninyo kung siya magapabilin?” Wala Niya siya gipabilin, sa pisikal; kondili—kondili ang Pulong nga Iyang gisulti pinaagi kaniya, ang naghatud kanato ngadto niining kapanahonan kon diin ania kita karon, nakita n'yo. Busa, kining tanan masigtabang nga nagapamuhat alang lang sa ikaayo.

³⁷ Diha sa Mga Taga-Roma, usa ka naandan na nato nga kapitulo, gusto kong mohuha og—og pipila ka bersekulo dinhi, ug mahitungod sa nahaunang duha o tulo ka bersekulo, duha ka mga bersekulo, siguro, ug basahon nato. Ug, dinhi, paningkamotan kong isaysay Kini kutob sa nahibaloan ko kung

unsaon, pinaagi sa tabang sa Balaang Espiritu. Mga Taga-Roma, sa ika-12 nga kapitulo.

Busa hangyoon ko kamo, mga igsoon, tungod sa mga kalooy sa Dios, sa pagtugyan sa inyong mga lawas ingon nga halad nga buhi, balaan, og hinangponon sa Dios, ang halad nga mao ang inyong espirituhanong pagsimba.

³⁸ Ug nahunahunaan ko nga pagkamaanindot niana alang niining pundok karong buntaga, tungod sa inyong bag-ohay lang gibuhat. Karon, “Ug,” ang *ug* usa ka iglalanggikit, sa nasabtan ko.

Ayaw kamo pagpahiuyon niining panahona sa kalibutan: kondili usba hinoon ninyo ang inyong kaugalingon pinaagi sa pagbag-o sa inyong salabutan, aron inyong masuta kon unsa ang maayo, ug hinangponon, ug hingpit, nga kabubut-on sa Dios.

³⁹ Ingon niana ang gusto natong tanan pagabuhaton, ang, “Ayaw pagpahiuyon niining kalibutana, kondili *usbon* hinoon ang atong kaugalingon pinaagi sa pagbag-o sa atong salabutan, aron mabuhat nato ang hingpit ug hinangponon nga kabubut-on sa Dios.” Karon ingon nga mga luwas na kita, sama sa kung unsa kita karon; ug ingon nga gipuno na kita sa Balaang Espiritu, sama nga aduna na kita; karon ang gusto nato mao ang panghunahuna nga maoy anaa kang Cristo, nga maania kanato, aron nga mangausab kita gikan sa mga natural nga butang sa kinabuhi, ug dalhon ngadto sa pagbuhat sa hingpit nga kabubut-on sa Dios, pinaagi og pagkabag-o, nga iya sa Espiritu sa Dios, pinaagi sa Iyang Pulong.

Karon ang akong hilisgutan maoy: *Ang Gahum Sa Pagbag-o.*

⁴⁰ Ibilin ko usá ang Biblia ko *dinhi*. Karon, sa una, daghan nang mga tuig ang milabay, niadtong medyo bata pa ako sama niini nga lalaki, ako—dili ko kinahanglan kaniadto nga isulat ang akong mga Kasulatan ug—ug ingon nianang mga butang pagmagtuon ako. Apan karon nga nagkatigulang na ako, aba, aduna na ko’y dala-dala nga gamay’ng mga sinulat. Ug—ug pag-aduna ko’y makuha, aba, ginasulat ko kini, kinahanglan nga masulat ko *dinhi* ang Kasulatan. Ug sa una, masaulo ko kanang sunod-sunod nga mga Kasulatan sa akong hunahuna, madumduman ko kini mismo.

⁴¹ Mao nga, mahal kong mga higala, dili na ako batan-on pa nga kapareho ninyong tanan, niining buntaga. Tigulang na ako, ug ang tanang malisud nga mga pagpakiggubat naagihan ko na, kita n’yo; ug, sa pag-agi mo nianang grabe nga mga pagpakig-away, ginahatud ka niini kon diin ka karon niining buntaga. Kita n’yo? Busa, sigurado akong nasabtan ninyo kana. Gipasinati ako sa Dios niini, aron nga ang akong kinabuhi makapagbukas og dalan, nga makaingon “*mao* Kini, tan-awa,”

dayon kamong makaagi na nianang dalan. Apan may nauna kanako, aduna usab og tawong nagbukas og dalan aron nga maagihan nako. Kita n'yo? Ug nagabukas kita og dalan, para sa usa'g usa. Ug ingon nga makita ninyo, usahay, sa usa ka beteranong nagkatigulang na, adunay mga marka sa tibuok niyang lawas, ug sama sa giingon ni Pablo usa ka higayon kaniadto, “Dala ko sa akong lawas ang mga marka sa timaan ni Jesus Cristo.” Nakita n'yo? Nakita ni Timoteo ang kadtong mga marka, siguro, nga may pagtahud, sa diha nga iyang gisugo ang batan-on nga si Timoteo.

⁴² Karon, ang “pag-transform.” Nagtrabaho ako sa una sa Public Service Company, kon diin aduna kami og mga transformer, ug nagapang-transform. Karon kini nga pulong, ang mao nga pulong nagakahulogan, mismo, mora og sama sa . . . Ang *pag-transform*, nagakahulogan og “may butang nga gibag-o, may sa kung unsa nga giusab gikan sa usa ka butang ngadto sa uban.”

⁴³ Ug gusto kong maghigot, sulod sa sunod nga kuwarentay-singko minutos o usa ka oras, bahin—bahin sa pag-transform, gusto ko nga—nga gamiton kini nga teksto. Ug ako—mahimo nga makasulti ako og pipila ka mga butang, dinhi, nga medyo og talagsaon kaayo. Ug sama sa bag-o lang giingon ni Igsoong Leo, “Dawata Kini ug tun-i lang Kini, sa makadiyut.” Kita n'yo, pamalandungin Kini sa makadiyut.

⁴⁴ Ang *mai-transform* mao nga “mabag-o ug mamahimong lahi na.”

⁴⁵ Sama sa usa—usa ka pitopito, nagaka-transform kini gikan sa pagka-pitopito ngadto sa pagka-baki. Kita n'yo, sa una, mora kini og pantat, molangoy-langoy kini, kini—aduna kini og ulo ug ikog, ug ang tanan na niini mora gyud og—og pantat. Dayon, dili modugay, mosugod kini'g mawad-an og, mawad-an og ikog kini, ug kini—kini nagaka-transform ingon nga usa ka matang paingon sa lahi na nga matang.

⁴⁶ Sa tan-aw ko ingon niana kung unsa ang atua sa hunahuna ni Pablo, sa pag-ingon niya, “Usba ang inyong kaugalingon pinaagi sa—sa pagbag-o.” Tan-awon nato, tugoti kong ihusto kana. “Ug dili pagpahiuyon,” kabalo na mo kung unsa ang *pagpahiuyon*.

...ayaw kamo pagpahiuyon niining panahona sa kalibutan: kondili usba hinoon ninyo ang inyong kaugalingon pinaagi sa pagbag-o sa inyong salabutan, . . .

⁴⁷ “Pagbag-o sa inyong salabutan.” Ang mga butang nga imong ginahunahuna kaniadto, ingon nga mahinungdanon, ipadaplin kana ug magpausab ngadto sa pagkalahi; gikan sa kung unsa ka kaniadto, ngadto sa kung unsa ka karon. Kita n'yo?

...pinaagi sa pagbag-o sa inyong salabutan, aron inyong mahimong pamatud-an...kanang maayo, ug hinangponon, ug hingpit, nga kabubut-on sa Dios.

⁴⁸ Oh, mao kana ang gusto natong tanan nga mahibaloan, kung unsaon pagbuhat niini. Kita n'yo? Ania kita karon, gihigugma nato Siya; giluwat Niya kita, karon gusto natong mahibal-an kung unsaon pagbuhat niini. Ug ginapaninguhaan natong himoon ang usa ka gamay'ng paglakang niining buntaga, aron medyo makasaka kita og diyutay. Usahay kinahanglan natong maghisgot og mga butang nga...Dayon maghulat-hulat lang sa alang sa pipila...hangtud nga makita nato kung unsay mga resulta.

⁴⁹ Karon diha sa Genesis, sa unang kapitulo, "Ang Espiritu sa Dios naglihok ibabaw sa nawong sa mga tubig." Masayran nato nga ang tubig...Ug—ug ang Biblia nag-ingon, "Sa sinugdang kaniadto," nga, kini, "ang kalibutan awaaw, ug walay sulod." Wala gyu'y bisan unsa gawas sa kangitngit ug kawalay-porma. Ug—ug siguradong pagkagubot kaayo ang porma niini kaniadto. Wala gyu'y bisan unsa gawas sa hangtud-hangtud nga kangitngit, wala gyu'y kahayag o bisan unsa man lang, ug ang pagkusokusa sa mga tubig, ug kadtong naglatagaw nga mga bitoon ug nagbinalintong lang sa orbit nila. Siguradong usa kadto ka—ka grabe ka daku nga pundok sa—sa—sa kung unsang butang nga nahisalaag, ingon niini kini kaniadto, dili makaplagn ang dalan niini.

⁵⁰ Ug mamahimong ingon niana kita pagmahimo kitang naglatagaw nga mga bitoon, halayo sa Dios, walay paglaum, walay Dios; wala gayud, nagsige lang og libotlibot, diha sa kangitngit, wala nahibalo kung kita'y...kung asa kita paingon.

⁵¹ Ug gikuha sa Dios kadtong daku nga kawalay-porma sa kangitngit, ug gibag-o kini nga mamahimong usa ka tanaman sa Eden, kita n'yo, pinaagi sa Iyang Pulong. Sa ingon niana kita gibag-o, pinaagi sa Pulong sa Dios. Sa dihang giingon sa Dios, "Mahimo ang kahayag," ug kadtong dakung tipun-og sa binuhat mipaingon sa adlaw, ug misugod og tuyok palibot sa adlaw, ug nahimong usa ka tanaman sa Eden tungod kay misunod kini sa Pulong sa Dios. Gibuhat niini ang hingpit nga kabubut-on sa Dios, tungod nga gibag-o kadto gikan sa kawalay-porma, aron mamahimong tanaman sa Eden, pinaagi sa Pulong sa Dios.

⁵² Karon mao kana kung unsa nga ania kita karon. Mao kana ang akong Mensahe, sa una pa, ang Pulong sa Dios. Kinahanglan manghawid gyud kita Dinha bisan unsa pa nga butang ang mahitabo. Magpabilin gyud kanunay sa nianang Pulong. Sutaha pirmi ang inyong mga tumong ug katuyoan, kung sumala ba kini sa Pulong sa Dios. Kung dili gani, biyai kana. Kita n'yo? Apan kung sumala kini sa Pulong sa Dios, ug nakalinya kini sa Pulong sa Dios, nan, niana, hawiran mo kana.

53 Karon ang Dios usahay. . . Sama lang sa inyong gamay'ng pundok dinhi niining buntaga. Wala Niya kini ginapahitabo diha sa usa ra ka gabii, Iya kining, ang Dios. . . Kita ra man ang nagadali. Ang Dios wala gyud sukad nagadali. Iya lang kini ginasulti, ug—ug kini nagakahitabo. Tungod, pagmagsulti Siya og bisan unsa man, kinahanglan mahitabo gyud. Siguradong mahitabo gyud! Iyang, ginatugotan Niya kining mahitabo sa tukmang panahon niini. Ginatugotan Niyang. . .

54 Ang Hebreohanong mga anak kaniadto, sila nga iladong mga tawo diha sa Kasulatan, nga nanagbarug sa Pulong sa Dios ingon nga mao ang matuod, miingon sila, “Ang among Dios makahimo man sa pagluwas kanamo gikan niining hudno nga nagadilaab sa kalayo. Kon dili man ugaling, kita n’yo, dili gyud kami moyukbo sa maong larawan, tungod kay batok kini sa Pulong, kita n’yo. Bisan pa, kung patyon pa Niya kami, pagabanhawon Niya kami sa gihapon, nakita n’yo.” Kita n’yo, ug sila’y. . . Gipasagdan Niya lang sila sa paglakaw paingon ngadto sa kaungawan na niining dakung hudno, ug makasulod didto, nga daw sa wala man lang Siya nagtagad, nga mora og wala man lang Niya sila ginabantayan. Apan kanunay ug dugay na Siyang nagabantay, bisan pa. Kanunay na Siyang nagabantay para niini.

55 Karon miingon ang Dios, “Mahimo ang kahayag.” Ug miabot kadto og unom ka libo ka tuig og mitungha ang Eden, ug gitudlo kanato diha sa Kasulatan, “Kay ang usa ka adlaw sa yuta. . . o—o—o usa ka libo ka tuig, sa Dios; ang usa ka libo ka tuig sa yuta, usa ra ka adlaw sa Dios.” Busa miabot og unom ka libo ka tuig ang pagbuhat niining kalibutan, ug himoon kini nga usa ka Eden. Apan, nakita n’yo, ang Dios kadto, ang gamhanan nga Ginoo sa tanang kaalam, ug Iyang—atua na sa Iyang hunahuna kung unsa ang gusto Niyang buhaton.

56 Sama lang sa tawong mibuhat niining trailer, sa dihang iyang. . . Sa diha nga kamong mga kaigsoonan dinhi nga nagdisenyo niining parke, giunsa man ninyo pagdisenyo niini, gidisenyo kini ninyo diha sa inyong hunahuna, dayon inyong gitrabaho kadtong nakita ninyo sa inyong hunahuna.

57 Ingon niana usab ang pagbuhat sa Dios sa kalibutan. Gitrabaho Niya; atua kini una sa Iyang hunahuna. Ug, kung mahimatikdan ninyo, nanungha kini tungod sa anam-anam nga pagkabuhat niini, nga mora og sige-sige Siyang may nakat-onan, padaku og padaku ang Iyang mga gibuhat. Apan, nakita n’yo, anaa Siya ibabaw niining tanan, ug gipasagdan nga mangausbaw kini paingon niana, nakita n’yo. Ang tanan-tanan nga gisugdan Niyang ibutang ibabaw sa yuta, gikan sa mga katanuman, ug mga isda, ug uban pa; miabot ngadto sa mga kalanggaman, ug mga kahayopan; ug dayon usa ka butang nga sama na sa Kaugalingon Niyang dagway, ang tawo; ug mihunong na, kita n’yo, tungod kay miabot na kini ngadto sa Iyang kahingpitan, sa kung unsa gyud ang gusto Niya.

58 Sa ingon nianang paagi mo kini ginasugdan, sama niining trailer. Mahimong pagbutang mo diha sa salog sa lawas niini, ug makaingon ka, “Unsa ma’y ginabuhat mo?” Sama kaninyo, sa dihang gipangbalhin ninyo kaniadto ang unang mga bato gikan niining kanto dinhi. “Unsa ma’y ginabuhat mo?” Kita n’yo, kon tan-awon mora og dili gyud sama sa kung unsa na kini sa karon. Mora kini og gamay’ng Eden, tungod atua kini una sa imong hunahuna aron buhaton, ug anam-anam mo kining gibuhat.

59 Karon gusto natong mangausab, ang atong mga kaugalingon, pinaagi sa pagbag-o sa atong hunahuna. Kita n’yo, dili sa kung unsa ang aduna kita niining yutaa, dili sa kung unsa ang ginapangita nato niining yutaa; kondili ngadto sa mamahimong unsa kita, diha sa nagasingabot nga kalibutan. Ang pagkausab pinaagi sa pagbag-o sa atong hunanuna!

60 Karon, unom ka libo ka tuig, miabot og ingon niana aron mahimo sa Dios kini, ug makita nato diha sa Genesis 1. Bisan pa man, makita nato karon nga, basi niini, ang Dios adunay—adunay katuyoan nga gusto Niyang ipahitabo.

61 Ug daghang mga tawo, diha sa pagtudlo bahin sa Genesis, dinhi dapit sa unang kapitulo ug sa ika-2 kapitulo, ug sa ika-3 kapitulo, ilabina, “Daw sa ginabalik-balik sa Dios ang Iyang Kaugalingon. O moingon Siya, mosige lang Siya ug mosulti niining mga butang nga Iyang ginasulti. Oh, kung giunsa Niyang . . . ‘Mahimo ang kahayag, ug mahimo ang *ingon niini*, ug may motungha,’ ug wala pa ma’y gihapon migawas nga bisan unsa man lang.” Wala gyu’y bisan unsa. Wala gyu’y kahayag. Kadtong—kadtong unang kalibutan atua ra sa gihapon nagalutaw diha sa kangitngit, natabunan og tubig. Apan, kita n’yo, gisulti na Niya ang Iyang Pulong, ug dinha pagnagasulti na Siya.

62 Karon mahimatikdan nato dinhi sa Genesis 1, miingon Siya, “Ug Iyang giumol ang tawo diha sa Kaugalingon Niyang dagway, nga ingon ka sama Niya Mismo, sa dagway sa Dios gibuhat Niya (Siya’y nagbuhat) kaniya, ingon nga lalaki ug babaye.” Kita n’yo, pagbuhat Niya sa tawo, gisulti Niya lang ang Pulong. Dayon nahibaloan nato, human milabay ang daghan Niyang mga adlaw, tingali og ginatus ug ginatus ka mga katuigan, wala sa gihapon og lalaki nga makauma sa yuta. Walay kinsa man nga modaru sa yuta, busa giumol sa Dios ang tawo gikan sa abog sa yuta. Kita n’yo, gisulti Niya ang Pulong, ug kinahanglan nga mamatuman ang maong Pulong.

63 Karon, sa dihang gisulti Niya, “Mahimo ang kahayag,” mahimong ginatus ka mga tuig, walo ka gatus ka tuig tingali, nga wala pa mitungha ang kahayag, apan natuman kadto tungod gisulti man sa Dios.

64 Ug magkaaduna ang Dios og usa ka Iglesia, dili ko igsapayan kung pila man ka mangitngit nga kapanahonan ang maagihan

nato, ug unsa pa man. Magkaaduna gayud Siya og Iglesia nga walay buling o kunot, kabahin man kita niini o dili, tungod Iya nang gisulti kini nga mahitabo. Motungha gayud kini.

⁶⁵ Ug—ug nagmando Siya, nga—nga mag-transform kini ngadto sa pagkatanum ug ang tanang kinabuhi nga Iyang gipanglitok. Gipangsulti Niya kini nga mga pulong, sama sa, “Mahimo ang kahoy’ng palma. Mahimo ang kahoy’ng encina. Mahimo ang kahoy’ng haya.”

⁶⁶ Tan-awa n’yo dinha sa disyerto, kon diin nga nagapuyo kita dinhi sa Tucson. Sa gawas dinha, adunay mga cactus, mga jumping cactus, tanan na nga matang sa mga cactus. Mga traynta minutos lang gikan niini, mao ang Sherman pine nga atua ibabaw sa bukid. Karon, dili puede motubo kini nga cactus *didto*, ug mao usab ang Sherman pine nga dili usab puede motubo *dinhing* dapita. Karon, asa na ang Intelihensiya nga nagtanum nianang binhia? Kita n’yo, aduna gyu’y gigikanan kini. Pulong kadto sa Dios, “Mahimo ang,” ug nahimo gayud.

⁶⁷ Karon, makita nato nga ang tanan niini (human nga gibuhat Niya kadto, gipang-transform kadto ngadto sa mga matang ug sa kinabuhi niini, ug—ug napangbuhat kadto pinaagi sa Pulong sa Dios, ang Magbubuhat), ang tanan kadto, nasayran nato, nga misangko kadto tanan ngadto sa punoang-buhatan, nga gitawag og tanaman sa Eden; ug gibutang didto sa Dios ang Iyang anak nga lalaki, ug ang pangasaw-onon sa anak Niya, nga maoy magadumala niining tanan. Kita n’yo? Kadtong halangdon Niyang mga binuhat, kita n’yo, aduna Siya’y katuyoan niini. Gihimo Niya nga maanindot kaayo ang tanan! Gibuhat Niya ang mga bulak, ug ang kinabuhi, ug ang mga langgam; ug walay kamatayon kaniadto, walay kasal-anan, walay mga kagul-anan, walay balatian. Ug unya ang tanan niining halangdong butang misangko alang ngadto sa usa ka dakung punoang-buhatan, nga mao ang tanaman sa Eden.

⁶⁸ Ug didto Niya gibutang ang Iyang anak nga lalaki, si Adan, ug ang pangasaw-onon ni Adan, ang asawa niini. Karon moingon mo tingali, “Iya na diay kadtong asawa.” Potensiyal na niyang asawa kadto, pero wala pa gayud siya. . .dili pa gayud niya asawa kadto.

⁶⁹ Sama diha sa Kasulatan, makita nato, kon diin nag-ingon Kini, “Jose, anak ni David, ayaw pagpanuko sa pagpangasawa kang Maria nga imong asawa, kay kanang iyang gisamkon iya sa Espiritu Santo.” Kita n’yo? Karon iya na kadtong asawa sa diha nga misaad siya nga pangasaw-on niya kini, o nga dawaton niya kini; pero bisan pa niana dili pa siya asawa niya, gayud, tungod nga wala pa gayud niya siya giila ingon nga usa ka asawa.

⁷⁰ Busa ingon niana usab kaniadto, ang hinungdan nga miingon ko’g, “Ang anak nga lalaki sa Dios ug ang pangasaw-

onon niini.” Wala pa niadto giila ni Adan ang iyang asawa ingon nga usa ka asawa, pero bisan pa niana asawa na niya siya, sa potensiyal. Sama lang sa Iglesia karon, ug ni Cristo.

⁷¹ Karon, kung ingon niana, makasalig gyud ang tanan, tungod ang tanan nga mga binhi sa maayo nga Pulong sa Dios, nga Iyang gilitok, nagpatungha kini ingon sa iyang matang niini. Mibiyo ang kalibutan, nagkaaduna og kahayag. Nagkaadunay sidlak sa adlaw sa dihang gipasidlak Niya ang maong adlaw. Karon nganong gipasidlak man Niya ang adlaw? Atua na kini sa Iyang hunahuna, kita n’yo, nga, kung dili mosidlak ang adlaw, dili motubo ang bulak, nga Iya nang gilitok aron motungha. Gibuhat Niya ang tanan nga matuman ang katuyoan niini, bisan unsa man kini. Sama sa kahoy, mamunga kini og usa ka acorn, o mamunga kini og mansanas. Gibuhat Niya ang maong bunga didto sa tanaman, ug uban pa. Ang tanan niini para sa Iyang katuyoan. Ug ang tanan-tanan kinahanglan nga matuman gayud, ug Iya kining gilitok. Karon ang butang lang nga kinahanglan Niyang buhaton, human nga gilitok na kini, Siya . . . nga nagsulti niini, diay. Magpahulay na lang Siya, tungod nga gilitok na Niya kini, ug ang tanan niadto kinahanglan nga matuman gayud tungod nga gilitok na Niya kadto. Wala ko kahibalo kung unsa man kadugay hangtud nga matuman kadto, pila man ka mga pidya o unsa pa man. Apan kinahanglan mamatuman gyud kini, tungod kay gisulti na Niya nga matuman kini. Gisulti na man gud Niya.

⁷² Mao usab ang mahitungod sa usa ka Iglesia sa niining kaulahiing mga adlaw. Makabaton gayud Siya og usa ka Pangasaw-onon. “Kay arang Siya makapatindog og mga anak kang Abraham sa niining mga bato.” Kung dili kita mosunod Kaniya, magkuha Siya og uban nga magasunod Kaniya. Kita n’yo? Makabaton gayud Siya Niini, tungod kay gisulti na Niya kini. Kung unsa ma’y Iyang ginasulti, mamahimong ingon niana gayud. Dili kini mabalhin. Motungha gayud kini sa ingon nianang paagi, tungod kay gisulti na Niya nga ingon niana.

⁷³ Ug ang tanan niining dakung butang nga nasayod Siyang magakatuman, human nga Iyang—Iya nang gisulti kini, makapahulay na Siya. Ang tanan-tanan kontrolado na! Ang Iyang binhi mao ang Iyang Pulong, ug binhi ang Iyang Pulong. Mao kana ang giingon ni Jesus. Ug ang tanan-tanan gyud maayo, tungod kay gisulti na Niya aron kini mamunga sa ingon sa iyang matang lang, maga-transform ngadto lang sa matang niini. Kita n’yo, ang Iyang Pulong gikinahanglan nga sa Iyahang matang lang. Kung nag-ingon Siya og kahoy’ng “palma”, dili Niya ginapasabot og sinagol nga palma ug encina. Ang pasabot Niya nga usa ka kahoy’ng palma *dinhi*, ug usa ka kahoy’ng *encina* dinha, ang tanan nga naka-posisyon diha sa iyaha lang puwesto.

74 Oh, kung mahibaloan lang unta nato kana, kanang asa gyud kita nga bahin diha sa Pulong, nga dinha kita kinahanglan nakapuwesto, bisan pa kung unsa kini.

75 Mahunahunaan ko ang luoy'ng igsoong babaye nga ania sa wheel chair, usahay, pila na kaha ka matinud-anon nga mga pag-ampo ang nahimo na bahin niini. Unya dili nato masabtan, mao nga ato lang kining ginatugyan sa Dios. Ug tungod. . . Usa siya ka bulak diha sa atong taliwala, tungod sa iyang pagka mapahimut-anon ug tanan na. Kita n'yo, nga kita makatindog ug makalakaw-lakaw, daw sa unsa niya ka gustong buhaton kana, pero bisan pa mapahimut-anon kaayo siya bisan sa paglingkod lang niya dinha. Kanunay akong madasig sa pagtan-aw lang sa maong gining, kita n'yo, tungod nga siya. . . Nagatoo kitang tanan sa balaanong pagpang-ayo. Nakita na nato ang Dios nga nagapamuhat og mga milagro nga labaw pa kaayo niana, kita n'yo. Ug nasayod siya niana, usab, kita n'yo, pero andam siya nga dawaton ang maong puwesto niya.

76 Kita n'yo, bisan unsa pa kini, ingon niana ang gusto nato. Ug nagatoo ako nga si David kadto, ang miingon, "Palabihon ko pa nga mamahimong trapo sa balay sa Ginoo, kay sa magpuyo sa mga balong-balong kauban ang mga dautan." Nakita n'yo, bisan unsa pa kini, "magpabilin ako sa akong puwesto."

77 Usahay kinahanglan mong maghimulag sa tanang butang nga bililhon para kanimo, dinhi sa yuta, aron matuman mo ang imong posisyon kon diin gitawag ka sa Dios. Sigurado akong nasabtan mo kining, akong ginasulti. Kita n'yo? Usahay bisan sa pinakapalangga mo nga tawo sa kalibutan, kinahanglan mong manamilit kanila; ug aron matuman mo ang imong posisyon diha kang Cristo, kon diin gitawag ka sa Dios. Kita n'yo? Pero unsa ma'y ginabuhat sa Dios? Ginausab ka gikan sa kung unsa ka kaniadto. Tingali usa ka nga anak nga babaye o anak nga lalaki, o unsa man, nga gikan sa usa ka maanindot nga pamilya usahay, dayon ginadala ka Niya ngadto sa kung asa. Tungod kay, Iya kining pamaagi sa pagbuhat niini, kita n'yo, pinaagi sa pagbag-o sa atong hunahuna, aron tumanon ang Pulong sa Dios, bisan unsa pa ang bugti niini. Kita n'yo? Wala nagaabot kini nga mga butang. . . Wala Kini nagtawag nga. . .

78 Dili usa ka baratong butang ang atong katubsanan, Anak kadto sa Dios ang namatay para kanato. Kita n'yo? Dili kini. . . Ang mga butang nga mahinungdanon mahal kaayo.

79 Aron nga mahatud kini nga Mensahe, dili sayon. Kita n'yo? Dili, dili gayud. Gikinahanglan kong biyaan ang tanan-tanan nga gimahal ko, bisan ang kaugalingon kong pamilya, ang tanan na. Apan nakita n'yo ang kahinungdanon niini, nakita n'yo, mao ang pagbuhat sa kabubut-on sa Dios. Ug sa pagbuhat niana, nasayod ko nga may sa kung unsang butang nga ania sulod kanako, sa dihang ginaingon nila sa una. . . Bueno, gusto

nilang palagputon ako; abi nila nga wala na ako sa hustong panghunahuna. “Nagabautismo sa Ngalan ni Jesus Cristo, nga supak sa iglesia. Ug tanan na niining mga butanga!” Miingon sila, “Nabuang na siya.” Apan, nakita n’yo, bisan unsa pa ang ilang ginaingon, aduna gyu’y butang nga kinahanglan buhaton. Ug basta na lang mogamit ang Dios og usa ka tawo, ibutang siya sa Iyang kamot, ug ingnon, “Buhata kini,” ug buhaton mo kini.

⁸⁰ Daw sa unsa tingali ka bililhon kadto kang San Pablo; gikatudloan ilalum ni Gamaliel, ang pinakabantugan nga magtutudlo niadtong adlaw. Ug nga magpaubos, ug ang pinakamismong butang nga gipakaingon niyang laing-tinoohan, mga butang nga gidahum niyang mao ang pinakadili-maayo nga mahitabo sa iglesia, miliso siya ug nahimo nang mag-aambit Niini. Pagkatalagsaon gayud! “Ug daw sa unsa ang Dios nagapamuhat diha sa katingalahang mga pamaagi, sa mga talagsaon, walay kapares nga mga pamaagi, mga kahibulongan Niyang mga pagpamuhat.”

⁸¹ Pag-gisulti kini sa Dios, nasayod Siya nga binhi ang Iyang Pulong; ug mahimo niining, igapamunga ang iyahang matang lang. Karon, minandoan na kini nga igapamunga lang niini ang iyahang matang, ug iya gayud buhaton kini kung dili lang kini hilabtan sa tawo.

⁸² Ug mao usab ang Iglesia sa Dios ug ang tanang uban pa, magapamunga lang gyud kini sa iyahang matang sama sa kadtong nahauna, kung dili lang pagahilabtan sa mga teologo kana nga Pulong, ginapaninguhaan pa nga iplatar Kini sa kung asa, o sa kung unsa man. Gisulti na Kini sa Dios. Ug bisan unsaon pa nila sa pagpaninguha, nga ilang hugawan Kini ug hilabtan Kini, ug uban pa, magapamunga gayud Kini sa Iyaha lang matang. Walay bisan unsa man nga makapugong Niini.

⁸³ Galaum ko nga ang tingog ko dili nga daw ginasinggitan ko kamo. [Ginatarung ni Igsoong Branham ang mikropono—Ed.] Kusog ba kaayo? [Nagaingon ang kongregasyon, “Dili.”]

⁸⁴ Ug, kita n’yo, makita nato karon nga ang tanan anaa ra sa kahan-ayan. Gisulti kadto sa Dios, ug miingon Siya, “Mahimo ang, mahimo ang. Ug mahimo ang Eden. Mahimo ang matahum nga mga bulak. Mahimo ang Akong anak nga lalaki, sa Kaugalingon Kong dagway, nga magatindog diha sa tanaman sa Eden, ug nga ang iyang pangasaw-onon magatindog sa kiliran niya.” Oh, pagkamaanindot gayud, kadto. Ug ang Amahan, Siya’y usa ka Amahan, nakita n’yo, busa nanggawas didto ang Kaugalingon Niyang mga anak. Ug naghimo Siya og paraiso para kanila. Gihigugma sa Dios ang pagbuhat og mga butang para sa Iyang mga anak.

⁸⁵ Nahinumduman ba ninyo kung unsa, nga kamong mga inahan, ug nga bisan unsa pa; kung kinahanglan minusan ang gigahin para diha sa lamesa, tungod nagkinahanglan si Junior og

usa ka pares sa sapatos nga iya gyud gusto, imo—imong buhaton kini, kita n'yo. Bisan unsa pa kini, mahatag lang og butang para sa imong mga anak! Dad, gina-todohan mo pa ang pagtrabaho, aron may madala ka lang sa imong mga anak. Kita n'yo?

⁸⁶ Bueno, nagapakita kana nga kita mga *taga-ania* ra sa ubos, nga mga ginikanan. Siya mao ang pinaka-maayong Ginikanan, kita n'yo, labaw pa kaayo! Dili ikatingala nga miingon ang apostoles, “Wala makita sa mata, o wala hidunggi sa dalunggan, ni misantop sa kasingkasing sa tawo, kung unsa ang gikatagana na sa Dios, alang kanila, nga nahigugma Kaniya.” Dili gayud nato maisip diha sa atong hunahuna, kita, dili arang mahunahuna sa atong hunahuna ang hustong—ang hustong direksyon kung unsa ang gitagana sa Dios, dinha kanato nga nahigugma Kaniya. Kita n'yo, kita, mahanduraw ko kung unsa kini sa umalabot, mahunahuna ko kung unsa kini sa umalabot, pero ako—ako . . . ang akong hunahuna walay—walay—walay kasarang sa paghunahuna kung unsa gyud kini katahum. Labaw pa kaayo niana. Mahunahuna n'yo kaha kung unsa gyud ang Langit pag-didto na kitang tanan, mga batanon, ug walay kasal-anan? Ug walay . . . Oh, pagkamaanindot nga lugar! Apan, kita n'yo, labaw pa kaayo niana. Kita n'yo, kita, “dili gani kini mahimong mosantop sa kasingkasing sa tawo, kung unsa ang giandam na sa Dios para kanila, gikatagana na.” Iya kining gisulti, ug mamatuman gyud kini.

⁸⁷ Karon human sa tanan niining matahum nga laraw nga aduna Siya, bahin sa Iyang . . . Dili ko buot ipasabot ang pagsulti ko niini gamit nianang pulong, nga laraw, pero medyo sama kini sa . . . Dili ba ang inahan, sa dili pa migawas ang bata, dili ba ginatawag nila kini og layette? Ginaandam na nila ang . . . tanan nga mga gamay'ng sapatos ug ang tanan inandam na, kabalo na mo, para lang sa maong moabotay nga gamay'ng bunga sa gugma nga ginapadala sa Dios, pagkadawat niana.

⁸⁸ Ingon niana ang gibuhat sa Dios kang Adan ug kang Eba. Gibuhat Niya kadtong tanaman sa Eden. Gisulti niya kadto, atua kini sa Iyang hunahuna; ug pagkasulti Niya niadto, nan kinahanglan mamatuman gayud.

⁸⁹ Timan-i kana karon sa inyong hunahuna. Kung unsa man ang Iyang ginasulti, kinahanglan mahitabo gayud! Kita n'yo, ug dili Niya mahimong . . . Walay bisan unsa man ang—ang makababag niini, walay bisan unsa man ang makapugong aron dili kini mahitabo. Walay bisan unsa man ang makahimo sa pagpugong aron mahitabo kini. Ginasulti na sa Dios, mao na gyud kana! Gisulti na kini sa Dios, mahitabo gyud kini.

⁹⁰ Karon ang tanan niini anaa na sa Iyang hunahuna, ug miingon Siya, “Mahimo ang.” Karon, anaa kana sa Genesis 1, kita n'yo, “Mahimo ang *ingon niini*. Mahimo ang *ingon niana*. Mahimo ang.” Nagapugas Siya og binhi. “Ma-*ania* kini. Ma-*ania*

kini. Ma-*ania* kini.” Ug nahibalo Siya nga mamaingon niana gyud kini, tungod kay dili mahimong mausab kini.

⁹¹ Karon nagahatag kana kanato og pagtoo, kung ingon niana. Ug kung unsa ang Iyang giingon *Dinhi*, magakahitabo gayud. Busa tugotan nato kana nga Binhi nga mosulod sa atong mga kasingkasing, aron nga mamahimo kitang mga semilyahanan Niana, kita n’yo, sulod sa atong mga kasingkasing. Ug tumanon nato kining puwesto kon diin Niya kita gibutang, sa niining kaulahiing mga adlaw. Kita n’yo, “Tugoti nga mahulog ang maong Binhi sulod sa among mga kasingkasing, Ginoo. Tugoti nga mahulog ang Imong Pulong sulod sa akong kasingkasing.” Ayaw tugoti nga magkaadunay unsa man nga kakulang sa pagtoo!

⁹² Sama ni Abraham, niadtong usa na siya ka tigulang nga tawo, daw sa imposible na gayud. “Unsaon man nila pagbuhat niana? Unsaon man niya pagkahimong ingon niana?” Wala niya gayud kadto gitagad. Gidawat lang niya ang Pulong sa Dios, ug padayon nga mitoo, ug gipahitabo kadto sa Dios. Karon, gisulti na sa Dios kadtong mga butanga, busa nasayod siya nga matuman gyud kadto. Ug nahitabo gyud, gipabunga Niya kadto sa iyang matang niini.

⁹³ Karon ingon nga gipang-transform Niya, ang tanang binhi nga mamahimong mga buhi na nga mga binuhat ug sa kung unsang angay kadto nga mga binuhat, ningtungha kadto sa ingon ka eksakto kung giunsa Niya pagkasulti niadto. O, miingon Siya, “Mamahimong ingon niini kini.” Mahimong milabay ang ginatus ug ginatus ka mga katuigan, apan ania na sila makita nato diha sa usa ka matahum nga Eden, ug ang dagkung mga langgam nga nanglupad. Dili kinahanglan mamatay kadto nga mga langgam. Ug ang lobo ug ang karnero magkauban nga nagakaon, ug ang liyon, ang leyopardo ug ang toro. Ug walay mga patyanay, walay kamatayon, walay mga kagul-anan. Ug atua si Adan ug si Eba, nagalakaw diha sa tanaman sa Eden. Ang matag binhi nagatubo ingon sa matang lang niini, dili kini makahimo og unsa man nga lahi. Dili kini makahimo og unsa man nga lahi, tungod nag-ingon na ang Dios, “Mamahimong ingon niana kini.” Kinahanglan nga mamaingon niana gyud kini.

⁹⁴ Oh, daw sa unsa ko ka gustong mohunong usá dinhi sa kadali, sa pag-ingon, kita n’yo, nga ania kita karon nagapaabot, sa gihapon, alang sa katumanan nianang Pulong.

⁹⁵ Karon nag-ingon ang Dios, “Mahimo ang.” Ug ania kini nga miturok, una, sa hingpit, ka eksakto gayud. Karon, *kini* nga kahoy makapaturok lang og ingon nianang kahoya. *Kini* nga kahoy makapaturok lang og ingon nianing kahoya. Ug si Adan, nga usa ka anak sa Dios, makapanganak lang og usa ka anak sa Dios. Kita n’yo, nakuha n’yo ang buot kong ipasabot? Kining

tanang ingon lang gayud sa matang niini, ug busa makaingon ang Dios, “Bueno, magpahulay na Ako karon.”

⁹⁶ Ug nahimatikdan ba ninyo, pipila na lang ka mga pulong ang gisulti sa Dios, sa tinuod lang, sukad niadto? Iya na kining gitugyan, human sa maong pagkahulog, ngadto sa Iyang mga propeta, ug ila nang ginapahayag karon ang Pulong, nakita n’yo. Nagpahulay ang Dios, wala na Siya’y kinahanglan pang buhaton. Moadto na lang sila ngadto sa Iyang punoang-buhatan ug manuktok sa pultahan, ug moingon, “Amahan, unsa man?” Ug Iyang ginapadala ang Pulong didto pinaagi kanila. Kita n’yo, aduna Siya’y usa ka sistema, ug pamaagi sa pagbuhat nianang mga butanga.

⁹⁷ “Tugoti lang kini nga . . .” Ug ingon niana kini kaniadto, ang tanang, mahitungod niining binhi nga mamunga og iyahang matang niini. Karon sa diha nga ang tanang maanindot na tanawon, ug ang tanang nagakatuman na eksakto sa kung unsa lang ang giingon sa Dios, ania karon nagaabot kining mahugaw’ng, dautan nga maglilimbong.

⁹⁸ Karon mao kana kung unsa ang ginapaninguhan kong ipasidaan kaninyong tanang dinhi. Sa diha nga makita ninyo ang Binhi sa Dios nga nagasugod na’g panurok, nagasugod na’g tubo, bantayi kana siyang nagasulod sa ingon ka maliputon nga mahimo niya, mokutlo og Kasulatan aron lang nga dili ka makabatang niini, kita n’yo. Bantay ka kaniya, tungod nga usa siya ka maglilimbong.

⁹⁹ Pagatawgon ko kini og, imbis nga usa—usa ka nagauyon, ingon nga nahiuyon, usa siya ka tigdaot, ginadaot ang mga butang nga uyon na. Usa siya ka tigdaot, ug, siya, ingon nga tigdaot, o usa ka tigtuis, o usa ka tigdunot sa orihinal nga Binhi ug sa orihinal nga programa.

¹⁰⁰ Karon makita n’yo dinhi, sama sa inyong pundok dinhi niining buntaga, aduna kamo’y programa, aduna kamo’y panglantaw. Karon magbantay gyud nianang tigdunot, oh, maliputon siya ug dili gyud kasaligan, nakita n’yo. Apan padayon ka diha sa imong panglantaw, dong. Kita n’yo, padayon nga saligi kana.

¹⁰¹ Karon ato usab mahibal-an nga, sa diha ng nakasulod siya, gidaut niya kadto nga binhi. Ug gidunot niya kadto nga binhi pinaagi sa pagsulod niya sa semilyhanan niini, nga mao si Eba, ug gidunot kadto nga binhi, gamit ang madunoton nga binhi, sa dili pa kini makaabot didto, aron madunot kadtong matahum nga tanaman sa Eden.

¹⁰² Kung asa—asa, ang Langit, ang bugtong butang niana, mao ra ang pagpahauli niini. Kung asa man kita karon, ania na kita pabalik ngadto nianang orihinal nga sinugdanan sa mga binuhat sa Dios, pabalik sa tanaman sa Eden pag-usab; ingon nga bana ug asawa, nga walay—walay bisan unsa man—bisan unsa man

nga sala o unsa man lang, aron nga magkinabuhi ngadto sa Walay Katapusan. Apan ang—ang pagka-. . . ang. . .

¹⁰³ Karon, karon gusto Niyang mausab ang atong mga pagpanghunahuna, pinaagi sa pagba-o; o mausab, mausab pinaagi sa pagbag-o sa atong—atong mga hunahuna.

¹⁰⁴ Karon nagasulod si Satanas ug nagbutang og pangdaut sa Pulong, ipasulti Kini og butang nga dili ingon niini Kini. Karon ingon niana ang gibuhat niya didto sa sinugdanan. Ug karon himatikdi, medyo dili kini maayo paminawon, para sa—sa mga tawo, kung dili ko hulaton ug maplastar sa maayo ang akong pangatarungan sa dili pa ako moabot sa regular kong panghunahuna nga—nga gusto kong ipasabot kaninyo. Ingon niini kini, nga, ang tigdaut misulod; ug sa diha nga miabot ang Dios og unom ka libo ka tuig gamit ang Pulong, aron ipahayag ang matag pulong ingon sa iyang matang niini, ug ang tanan nga Iyang gipahayag mamahimong Pulong sa Dios Mismo nga nagapatungha ingon sa matag matang niini, karon miabot ang tigdaut og unom ka libo ka tuig usab, ug aron dauton kana nga Pulong sa Dios. Ug unsay iyang nahimo? Nakahimo siya sa iyang kaugalingon og usa ka bag-ong matang sa Eden, ang Eden ni Satanas. Dinha kita nagapuyo sa karon.

¹⁰⁵ Giunsa man niya kana pagbuhat? Giunsa man pagkahitabo niini? Karon ang makapahibulong nga bahin niini maoy kung giunsa niya pagbuhat niini. Ug dinha nato kinahanglan, kana maoy kung unsa nga ania ako, aron iplatar kini sa atubangan ninyo, aron nga matun-an ninyo kini karon, ug uban sa mga igsoong lalaki dinhi, ug uban pa, sa sunod nga mga semana, aron makita ninyo kung giunsa ni Satanas pagbuhat niini. Ug mabantayan ninyo kung unsa gayud siya ka malimbongon, kung unsa gayud siya ka maliputon.

¹⁰⁶ Karon, iyang gipangdaut kadto nga mga binhi. Karon, dili niya kadto mahimong patyon, iya lang gipangdaut kadto. Karon nahibal-an nato nga ang kasal-anan maoy pagkamatarung nga gituis lang. Ang bakak mao ang kamatuoran nga gituis lang. Kita n'yo, bisan unsang butang. Ang pagpanapaw maoy gikan sa buhat nga husto, ordenado sa Dios, gigamit lang sa sayup nga paagi. Kita n'yo, bisan unsang butang. Ug ang kamatayon usa ka pagbalit-ad sa kinabuhi. Ginahimo sa kamatayon, kita n'yo, ginabalit-ad niini ang kinabuhi.

¹⁰⁷ Karon nagkaaduna siya og unom ka libo ka tuig aron buhaton kini gamit ang hilo niya nga pangbisibis. Ug giunsa man niya kini pagbuhat? Karon mao kini ang makapahibulong nga bahin. Ug karon pagpaminaw gyud og maayo. Gibuhat niya kadto pinaagi og sibilisasyon. Karon bag-o kaayo kana paminawon, apan mao gyud kana. Mohimo ako og usa ka pahayag dinhi nga magpahunahuna kaninyo, tingali, sulod sa pipila ka minuto; dili lang unta. Apan nasayran ba gyud ninyo

kini? Karon dili ingon nga ginasuportahan ko ang kawalay-edukasyon. Pero kabalo ba mo nga ang sibilisasyon, siyensya, edukasyon, ug ang mga butang nga atong gihatagan og dakung kamahinundanon sa karon, mao ang mga instrumento mismo ni Satanas, bisan ang sibilisasyon? Wala nagagikan sa Dios ang sibilisasyon. Kay Satanas nagagikan ang sibilisasyon. Karon pamatud-an ko kana kaninyo pinaagi sa Pulong, sa pipila ka minuto.

¹⁰⁸ Ang sibilisasyon dili iya sa Dios. Tungod, ipakita ko kaninyo; nga sa niining sibilisasyon, sa diha nga dugang kitang nagka-sibilisado samtang nagkausbaw kita sa siyensya, kanunay natong ginapatay ang atong kaugalingon. Kita n'yo? Ug miabot na kini nga sibilisasyon ngadto sa pinaka-taluktok niini karon, ug aduna kanato ang kamatayon sa niining sibilisasyon. Aduna kanato ang sala sa niining sibilisasyon. Aduna kanato ang mga balatian sa niining sibilisasyon. Dili mahimong iya kana sa Dios.

¹⁰⁹ Busa, ang Dios, diha sa Mil-...diha sa Iyang dakung, Kaugalingon Niyang halangdon nga Ginghamian nga magaabot, magkaaduna kita og usa ka sibilisasyon, apan dili kini mamahimong sama niini. Dili kini pinaagi sa siyensya. Kini mamahimong usa ka sibilisasyon nga iya sa pagtoo, pinaagi sa Pulong. Kita n'yo?

¹¹⁰ Kining siyentipikong sibilisasyon nga aduna kita, eksaktong maoy lit-ag ni Satanas, ug sa nianang paagi niya gipatay ang mga tawo. Sa ingon nianang paagi niya ginapatay kita, adlaw-adlaw, tungod niana. Dinha kung unsa nga, sa pag-kaon nato, adlaw-adlaw; imbis nga padayong mabuhi, nagakamatay kita. Ila nang napangbalit-ad ang tanan, hangtud nga mokuha sila og ingon ka daghan *niini* ug isagol kini *dinhi*, ug i-hybrid *kini* ug *kana, kana*, hangtud makamatay na. Usa kini ka kaliwatan nga naghimalatyon na. Ug bisan unsa pa ang paninguhaon mong buhaton, mamatay ka gihapon.

¹¹¹ Nakita n'yo kadtong pelikula kagabii, mahitungod niadtong mga Aprikano. Kabalo ba mo kon ngano? Wala sila sukad nagkaaduna og penicillin. Mas hataas pa ang ilang kinabuhi kay kanato. Wala man lang gani sila nasayod nga sila'y... Dili makapa-problema kanila ang mga kagaw. Kita n'yo, aba, magunitan lang nila ang kagaw ug mosurender dayon kini kanila. Kita n'yo? Tungod siya, kita n'yo, dili siya, siya... Wala lang kanila. Ngano man? Wala man sila sukad... Kita n'yo, gamiton man nato ang siyensya, aron usisaon, sama niining penicillin o unsa man nga ilang itambal kanato, aron—aron kono nga matangtang kini nga balatian, ug dauton man niini ang uban nga bahin kanato, ug maghimo'g puy-anan sa kung unsa. Kita n'yo? Karon, wala siya'y ingon niana. Kita n'yo?

¹¹² Karon ang si kinsa man, kadaghanan kaninyo nga mga tawo gikan sa mga umahan. Nasayod ang si kinsa man kaninyo

nga ang usa ka maayong mahimsog nga tanum wala gyud nagkinahanglan nga i-sprehan pa. Kini—aduna na kini og pang-abog sa insekto diha sa iyang kaugalingon, sa iyang kinabuhi, nga ang kagaw dili man lang makaduol niini, diha sa usa ka tinuod—tinuod og mahimsog nga tanum. Ang may problema mao kining mga amumahonon pa nga tanum, mao kining gi-hybrid nga mga tanum nga kinahanglan mo pang bebe-bebihon.

¹¹³ Pananglitan, ang uban kaninyo dinhi mga taga-Kasadpan. Dumduma ninyo kadtong panahon sa mga longhorn nga baka. Nagaingon mo sa karon nga aduna kamo og maayo kaayong karne tungod sa inyong—tungod sa inyong Hereford. Dili ba? Wala na’y mas maayo pa. Kadtong baka nga longhorn, dili sa mas ginapalabi ko kini, apan mahimo niini, mahimong mogawas kini panahon sa tingtugnaw nga mora og lagsaw. Oh, niwangon kini ug tanan na, pero mas doble kining. . .

¹¹⁴ Kining Hereford, butangi og dagami ang ilalum niini, sa dihang mokuha ka og retrato niini, butangi hangtud sa tiyan niini, halos, aron mapakita nga karne gyud siya hangtud sa iyang lugaluta sa tuhod. Ug unsa man kini? Buhii siya pagawas didto, mamatay siya. Dili niya maagwanta ang tugnaw bisan kinahanglan pa niyang agwantahon. Kinahanglan mo gyud siyang pakaonon, ug tanan nang uban pa, aron maalima kini, bebe-bebihon pa. Usa siya ka hybrid. Kita n’yo? Apan ang usa ka lunsay’ng, tinuod gyud nga longhorn, bisan buhian mo pa siya.

¹¹⁵ Ingon niana usab kini sa atong mga Cristohanon sa karon. Aduna kita og daghan nga kinahanglan pa natong pangga-panggaon, hangyo-hangyoon, hatagan og posisyon, himoong diyakono sa iglesia, tapik-tapikon sa abaga, ug himoon sa kung kinsang daku-daku sa iglesia. Kay, kon dili mo buhaton, aba, siya, dili siya—dili na siya mosimba, kung dili mo pahanugotan *kining* usa nga himoon kini, ug *kining* usa nga himoon *kana*. Pagbebe-bebi kini.

¹¹⁶ Mahunahuna n’yo ba ang usa ka Cristohanon nga ingon niana? Mga malig-on sila kaniadto. Mga kusganon sila. Mahunahuna n’yo kaha si Pablo nga ingon niana nga matang sa Cristohanon, mahunahuna n’yo kaha si San Pedro, “Karon nga—karon, kung dili ninyo ako himoon nga pangulo sa tanan, bueno, wala ko kabalo, basin mopa-miyembro na lang ko sa *Ingon niini-ug-ingon niana*”? Mga malig-on sila kaniadto. Sila’y mga tawo sa pagtoo. Nagkinabuhi sila uban sa Dios. Nanaglakaw sila uban sa Dios. Sila’y mga lalaking hilumon. Nangalagad sila sa Dios, adlaw ug gabii, sa walay puas. Dili mo na sila kinahanglan pang i-sprehan ug bebe-bebihon pa, ug kinahanglan pang tanyagang og *ingon niini*, *ingon niana*, o *unsa man*. Mga tawo silang, malig-on! Mga tinuod sila nga binhi, dili mga hybrid nga anaa diha sa mga denominasyon.

¹¹⁷ “Pag-kamong, mga Methodist dili gani ninyo ako tagdon sa husto, moadto ako sa mga Baptist. Pag-dili ako tagdon og husto sa mga Baptist, moadto ako sa mga Pentecostal. Kung dili pud nila ako tagdon sa husto, mobalik na lang ako sa pagka-Katoliko, o unsa pa man.” Kita n’yo, sila’y, mga hybrid, gikinahanglan pang i-spreyhan, “Oo, Doktor Reverend *Ingon niini-ug-ingon niana*.” Dili ingon niana ang pagka-Cristohanon.

¹¹⁸ Ang pagka-Cristohanon wala—wala nagapangayo og mga titulo, wala kini nagapangayo og mga pabor. Ang Dios lang naila niini. Orihinal kini nga binhi. Gihigugma niini ang Dios, ug nagahigugmaay sa usa’g usa. Dili sila gina-espreyhan, ug ginabebe-bebi, ug ginatapik-tapik, ug ingnon, “Oo, bueno, *kining* atong igsoong babaye, bueno, siguro okey ra nga mubo ang iyang buhok, ug *kining* usa dili puede.” Ug—ug dili ingon niana kana, ug pasagdan lang silang malusotan *kini*. Kini—malig-on kini, pero ang Maayong Balita kini! Isabwag kini, pasagdi kung asa kini mangahulog. Gusto kaayo kini sa mga Cristohanon.

Kinahanglan ba nga bitbiton ako paadto sa
Panimalay, paingon sa Langit,
Diha sa mabulakon nga higdaanan sa kasayon,
Samtang ang uban nagpakigsangka gayud
aron lang nga makab-ot ang ganti
Ug nanglawig diha sa dugoon nga kadagatan?

¹¹⁹ Kinahanglan pa ba akong tapik-tapikon sa likod, ug *ingon niini, ingon niana*, ug *unsa pa*, ug bebe-bebihon? Gapaabot ko nga aduna gyud ko’y puwesto didto uban sa mga malig-on. Wala ko nagapaabot nga wala man lang ko’y tropeong-ulat sa kadaugan pag-abot ko didto.

Kinahanglan gayud nga makigbugno ako, kon
kinahanglan kong maghari, dugangi pa ang
akong kaisog, Ginoo!

¹²⁰ Kita, pasagdi akong magbarug ingon nga usa ka Cristohanon. Dili nga mamahimong usa—usa ka hybrid nga tanum. Kinahanglan pang bebe-bebihon ug amumahon, ug ihatud-hatud pa. Wala ka gihatud pasulod, ngadto sa pagka-Cristohanon, natawo ka sa sulod niini. Nahimo kang usa ka bag-ong binuhat, usa ka ka binhi sa Dios, nga miabot dinhi sa yuta.

¹²¹ Karon, nasayran nato nga gi-esprey sa yawa kadtong hilo nga pang-esprey, ug kadto nga esprey mao ang esprey sa modernong pagpanabot, edukasyon, siyensya, ug sibilisasyon, ang mismong mga butang nga ginahatagan gyud nato og dakung bili. Wala man lang ba kamo mihunong usá aron pamalandungan nga ang atong dakung kaaway, sa natural nga pagkinabuhi sa karon diha sa mga kanasuran, mao ang komunismo? Unsa man ang dios sa komunismo? Sibilisasyon, ug edukasyon, siyensya.

Husto kana, dili ba? Dinha sila nagakinabuhi ug nagauswag, sa siyensya, ang pagka-siyentipiko, mga siyensya, dios sa siyensya. Karon kung inyo lang . . . ug gamit kining hilo nga esprey sa niining modernong sibilisasyon, siyensya ug edukasyon.

¹²² Karon pamatud-an ko kaninyo nga ang edukasyon ug ang sibilisasyon nagagikan sa yawa. Karon balik kita dinhi ug tanawon, kung gusto ninyo, diha sa Genesis, sa ika-4 nga kapitulo. Sige, karon sugdan nato sa ika-16 nga bersekulo sa Genesis 4. Sa katorse dinhi o . . . sa Genesis 4 diay, pasayloa ko. Karon himatikdi, si Satanas . . .

¹²³ Kamong mga kaigsoonan, sundan ninyo kini nga mga teyp, pinaagi sa atong-atong igsoong lalaki dinhi, karon, nadungog na ninyo akong miwali bahin sa *Binhi Sa Serpente*, ug dili na kana malimod. Nabuksan kini diha sa usa sa Pito Ka Mga Selyo. Natago kini kaniadto.

¹²⁴ Karon kung ang mga bata midaku ilalum nianang matang sa, kita n'yo, ilalum nianang matang sa pagtolon-an, ingon niana man ang ilang mga ginikanan, aduna kanila ang kinaiya sa ilang mga ginikanan, sa ilang mga denominasyon, ug uban pa, kinahanglan nilang toohan kana. Kita n'yo, ginatoohan nila kana tungod nga natawo man sila nga napailalum sa nianang ginikanan. Apan sa karon wala kita natawo nga napailalum nianang ginikanan; ang atong Ginikanan mao ang Pulong. Ug ang Pulong . . . “Bueno,” moingon, “Ako natawo ilalum sa Dios, usab.” Sa niadtong kapanahonan. Apan kini mao na ang kinatumyan nga kapanahonan, mao kini ang kapanahonan nga lagpas na sa mga denominasyon.

¹²⁵ Kinahanglan aduna gyu'y moabot, moabot gyud kini; pagbulot-an kini sa Dios nga mamaingon niini kini, nga kinahanglan mahitabo kini, kinahanglan nga mabuksan kining Pito Ka Mga Selyo. Gipaabot nga mamahimo kini sa niining kapanahonan sa Laodicea. Ug sa hunahuna ko, nga bisan landong sa pagduhaduha wala gyud . . . Dili nga ginapasigarbo nato; wala man kita'y mga pagpasigarbo, gawas lamang kang Jesus Cristo; wala gyud maipasigarbo kanato. Nagapasigarbo lamang kita diha kang Jesus Cristo. Apan mapasalamaton lang kita tungod sa . . . tungod sa pribilihiyo nga bisan unsa pa nasayod kita . . . wala gyud ni landong sa pagduhaduha, nga gipili kita sa Dios sa niining kaulahiang mga adlaw, ug gipamatud-an kini pinaagi sa mga ilhanan diha sa Langit ug diha sa yuta; ug ang matag usa niini nagakatakdo gayud sa Pulong, aron mapamatud-an nga mao na kini, kining atong gikapuy-an nga kapanahonan, kining Mensahe ug kung unsa Kini. Dili kita kulto. Dili kita og pundok sa mga panatiko. Mga alagad kita sa Dios, nga gitawag sa Espiritu Santo. Pagatawgon ka og tanan na nga matang sa pagbansag nganha kanim, apan dili kana nagapasabot nga ingon niana kita.

126 Karon hinumdumi, ang anak ni Satanas mao si Cain. Karon siguro napaminawan na ninyo ang tanan nga mga teyp, nga, makita ko sa inyong mga libraryo dinha, bahin sa mga niini. Karon hinumdumi nga si Eba giburosan ni Satanas, ug sa mao nga adlaw mismo. . . Aduna kita og ingon niana nga kaso didto sa Tucson karon, nga ang usa ka babaye, nga kung siya’y. . . nagpuyo-puyo siya uban sa duha ka lalaki, mamahimong magkaaduna siya og duha ka magkalahi nga anak. Nahibalo kita niana. Nasayran ko kana kung magpaliwat ka og mga iro ug ingon nianang mga butang, ug uban pa, kung gamay ra kaayo ang lak-ang.

127 Busa si Satanas, niadtong buntaga tingali, natagbo kining dautan, nga mao ang serpente; dili ingon nga usa ka butang nga nagakamang, kondili ingon nga usa ka mananap; pinakamalalangon, maliputon, maantigo, kay sa tanan nga mga mananap, ubos lang siya sa tawo. Ug ang tawo usa ka mananap, mismo, ug kita—mga mammal kita, init-og-dugo nga mananap.

128 Ug—ug si Satanas mao ang sunod na nga sumpay, kining serpente, mao ang pinakasunod na sa tawo, gikan sa chimpanzee, tungatunga tali sa tawo ug sa—sa chimpanzee. Karon dugay nang gipangita sa siyensya kanang nawala nga sumpay. Ug grabe ang pagkatago niini nga gipakamang gyud kini, nga ni usa sa bukog niini dili gyud kapareho sa tawo, kita n’yo, gihimo siyang usa ka nagkamang nga mananap.

129 Karon, masayran nato karon, nga nakita sa niini nga binuhat si Eba didto sa tanaman sa Eden, kadtong dalaga nga wala pa nakaila kung unsa ang sala, nga wala nasayod sa iyang pagkahubo. Ug nahibalo kadtong serpente. Maantigo siya, malalangon, maalam. Ug giingnan niya si Eba, “Ang binhi, ang—ang maong bunga baya makalipay ug takus tinguhaon,” ug. . . didto na siya nakig-ipon kang Eba niadtong buntaga.

130 Ug dayon, kita n’yo, unya, pagkahapon niadto, gidani ni Eba si Adan nga buhaton ang mao usab nga butang, gisultihan kini kung unsa kadto.

131 Ug dayon si Adan sa tinuyo, ingon nga nasayod na nga dili angay’ng buhaton kadto, milayas uban sa iyang asawa ug gibuhat ang mao nga buhat. Nga, sa tinuod lang paingon ra man siya sa ingon niana sa gihapon. Apan, nakita n’yo, kinahanglan nga mahitabo gyud kadto, sa kaalam sa Dios, nga tungod niini, sa ingon niana, mapasundayag ang Iyang kinaiya ingon nga usa ka Manluluwas, Amahan, Mananambal. Nadungog na ninyo akong nagwali bahin niana, kita n’yo. Karon kung wala kadto nahitabo. . .

132 Gipasagdan lang Niya sila didto sa ilang gawasnon nga pagbuot, gitugotan silang magbuot. Dili puede nga pugson sila sa Dios nga buhaton kadto, ug mamahimong matarung sa gihapon. Pero mahimo Niya silang kapareho Niya, ug nga

may gawasnon nga pagbuot, ug pasagdan sila mismong buhaton kadto. Ug nasayod Siyang buhaton nila kadto.

¹³³ Ug busa, nakita n'yo, unya sa diha nga nakig-ipon na si Adan, nanganak si Eba og kaluha. Ug ang usa niini iya ni Satanás; ug ang usa usab niadto iya ni Adan, nga iya sa Dios. Si Cain ug si Abel.

¹³⁴ Ug nagakahitabo kana. Aduna kita og ingon niana nga kaso didto sa Tucson karon. Ang—ang puti nga babaye nakig-ipon sa iyang bana usa niana ka buntag, ug pagkahapon niadto nakig-ipon na pud sa usa ka Negro. Ug ang usa sa niadtong anak niya nga lalaki. . . Duha ka batang lalaki ang natawo. Ang usa kanila medyo kulot-og-buhok nga Negro, ug ang laing usa—maoy usa ka bulagaw-og-buhok nga bata, guwapohon. Ug—ug, hunahunaa ha, ginapaninguhaan niyang pasuportahan sa puti nga amahan ang maong duha ka bata. Ug miingon kini nga amahan, “Suportahan ko kadtong akoa ra, pero kadtong sa iyaha. Pasuportahi usab sa Negrong amahan ang kaugalingon niyang anak.” Busa, nakita n'yo, tinuod kana.

¹³⁵ Aduna na kanang kaluha sa una pa. Ug mao kana ang hinungdan. . . Ayaw ninyo kalimti kini, gamay'ng panon. Ang iglesia sa kaulahiang mga adlaw mamahimong magkaluha usab, “halos magkapareho gayud nga pagalimbongan niini ang mga Pinili. . .” Mateo 24:24, kita n'yo. Ang iglesia'y. . . Usa kini ka Pentecostal nga kalihokan. Halos gyud og tinuod, hangtud nga “malimbongan niini ang mismong mga Pinili kon mahimo pa.” Ug unya taudtaud, kung may kahigayonan pa, gusto kong isaysay kung unsa, kung sa unsang paagi nga ginahimo kana nga pagpili. Kita n'yo, pagalimbongan sila niini tungod kay kini halos mao rang butang. Kita n'yo, duha ra ka amahan, kana lang; mao rang inahan, mao rang iglesia, mao rang kalihokan, halos mao gyud. Ang semilyahanan mao ra, kon diin napugas ang Pulong; apan ang usa niining duha, sama dinhi, tinuis. Nasabtan ba ninyo? Moingon “amen” kung nasabtan ninyo. [Nagaingon ang kongregasyon, “Amen.”—Ed.] Kita n'yo, ang usa niini daut, tungod lahi ang amahan. Nga, pagapamatud-an ko kaninyo sa umalabot, kung tugotan ako sa Dios, nga ang denominasyon mao ang marka sa mapintas nga mananap. Kita n'yo, lahi ang amahan niini, ginasugyot niini ang mga tawo ngadto sa organisasyon imbis nga paingon sa Pulong. Kita n'yo, lahi ang amahan niini. Lihok kini nga iya ni Cain.

¹³⁶ Pag-uli ko niining panahona, magawali ako niining hilisgutan, *Ang Agi Sa Serpente*; ang mapintas nga mananap sa sinugdanan, ug ang mapintas nga mananap sa katapusan; ug subayon ang tibuok agi niya diha sa Biblia, ug ipakita kung asa ang kapaingnan niini. Kita n'yo? Ug madunggan ninyo kana tanan sa telepono, nakita n'yo, kung pahanugotan kita sa Dios nga buhaton kini. Ug karon bantayi lang kung unsa ka maliputon kini nga mananap, kung unsa ka eksakto gyud siya

ka . . . Bueno, sama ra sila ni Judas ug ni Jesus kaniadto, pareho silang magsoon sa mao rang banay, sama ra ni Esau ug ni Jacob. Ug—ug sama sa—sa uwak ug sa salampati, nga nagatugdon diha sa mao rang tugdonanan. Ug ang tanan niini magkaluha, diha sa—sa niining dakung pagpakig-away nga atong ginapakig-awayan karon.

¹³⁷ Mogamit ang kaaway og mga pagpanglimbong, sama sa iyang gibuhat kaniadto kang Eba, “Oh, nag-ingon ba ang Dios? Siguradong, apan—apan siguradong . . .” Kita n’yo?

¹³⁸ Kita n’yo, ginapaninguhaan nga pangatarunganan kini gawas sa kung unsa ang orihinal nga giingon sa Dios, “Mamatay ka gayud!”

¹³⁹ Miingon siya, “Oo, giingon Kana sa Dios, apan siguradong . . .” Nakita n’yo kanang pag-esprey niini? Kita n’yo? Apan kung unsa ang ginaingon sa Dios, ginatuman sa Dios, wala Siya nagkinahanglan og unsa man nga tabang gikan kang Satanas. Ginatuman Niya kini. Busa, ayaw gayud pagpalimbong niana. Karon mahitikdan nato, unya, nga nagbunga kini sa iyang matang niini. Karon dinha sa Genesis, makita nato, pagkahuman sa maong pag-esprey niining hilo nga kahibalo.

¹⁴⁰ Karon, ang siyensya usa ka kahibalo. Ug ang madungog na lang nato maoy: “Siyensya, siyensya, siyensya, siyensya.” Ang pinakailadong subject sa eskwelahan: Siyensya! Ang sa karon, usa ka mas maayong sakyanan, usa ka mas maayong *ingon niini*, usa ka mas maayong panimalay, usa ka mas maayong balay, usa ka mas maayong *ingon niini*, usa ka mas maayong *ingon niana*. Unsa na man ang nagakahitabo kanato? Nagakamatay, sige-sige. Pagka-imbento og sakyanan, miundang na kita og lakaw; miundang na’g lakaw, naghupong na sa katambok. Bueno, wala na ta’y mga lalaki; mga bukya na ang aduna kanato. Husto kana.

¹⁴¹ Ug ang babaye, ang ginabuhat niya na lang, ilabay na lang didto ang mga sinina, ug dayon [Adunay gid agpi si Igsoong Branham—Ed.] pindoton ang usa ka tuplokan, og human na. Nga, sa una ang imong mama moadto pa didto sa tuburan, ug mosag-ob og tubig, ug magbugha og kahoy, ug magpabukal pa og tubig sa takuri, ug—ug labhan ang iyang mga sinina nga sama niana. Ug pagkahuyang na nato, kung buhaton pa nila kini, patyon kita niini. Apan, dili na nato mapugngan kini, mao kini ang kapanahonan nga atong ginapuy-an.

¹⁴² Bisan ang siyensya nagaingon karon, nga, “Ang mga dalaga nagaka-menopause na, batan-on pang mga babaye nga mga baynte ug baynte-singko ka tuig ang mga panuigon.” Nahimamat ko sila mismo diha sa prayer line. “Nga batan-on pang mga lalaki nagakahamtong na, mga baynte ug baynte-singko pa lang ka tuig ang mga panuigon.” Ang akong inahan . . . Ang akong asawa miagi niini, nga mga trayntay-singko hangtud kuwarenta pa siya. Naagihan kini sa akong inahan, sa mga

kuwarentay-singko hangtud singkwenta na siya. Nakita n'yo kung unsa nga nagakaut-ut na kita sa niining kaulahiang mga adlaw. Tungod ngano man? Mas ginapalabi pa nato ang siyensya.

¹⁴³ Kaniadtong usa ka gatus ug singkwenta ka tuig, ang paagi lang nga makabiyaha ang tawo kaniadto maoy pinaagi sa kabayo o pinaagi sa paglakaw. Ug karon nagabiyaha siya pinaagi na sa eroplano, halos sa hunahuna na lang. Kita n'yo, gibuhat kini sa siyensya, ug iya kana sa yawa. Karon moingon mo, “Mao ba, Igsoong Branham?” Oo, sir.

¹⁴⁴ Ablihan nato karon sa Genesis, 4.

Ug mipahawa si Cain gikan sa presensya sa GINOO, . . .

¹⁴⁵ Karon bantayi kung unsa ang unang gihimo niya. (Sultihi lang ninyo ako kung sa tan-aw ninyo igo na ang nahisgotan nato dinhi, tungod mohunong na ako kung asa man nga dapit dinhi.) Kita n'yo, “Mipahawa si Cain gikan sa Presensya sa Ginoo.” Didto niya nahimo ang iyang sayup. Ug dinha usab kamo makahimo og sayup, ug dinha usab ako makahimo og sayup, sa mismong minuto nga molakaw kita palayo sa Presensya sa Dios.

*. . . mipahawa si Cain . . . gikan sa presensya sa GINOO,
ug mipuyo sa yuta sa Nod, sa silangan sa Eden.*

¹⁴⁶ Kita n'yo kung unsa ka relihiyoso, miadto didto sa “Silangan” nga bahin, sa Silangan nga bahin.

Ug giila ni Cain ang iyang asawa; ug kini siya nanamkon, ug nag-anak kang Enoch: ug si Enoch nagtukod og usa ka lungsod, (kita n'yo, sibilisasyon), nagtukod siya og usa ka lungsod, ug gihinganlan niya ang ngalan sa lungsod, nga sunod sa ngalan sa iyang anak, nga Enoch.

Ug . . . kang Enoch natawo si Irad: ug si Irad na- . . . ug si Irad na- . . . [Blangko nga bahin sa teyp—Ed.]

. . . mikuha alang kaniya duruha ka asawa: ang ngalan sa usa mao si Ada, ug ang ngalan sa usa mao si Zilla.

Ug si Ada nanganak kang Jabal: ug . . . nga mao ang amahan sa mga nagpuyo sa mga balongbalong, ug nga may mga hayop.

Ug ang ngalan sa iyang igsoon mao si Jubal: (siguro, J-u-b-a-l) siya mao ang amahan . . . sa tanan nga mga nagatogtog sa mga alpa ug mga flauta. (Kita n'yo, ang musika; siyensya, kita n'yo, nagasulod na.)

Ug si Zilla, . . . usab nanganak kang Tubal-Cain, nga magsasalsal sa tanang g-a-l-a-m-i-t-o-n nga hinimo og tumbaga ug puthaw: (sa ubang pinulongan, mga paghulma, ginapangdugtong kini), ug ang igsoong babaye ni Tubal- . . . ni Tubal-Cain mao si Naamah.

Ug si Lamech miingon sa iyang mga asawa, si Ada ug si Zilla, patalinghugi ninyo ang akong tingog; kamo nga mga asawa ni Lamech, patalinghugi ninyo ang akong pakigpulong: kay gipatay ko ang usa ka tawo tungod sa pagsamad kanako, ug usa ka batan-on tungod sa pagbun- og kanako.

Kung sa pito ka higayon pagapanimalusan si Cain, si Lamech sa pagkamatuod pagapanimalusan og kapitoan. . . mga pito ka pilo, o pito ka pilo.

¹⁴⁷ Karon himatikdi, dihadiha sa ilang paggawas palayo sa Presensya sa Ginoo, misugod sila sa pagpatukod og mga siyudad, misugod sila sa paggama og mga instrumento; misugod sila sa siyensya, aron sa paggama og mga tumbaga ug puthaw, ug—ug sa pagtugtog og musika, ug uban pa. Kita n'yo? Kita n'yo? Karon asa kini nagagikan? Kinsa ang mihawa? Si Cain, ang kaliwat sa serpente. Nasabtan ba ninyo kini? [Nagaingon ang kongregasyon, “Amen.”—Ed.] Mihawa si Cain. Ug, himatikdi, mihawa siya gikan sa Presensya sa Ginoo, ug sugod namuhat diha sa siyensya.

¹⁴⁸ Karon tan-awa kung asa siya sa gihapon nagapamuhat, kita n'yo: siyensya, edukasyon, mga siyudad, kamatutoan. Mga iya kini sa yawa. Kinsay nagpasugod niini? Ang yawa. Sa kang kinsa kini sa karon? Sa yawa. Mga bomba atomika ug ingon nianang mga butang, aron pamatyon kita. Nagkinabuhi kita diha niini. Kinahanglan natong magkinabuhi dinhi. Mga tawo lang kita, kinahanglan kitang magpuyo dinhi. Apan ang halangdong sibilisasyon nga iya sa Dios walay ingon niana sa sulod niini. Kita n'yo? Ug ang ginakuha sa siyensya—ginakuha niini ang natural nga mga butang ug ginatuis kini aron buhaton ang mga butang nga wala sa plano niini nga buhaton.

¹⁴⁹ Ug ingon niana usab ang siyentipikong relihiyon! Gamiton niini ang Pulong sa Dios ug magtukod og pang-iglesiang organisasyon gikan niini, imbis nga buhaton ang mga butang nga angay'ng buhaton niini.

Moingon sila, “Milabay na man ang mga adlaw sa mga milagro.”

Nag-ingon ang Biblia, “Siya mao sa gihapon kagahapon, karon, ug hangtud sa kahangturan.”

“Wala na ma'y ingon nianang butang sama sa Balaanong pagpang-ayo.”

¹⁵⁰ “Lumakaw kamo sa tibuok nga kalibutan, ug iwali ninyo ang Maayong Balita sa tanang binuhat. Kini nga mga ilhanan maganunot kanila nga nagatoo: Sa Akong Ngalan pagahinginlan nila ang mga yawa; magasulti sila'g mga bag-ong sinultihan; kon makakupot sila og mga bitin, o kon makainom sila'g bisan unsa nga makahilo, dili kini makadaut kanila; kung pagapandongan nila sa ilang mga kamot ang mga masakiton,

mangaayo sila.” Unsa na? Kung ingon niana, tanang mga nasud, tanang mga tawo, tanang binuhat! “Ania karon, Ako magauban kaninyo sa kanunay, bisan hangtud sa katapusan sa kalibutan, sa katapusan sa—sa kalibutang *kosmos*, ang kinatibuk-an niini, hangtud sa pagtibawas.” Maanaa gayud Siya didto!

¹⁵¹ Ug karon, kita n’yo, gamiton nila ang siyensya, ug moingon, “Oh, bueno, basta lang nga nagatigum kita ug nagapa-miyembro sa iglesia, ug mamahimo kitang *ingon niini*, o mamahimong usa ka buutan og tarung nga miyembro. Ginahatag nato ang atong . . .”

¹⁵² Kita n’yo, kini—dili kini sa pag-ingon, “Oh, walay ingon nianang butang sama sa Dios.” Nadungog na ninyo ang akong teyp mahitungod sa mini nga mga cristo sa kaulahiing mga adlaw. Kita n’yo, dili mini nga Jesus (mas nasayod si Satanas kay sa niana, kita n’yo), kondili mini nga mga cristo. Ang *Cristo* nagakahulogan og “usa ka dinihogan.” Ug sa tinuod lang dinihogan sila, dinihogan (sa unsa?) sa Balaang Espiritu, aron mamuhat og mga ilhanan ug mga katingalahan. Ug ginabuhat nila kini.

¹⁵³ Apan, nakita n’yo, paghisgotan na ang sa karon, ania na kita sa kaulahiing kapanahonan, dili na nga didto pa sa kaniadtong Pentecostal nga kapanahonan. Ania na kita sa kaulahiing kapanahonan. Ug ang unang kapanahonan misugod kaniadto sa Pulong, nga mao si Cristo. Ug ang kaulahiing kapanahonan kinahanglan nga magatapos usab sa Pulong, nga mao si Cristo. Ug ang tanan niining uban pang mga butang, kining mga tipaka ug uban pa, sama sa ako nang pagpasabot, maoy mga taghatud lang sa Pulong, aron matuman ang katuyoan niini hangtud nga moabot Kini ngadto sa bug-os niyang pagka-lugas, kita n’yo, sama sa kung unsa kini kaniadto sa orihinal nga lugas.

¹⁵⁴ Karon sa ika-25 nga bersekulo.

Ug giila pag-usab ni Adan ang iyang asawa; ug kini nanganak og usa ka anak nga lalaki, ug gitawag niya ang iyang ngalan si Seth: Kay ang Dios, mungon siya, nagatudlo kanako og usa ka kaliwat nga puli ni Abel, nga gipatay ni Cain.

Ug kang Seth . . . Ug kang Seth usab, natawo ang usa ka anak nga lalaki; ug gitawag niya ang iyang ngalan si Enos: ug unya ang mga tawo nanagsugod sa pagtawag diha sa ngalan sa GINOO.

¹⁵⁵ Nakita n’yo na kung unsa nga kadtong mga kaliwat sa bitin nanggisimang paingon sa siyensya, edukasyon, mga siyudad, ug musika, ug ngadto sa dagkung mga butang, ug edukasyon, ug siyensya, ug uban pa.

¹⁵⁶ Apan ang kaliwat sa matarung, kinsay . . . Kita n’yo, walay kaliwat si Eba. Nakahibalo mo niana. Walay kaliwat ang babaye, ang inahan. Anaa kaniya ang itlog, apan dili ang binhi. Apan

kaniya. . . nagtudlo og anak nga lalaki, usa ka binhi, kita n'yo, gitudlo pinaagi sa pagkatudlo sa Dios, gisamkon niya kadto nga binhi. Ug ang halangdong Binhi, siyempre, nga gikan sa babaye, mao kadtong gihatag sa Dios. Kita n'yo, nagtudlo ang Dios og usa ka binhi kaniya puli sa kadtong gipatay ni Cain; nga, ang kaaway, ang kamatayon, gipatay sa binhi sa serpente ang binhi sa Dios, didto sa pagpangtuis kaniadto, nakita n'yo. Naghatag ang Dios, pinaagi sa babaye, og usa ka Binhi, nga mao si Cristo, kita n'yo, aron nga mahibalik ang orihinal nga binhi pag-usab. Nakita n'yo ba kini? Ug busa nakita n'yo nga ang pagtuis naghatud og kamatayon pinaagi sa edukasyon ug intelihensiya, ug sa kung unsay tawag nato sa karon nga, siyensya ug relihiyon, ug uban pa, naghatud kini og kamatayon. Apan ang babaye. . . nagtudlo og anak nga lalaki, usa ka binhi, ug dayon ang mga tawo nagsugod na'g panawag sa Ngalan sa Ginoo, ug misugod na'g balik ngadto sa Pulong pag-usab. Kita n'yo?

¹⁵⁷ Ug timan-i, subaya kana nga kaliwat, sa diha nga sundan nato kini sulod sa pipila ka semana, ang bahin niining serpente. Sundan n'yo kana, nagabalhin-balhin kini diha sa Kasulatan. Bantayi kini. Kining duha ka punoan nga dungan nagatubo, sama sa inyo nang nadungog ang akong Mensahe bahin sa “maong punoan.” Dungan silang ningdaku, ug halos magkapareho nga halos malimbongan niini ang mismong mga pinili, kon mahimo pa, sa kaulahiing mga adlaw pagmosangko na kini sa pagkabug-os na niini. Nagapamunga kini og lugas nga sama sa trigo, pero dili pa kini trigo, kita n'yo, dili. Usa kini ka tipaka, pa lang.

¹⁵⁸ Karon, tan-awa ninyo dinha: sibilisasyon, edukasyon. . . Sa tan-aw ko aduna pa ako og napulo ka mga Kasulatan, nakita n'yo, nga nahisulat dinhi, apan siguro dili ko na ipadayon kana. Apan masabtan nato pinaagi niini, nga ang edukasyon, siyensya ug ang sibilisasyon, iya gayud sa yawa. Husto kana. Dili kini iya sa Dios. Iya kini sa yawa. Karon, wala ako nagaingon nga kinahanglan dili kamo magkaaduna niana. Wala, wala gayud. Taudtaud sa pagpadayon, mahimo kong, pamatud-an nato kana; nga ang Dios. . .

¹⁵⁹ Sama na lang sa pagsul-ob ninyo og mga sinina, kamong mga kababayen-an, kitang mga kalalaken-an. Dili man unta kita kinahanglan magsul-ob og mga sinina, sa sinugdanan. Apan, kita n'yo, ingon nga nanagpuyo kita niining kapanahonan, kinahanglan nga magsul-ob kita og bisti, kita n'yo. Gisugo kita nga buhaton kana. Kinahanglan natong magsul-ob niini. Apan sa sinugdanan, dili nato kinahanglan, kita n'yo, tungod wala pa nato naila ang kasal-anan kaniadto. Apan karon kinahanglan na nato.

¹⁶⁰ Karon kinahanglan na nato nga adunay sakyanan. Karon kinahanglan natong magbiyahe ug mamisita, ug uban pa, gamit

ang mga sakyanan ug siyensya, ug uban pa, pero dili iya sa Dios. Dili kini iya sa Dios. Ang mga edukasyon, pero kini . . .

¹⁶¹ Ang iya sa Dios nga porma sa edukasyon, sibilisasyon, siyensya, ang maoy mga anaa sa orihinal nga kahimtang niini, kita n'yo, mas lagpas ang mga niini sa kung unsay mga ginabuhat nato sa karon.

¹⁶² Karon tan-awa, mokuha sila og usa ka butang ug sagolan nila kini og unsa man nga mga butang, ug mahimo kining usa ka kemikal nga makapatay. Karon kung pasagdan mo lang kini nga mga butang diha sa ilang hustong puwesto, dili ka magka-problema; pero pag-ipangsagol mo kini, magka-problema ka. Kita n'yo? Kita n'yo, nagahatud kini og kamatayon.

¹⁶³ Ug sa diha nga sulayan mong kuhaon ang Pulong sa Dios ug isagol mo Kini sa relihiyon sa kalibutan, nagahatud ka og kamatayon sa imong kaugalingon. Ginapatay niini ang si kinsa man. Nakita n'yo ang gusto kong ipasabot? Ginapatay niini ang tawo. Moingon ka, "Bueno, karon tan-awa, nagatoo ka sa Dios."

"Oh, karon, dili mo man kinahanglan motoo *niana*. Kung ikaw—ikaw—ikaw . . . ang among iglesia." Dinha mismo, mao kana ang buto nga nagapatay sa—nga nagapatay sa kang kinsa man.

¹⁶⁴ Kinahanglan nga mapadaplin ang tanan, ug saligi lamang ang Pulong. Magpabilin mismo nianang Pulong. Ayaw biyai. Pag-gisulti sa Dios nga ingon niana, ingon niana gyud kini. Dili ko igsapayan bisan unsa pa ang mapamatud-an sa edukasyon.

¹⁶⁵ Niadtong mga adlaw ni Noe, mapamatud-an man nila kaniadto nga wala gyu'y tubig didto sa kawanangan. Apan nag-ingon ang Dios nga adunay magaabot, ug miabot gayud. Husto kana.

¹⁶⁶ Nagaingon sila sa karon, "Wala ma'y kalayo didto sa itaas, nga magakatagak." Apan bantayi usa ka adlaw, mangatagak gyud kini. Uh-huh. "Unsaon man nato pagkahimo og *ingon niini* ug pagkahimo og *ingon niana*?" Bantayi ang Dios nga mohimo niini. Himoon Niya kini. Nag-ingon na siya nga buhaton Niya kini.

¹⁶⁷ Ug kanang Binhia magaturok gayud sa kung asa. Himaya sa Dios! Ang butang lamang nga ginapangita Niya, sa karon, mao ang semilyahanan niini, usa ka dapit nga maitanum Kini.

¹⁶⁸ Magasugod Kini diha sa kung kinsa man, ug ila Kining tuison, ug espreyhan Kini sama sa gihimo niya kang Eba. Misugod Kini kang Eba, aron unta siyang manamkon ug manganak og mga anak sa Dios, dili nga mga anak ni Satanas. Apan usa siya ka semilyahanan, ug naitanum kini diha sa sayup nga semilyahanan. Mao usab pag-mahulog ang Pulong diha sa usa ka dili-magtotoo, o sa usa ka maduhaduhaon, o sa dili-nagatoo. Pagahimoon sila Niini og usa ka miyembro ra sa iglesia,

apan dili gayud og usa ka anak nga lalaki o anak nga babaye sa Dios. Pagsultihan mo sila nga patag-ason ang ilang mga buhok; kataw-an ka lang nila sa imong atubangan. Pagsultihan mo sila nga buhaton *kini* o *kana*, o ang lalaki nga buhaton kini, kataw-an ka lang nila sa imong atubangan. Dili kini mga anak sa Dios. Sayup kini nga mga semilyahanan, pero bisan pa niana dala nila ang Binhi. Kita n'yo na ang mini nga mga dinihogan? Mga dinihogan sila, oo, sa Balaang Espiritu, nagasulti sa laing mga dila, ug nagapamuhat og mga ilhanan ug mga katingalahan; apan mga iya ni Satanas.

¹⁶⁹ Miingon si Jesus, “Daghan ang magaduol Kanako niadtong adlaw, ug magaingon, ‘Ginoo, Ginoo, dili ba nanagpagula man kami og mga yawa, ug—ug nakahimo og daghan, gamhanang mga buhat ug mga milagro sa Imong Ngalan?’” Magaingon Siya, “Pahalayo kamo Kanako, kamong mga mamumuhat sa kadautan.”

¹⁷⁰ Unsa man ang kadautan? Miingon si David, “Kung sa akong kasingkasing nagapalandong ako og kadautan, ang Dios dili magapatalinghug kanako.” Kita n'yo?

¹⁷¹ Ang kadautan usa ka butang nga nahibalo ka nga angay mong buhaton ug wala mo ginabuhat. Nasayod gyud ka, pero wala mo ginabuhat. Kadautan kana, kita n'yo. Nasayod gyud ka nga kinahanglan silang magpabilin sa Pulong sa Dios, pero tungod lang sa simbahan, o tungod lang sa usa ka tawo, o sa kung unsa man, mitipas ka sa Pulong sa Dios ug ginabuhat kung unsa ang ginaingon sa organisasyon. “Bueno, wala ko kabalo. Nagaingon man gud ang akong iglesia nga sa *ingon niining* paagi namo kini buhaton, ug nagatoo ako sa niining paagi.”

¹⁷² Kita n'yo, ug nakaatubang kini mismo kanimong dili mo kini angay'ng buhaton. Kadautan kana. “Pahalayo kamo Kanako, kamo nga nagabuhat og kadautan.”

¹⁷³ Tan-awa kadtong halangdon nga si San Pablo, diha sa I Mga Taga-Corinto 13, miingon siya, “Bisan kung ako magasulti og mga dila sa tawo ug sa mga Manolunda . . .” Karon kamo nga gustong, o aduna ma'y gustong, manghawid niana ingon nga mao ang ebidensiya sa Espiritu Santo? Ingon ni Pablo, “Bisan kung ako magasulti og mga dila sa mga tawo ug sa mga Manolunda, ug walay gugma” sama kaninyong tanan nga ania dinhi, “Ako walay kapuslanan.” Kita n'yo?

¹⁷⁴ Makasulti ka diha sa mga dila, oo, tungod nga Pulong man Kana. Mahimo man dalhon sa usa ka magwawali kini nga Pulong, ug magsangyaw ug iwali Kini, ug isulti kana nga Pulong, ug mahimong motubo kana nga Pulong. Pero kana nga magwawali mahimong hipokrito, mismo. Pulong gyud kini. Kita n'yo? Pero ang tinuod og buhi nga binuhat sa Dios ginadala ang kinatibuk-ang katuyoan, ang Pulong. “Ang tawo mabuhi dili sa tinapay lamang, kondili sa matag pulong nga nagagula.” Ug

pag-dugangan mo og unsa man Kana, magkaaduna ka og tinuis nga tanum.

¹⁷⁵ Kung mosugod ko'g tanum dinhi og trigo, ug motanum usab ka og usa—usa ka amorseko dungan niini, ug sagol nga ipaliwat kining duha, kung mahimo kini pinaagi og pollen, ug itanum kini dinha, aduna na ko'y trigong amorseko. Kita n'yo? Mora og trigo kon tan-awon, ug bisan pa niana amorseko kini. Dili kini og tinuod nga kinabuhi, dili niini mapadaghan ang kaugalingon niini. Kita n'yo? Motubo kini, pero dili kini mismo makapanganak.

¹⁷⁶ Ang—ang—ang asno makapaliwat sa usa ka bayeng kabayo, ug manganak kini og mula, apan ang mula dili makapanganak og mula na usab. Usa kini ka hybrid.

¹⁷⁷ “Tugoting mamunga ang matag pulong sa iyang matang niini.” Kita n'yo, makapaliwat kadto diha sa usa ra ka higayon. Ug ang iglesia mamahimong usa ka organisasyon, sa usa ra ka higayon, pero dili na mapaliwat ang kaugalingon niini ingon nga iglesia pag-usab; ang maipanganak lang niini usa na usab ka organisasyon. Dili mahimong manganak ang Lutheran og Lutheran; nanganak kini og Methodist. Ug ang Methodist nanganak pud og Pentecostal. Kita n'yo, dili na mahimong ipadaghan ang kaugalingon niini, tungod nga patay na kini. Dili na kini makapasugod og rebaybal. Asa man ang Dios sukad nagpasugod og rebaybal diha sa usa ka organisasyon? Baliki ang inyong kasaysayan. Wala gayud Niya gihimo kana sukad-sukad. Organisasyon ang nagakaporma pagkahuman sa rebaybal.

¹⁷⁸ Sa dihang si Luther, nga tawo sa Dios, miabot nga dala ang mensahe sa pagpakamatarung, pagkahuman niya natukod ang iglesiang Lutheran. Dili na gayud sila makabangon pa.

¹⁷⁹ Dayon nagpadala ang Dios og usa ka tawo nga ginganlan og John Wesley, dayon misunod ang usa ka rebaybal. Unsa man dayon ang ilang gihimo? Nag-organisa. Dili na gayud maipaliwat ang kaugalingon niini pag-usab. Kita n'yo, baog na kini.

¹⁸⁰ Hallelujah! Apan ang Pulong sa Dios magapadayon sa walay katapusan! Husto kana. Magapanganak Kini ingon sa Iyahang matang.

¹⁸¹ Miabot ang mga Pentecostal, dili usab kini makahimo; tan-awa kung unsa ang gibuhath niini, nag-organisa. Dili na mapaliwat ang kaugalingon niini. Mahimong aduna sila og mga Oral Roberts ug tanang uban pa, sa tibuok nasud, dili niya sa gihapon mahimo. Magapabilin kini sa daan na niyang pagkamula. Dili na makapaliwat pa! Bisan pila pa ka mga pagpa-indyeksyun aduna kini, mao lang kini sa gihapon; bisan pila pa ka espirituhanong mga pagpakig-relasyon nga aduna kini, ug unsa pa man, kini. . . . Kamo, karon ingon nga mga hamtong na man mo, kabalo na mo kung unsay akong ginahisgotan. Bisan pila pa ka bana ug asawa nga aduna kini, ug unsa pa

man, ug bisan unsa pa ka daghan nga gagmay'ng mga igsoong kasimbahanan ang matukod gikan dinhi, ug gagmay'ng mga iglesia ug mga organisasyon, dili kini makapanganak og usa ka rebaybal. Tapus na kini. Mitabok kini ngadto sa kalibutan, palayo sa Pulong sa Dios, ug dili na usab mapaliwat ang kaugalingon niini. Ang Dios magpatungha na usab og laing butang ug padayon na usab palihokon ang Iyang Pulong; ug kung mag-organisa kini, mamatay pud kini! Husto kana. Dili na mapaliwat ang kaugalingon niini, tungod nga hybrid na kini. Husto gyud kana.

¹⁸² Tan-awa ang inyong hybrid nga mais sa karon, moingon sila, “Kana ang pinakamaayo nga mais.” Kini—usa kini ka makapatay. Mao kana ang nagapatay kaninyo. Wala gihimo ang inyong kinabuhi para nga . . . Wala gihimo ang inyong lawas para niana. Gihimo ang inyong lawas para lang sa orihinal nga lugas. Mao kana ang hinungdan nga ang mga amahan ug mga inahan ninyo kaniadto, ug uban pa, nangabuhi nga mas dugay. Mao kana ang hinungdan nga mga malig-on sila. Ang lalaki kaniadto, setenta ug otsenta na ka tuig ang panuigon, pero mas lig-on ug kusgan pa. Kita n'yo, kay natural man nga mga pagkaon ang ilang ginakaon. Tan-awa ninyo kining edaran na nga lalaking taga-bukid dinhi, nga lagsaw ra ang ginakaon ug—ug orihinal nga mga lugas. Paanhia usab ang usa ka lalaki, nga taga-siyudad; ania siya nga paanhi na, nanghupong sa katambok, mga trayntay-singko, kuwarenta ka tuig pa lang gani ang panuigon. Mahuyang? Sigurado gyud! Bueno, biyaan ko na kini nga hilisgotan, kaha?

¹⁸³ Himatikdi, ginapaninguhaan ko lang nga masabtan ninyo, nga sibilisasyon kana, kanang gitawag nato nga kamatutoan. Kamatutoan, madungog nato kana sa makadaghang higayon. Karon, inyo na bang nadungog kung unsa ang akong tan-aw kung unsa kining kamatutoan? Tawo kini nga wala man lang kaisog nga mopatay og rabbit, pero busog gyud siya nga mokaon niini human nga gipatay na kini sa ubang tawo. Busa, ako, ingon niana ang akong—akong—akong—akong tan-aw niining kamatutoan, nakita n'yo. Kana, husto kana, kita n'yo. Wala kita'y . . .

¹⁸⁴ Wala nagaanhi ang Dios para sa . . . Dili *kamatutoan* ang nagadala sa tawo ngadto sa Dios. Wala mo *ginahimong-sibilisado* ang tawo aron mapaingon sa Dios. Natawo siya, ingon nga usa ka binhi sa Dios, nagagikan sa Dios, nga kanunay iya sa Dios, ug dili gayud mamahimong uban pa gawas sa Dios. Wala ka gi-edukar pasulod Niini.

¹⁸⁵ Karon, aduna usab siya og iyahang matang sa Eden, ug pinaagi kini sa tinuis nga binhi! Naghimo si Satanas sa iyahang daku, og iyahang dakung Eden karon. Unsa man kini? Kamatutoan, siyensya, matahum nga mga kasimbahanan, hataas nga mga tore, binansay nga mga magwawali, edukasyon:

“DA., D., Ph.D., LL.D., Doktor sa Literatura, Doktor sa Dibinidad, mga Doktor!” Sa matag higayon nga ilitok mo kana, samot siya nga ginapahilayo niini gikan sa Dios, bug-os siyang ginapahilayo. Ug ang kongregasyon dili gustong may motindog dinha ug mogamit og mga pulong nga “hit, hain’t, ug tote, ug carry, ug fetch.” Dili sila gusto niana. Gusto nila og butang nga matahum.

¹⁸⁶ Mao mismo kana nga butang ang atua sa hunahuna ni Cain (ang ilang tatay, sa sinugdanan), naghalad og mga bulak ug mga prutas nga abot sa yuta, niadtong nagkinahanglan ang Dios og halad, pero ang tawo nga may kapadayagan sa Dios: ang dugo kadto! Dili nga peras, o melokoton, o sirwela, o unsa man kadto, o, usa ka apricot, sama sa ginaingon nila sa karon: dugo ang maoy nagpalayas kanato pagawas sa tanaman sa Eden, usa—usa ka dugo nga mikunhod ang kalidad niini, usa ka babaye nga gipahanugotan ang usa ka personang dautan nga maitanum ang binhi niini sa iyang tagoangkan ug aron masugdan kadto.

¹⁸⁷ Karon makita nato, sa pagpamatuod nga untop gayud sa panahon ang maong Mensahe, kining ginahisgotan ko, aron pamatud-an kini, tan-awa ninyo kining mga adlaw sa mga pagpang-hybrid sa karon, sa pagpaninguha nga makahimo og mas matahum nga kaliwat. Tan-awa ang maong pagpang-hybrid. Tan-awa ang mga katanuman. Dinhi lang sa miaging tig-init. . .

¹⁸⁸ Kini lang nga ting-init, nga nahitabo kini, aduna ko og gamay’ng bulak (may gipakita siya kanako kaganina lang, mao nga nadumduman ko kini), usa ka gamay’ng bulak nga aduna ko duol sa higdaanan, nga kinahanglan kong bisbisan duha ka beses sa usa ka adlaw, aron kini mabuhi. Usa kini ka hybrid. Pero gikan kini sa usa pa ka gamay’ng dalag nga bulak, nga gipaliwat ngadto sa usa pa ka lahi nga bulak, aron mamahimo kini nga bulak.

¹⁸⁹ Ug aduna kanang gamay nga bulak dinha, sa dihang, bisan mokutkot ka og napulo ka pye sa yuta niini ug wala gyud ka’y makita og igong umog man lang sa talutho. Kita n’yo, kadto—kadto—mitubo lang gyud kadto sa abog, ug pagkatahum sa gihapon, ug dili man lang kinahanglan bisbisan. Orihinal kini. Dili kini hybrid. Walay bisan unsa man nga nakasagol niini, usa kini ka tinuod gyud nga bulak.

¹⁹⁰ Ug kining sinagolan, kinahanglan pang bisbisan ug amuma-amumahon, ug bebe-bebihon pa. Kita n’yo? *Kini* pud dili na kinahanglan; walay insekto nga makataput niini. Kinahanglan pa natong espreyhan, ug tanan nang uban pa, aron abogon; ang mga dangan ug mga tagnok ug ingon nianang mga butang, palayo nianang usa. Kung dili mo abogon, patyon siya sa mga niini.

Dili mo na kinahanglan pa, dili makaduol ang tagnok kaniya!

¹⁹¹ Oh, ingon niana ang lunsay, tinuod, natawo-pag-usab nga Cristohanon. Mahimo mong tintalon siya sa bisan man nga gusto mo. Cristohanon siya sa gihapon. Tintala siya sa bisan asa nga gusto mo, Cristohanon siya sa gihapon.

¹⁹² Adunay usa ka gining gikan sa simbahan usa sa mga igsoong lalaki dinhi, usa sa inyong mga miyembro, gipadalhan ako og sulat sa ilang simbahan sa miaging adlaw. Miingon, “Dili man gud gusto ni daddy nga moadto ko sa usa ka baseball...o sa usa ka dula sa basketball, Igsoong Branham. Nagatoo man gud kami. . .” Ingon niya, dose ka tuig ang panuigon, miingon, “Igsoong Branham, nagatoo kami nga anaa kanimo ang Pulong sa Ginoo, bisan unsa man ang isulti mo kanamo sa karon.” Miingon, “Medyo tan-aw ko nga sayup si daddy. Apan,” ingon pa, “unsa ma’y imong isulti, toohan ko.” Karon, pagkamalulot kana nga batang babaye, kita n’yo.

¹⁹³ Busa sa hunahuna ko. “Bueno,” ingon ko, “palangga, tan-awa kung usa ikaw ka Cristohanon, Cristohanon ka bisan asa. Bisnasa ka man, Cristohanon ka sa gihapon. Apan,” ingon ko, “nakita mo, diha sa basketbolan, ang ginahunahuna ni daddy, nga madungog mo ang mga bata didto nga nagapamalikas ug mamuhat nga dili-angay nga sama niana. Motoo ko sa gihapon nga Cristohanon ka. Apan, nakita mo, mas taas na man gud ang sinati ni daddy sa kinabuhi kay kanimo. Kita mo?” Karon, ingon ko, “Karon dose anyos na ang imong panuigon, ug ingon mo nga aduna ka’y manghod nga babaye, nga upat pa ka tuig. Karon gusto niyang mohimo ka og papel nga munyeka. ‘Oh, ikaw na lang, wala na ko’y panahon nga manghimo og mga munyakang papel.’ Kita mo, mas hamtong ka na kay sa manghod mong babaye.”

¹⁹⁴ Karon dinha na nga kahimtang unta ang iglesia sa karon, nga mas hamtong na diha sa Pulong sa Dios. Dili nga Methodist, Baptist, Pentecostal, Presbyterian; kondili mas hamtong na diha sa Pulong, aron nga mamahimo nang mga anak nga lalaki ug anak nga babaye sa Dios. Uh! Sige. Sige. Ang Mensahe ingon sa iyang panahon gyud, napamatud-an.

¹⁹⁵ Tungod sa siyensya, pinaagi sa iyang siyensya ug mga pagtuki, nakita n’yo, ginapaninguhaan nila nga tuison ang tanan, maghimo og lahi nga binhi, maghimo sa kung unsa nga lahi gayud, patahumon kini.

¹⁹⁶ Tan-awa ang atong igsoong mga babaye. Nakasulti ako kaganina, mahitungod sa kung unsa sila katahum. Oh, mahimo mo silang ipatindog diha sa pang-tibuok kalibutang indigay sa kaanyag uban sa niining mga Gloria Swanson, o pila sa niining mga paghubo-hubo ug ingon nianang mga butang didto sa California, ug minilyon ka milya silang mangapildi. Apan ang

ilang ngalan wala man nakasulat nianang libro sa kabantogan; nakasulat kini sa Libro sa Kinabuhi, kita n'yo. Uh-huh. "Ang maaghop ug mapainubsanon nga espiritu daku nga bahandi sa atubangan sa Dios." Ug ang giingon sa Biblia para sa—para sa atong kababayan-an mao nga "ilang paanyagon ang ilang kaugalingon pinaagi sa maaghop ug mapainubsanon nga espiritu, magpasakop sa ilang mga bana, ug ang pagkamalulot." Mao kana ka bililhon uyamot sa atubangan sa Dios. Kita n'yo? Husto kana.

¹⁹⁷ Dili niining tanan nga ania dinhi, ingon niana ang gibuhat nila; sila, ang Max Factor, gipaanyag ang mga kababayan-an, sa panggawas, nga maoy iya ni Satanas. Ang tanan nga ingon niana iya sa yawa. Nakahibalo ba kamo niana? Mao gyud. Iya kini tanan sa yawa.

¹⁹⁸ Karon madumduman ko ang akong asawa niadtong maanyag siya ug bata pa, wala siya nagapang meyk-ap. Wala. Miduol siya niadto, gibautismohan ko siya sa Ngalan ni Jesus, niadtong nagsul-ob pa siya niadto og hangtud tuhod nga mga sinina nga sama *niana*, kita n'yo. Apan karon nagkatigulang na siya, ingon niya, "Ningkunot na gyud ko og ayo."

¹⁹⁹ Ingon ko, "Kabalo ka, samtang nga nagkatigulang ka, nagkahanap na pud ang akong mga mata. Mahinumduman ko kung unsa ka kaniadto, ug mahinumduman ko ug nasayod sa akong kasingkasing kung mamahimong unsa ka sa umalabot. Kita n'yo? Kita n'yo? Kita n'yo, tungod sa makigdaiton ug malulot nga espiritu nga aduna ka, ipagtagbo kita sa Dios didto pag-usab. Ingon niana kana, dayon dili na gayud kita mangausab pa." Busa nganong. . .

²⁰⁰ Apan, nakita n'yo, niadtong mga adlaw ni Noe, sa diha nga nakita sa mga anak nga lalaki sa Dios ang mga anak nga babaye sa mga tawo, nga mga maanyag, gipanguha nila silang mga kababayan-an, ingon nga mga asawa. Kita n'yo, nakita sa mga anak nga lalaki sa Dios ang mga anak nga babaye sa mga tawo, tungod nga ang mga niini seksi ug—ug nanagbisti og ingon niana. Sila, ang maong mga lalaki nangibog sa maong mga babaye, ug gitinguha nila sila, kita n'yo.

²⁰¹ Mapasalamaton ako nga kamo nga mga anak nga lalaki sa Dios milantaw nga lagpas pa niana, kita n'yo, kung ginaunsa na pagpresentar sa mga kababayan-an ang ilang kaugalingon. Kita n'yo?

²⁰² Apan unsa man kini? Mga pagpaanyag kini tanan. Pagpang-hybrid kini. Tan-awa na lang ang uban kanila, bisan hugasan pa ang ilang nawong, sila. . . dili mo mahibal-an kung unsa na'y anaa kanimong. Kita n'yo? Ug husto kana. Mahimong mga mainit ang ulo nga makig-away sama sa nagahagonghong nga gabas, ug—ug mahilas, ug—ug badlongon, ug malaw-ay, ug magkiniat sa ubang lalaki.

203 Dili ko igsapayan kung unsa man, ang akong asawa, ako—nagarespeto gayud ako og pagkamaunongon sa bisan kinsa man nga babaye. Niadtong bata pa ako, kanunay kong ginaingon, “Kung ang negro nga babaye gusto niyang magmatinuuron, bisan iulâ ko pa ang kaulahi-ang tulo sa akong dugo aron lang nga mahipadayon siyang ingon niana.” Kita n’yo, ginarespeto ko kung unsay husto, ang butang nga husto. Naninguha akong magkinabuhi nga ingon niana, sa tibuok kong kinabuhi. Batanon pa ako kaniadto, bisan karon nga tigulang na ako, wala ako nagbag-o ni gamay sa akong mga pangisip. Kita n’yo?

204 Siyensya, sa mao rang pamaagi nga gibuhat kaniadto kang Eba, iya usab gibuhat sa iglesia, gituis kini. Ginapahigayon niya sa karon ang iyang mga plano, pinaagi sa iyang hybrid nga iglesia, sa iyang modernong Eden nga aduna kita karon. Nagapuyo kita karon sa usa ka siyentipikong Eden, Eden ni Satan, usa ka siyentipikong Eden.

205 Kung gusto ninyong buksan kini, diha sa Isaias 14:12. Iktulo ko kini kaninyo, kung gusto ninyo, kung gusto ninyo, sa 12 ug 14....

...miingon si Satan sa iyang kaugalingon,
Mokayab ako ibabaw sa pinaka-Hitaas.

Nga magkaaduna siya og usa ka gingharian, nga mahitabo nga bisan ang anak nga mga lalaki sa Dios magasimba kaniya.

206 Ug ingon niana eksakto kung unsay iyang gibuhat. Gibuhat niya kini pinaagi og iglesia, relihiyon, sama sa gisugdan niya kaniadto sa sinugdanan, relihiyon. Nahimo niya kini.

207 Sama usab sa nakita ni propetang Pablo, diha sa II Mga Taga-Tesalonica sa ika-2 nga kapitulo, nga niini—nga pagapangulohan ni Satan diha sa E...ang iyang, ang dakung siyentipikong Eden sa niining panahon, diha sa siyensya, sa edukasyon ug sibilisasyon. Ug naghimo siya, sa iyang kaugalingon, ug nga magasanko kini ngadto sa ekuminikanhong konseho, kon diin ang tanang kaglesiahan magayukbo na kaniya. Ug makita n’yo ba kung unsa kini? Espiritu kana sa pagkahisalaag nga nagalihok diha sa mga tawo; ang mga anak nga lalaki sa Dios, nga gibuhat diha sa dagway sa Dios; ug mga anak nga babaye sa tawo, nga gibuhat diha sa dagway sa tawo; nalimbongan sila nga mapailalum sa kabakakan, sama sa iyang gibuhat kang Eba. Ug nakahimo, alang sa iyang kaugalingon, tungod sa iyahang mga paagi sa siyensya ug edukasyon ug kamatutoan, hangtud nga nakatukod siya sa iyang kaugalingon og usa ka modernong, siyentipikong, Eden sa kamatayon.

208 Nga, ang Dios, pinaagi pud sa Iyang Pulong, gilitok lang, ug nagkaaduna Siya og Eden kon diin walay kamatayon; walay

siyensya, walay edukasyon sama sa aduna kita karon, o walay sibilisasyon.

209 Nakita n'yo na ba kini karon, nasabtan ba kini? Kita n'yo, karon aduna si Satanas og iyahang Eden. Tan-awa, ang mga kaiglesiahan nga nagasimba na kaniya. Kana sa... Ikaduhang Mga Taga-Tesalonica dinhi, nga giingon Niya.

...kanang tawhana nga nagapatawag sa iyang kaugalingon nga Dios, nagalingkod *sa templo sa Dios,...*

Ug ang tanan...sa yuta magayukbo ug magasimba kaniya, kinsang mga ngalan wala mahisulat sa basahon sa kinabuhi nga iya sa Cordero...sa wala pa ang pagkatukod sa kalibutan.

210 Kita n'yo, usa kini ka modernong Eden. Karon unsa man ang iyang ginabuhay, siya mismo? Nagalihok na siya mismo, ang Roma, ang daku og katapusan niyang kan-anan, lugar nga Eden.

211 Nakita n'yo ba kung asa mipaingon ang papa pag-anhi niya dinhi sa miaging adlaw? Nahimatikdan n'yo ba kining numero trese nga nangahitabo niadtong tungora? Nagsulti siya og trese ka pulong, trese ang miambit sa komunyong, nagsulti didto sa Yankee Stadium, nga trese ang numero. Ang tanan trese.

212 Ug trese ang numero sa atong nasud, nga makita diha sa ika-13 nga kapitulo sa Pinadayag; trese ka raya, trese ka bitoon, trese ka bara, trese ka mga numero diha sa mga pilak, trese ka mga bitoon diha sa salapi, ang tanan trese, ug ingon nga usa ka babaye.

213 Ania ang papa, ang ulo, nga nagaabot ngadto sa babaye; ang dautang anticristo ngadto sa mini nga pangasaw-onon, nga iya sa siyensya. Nga, ang atong kalibutan, ang atong Amerikanhong sidlananong kalibutan dinhi, o Kasadpanong Kalibutan, maoy nanguna sa kalibutan, diha sa siyensya. Mianhi kaniya, diha sa iyang siyentipikong iglesia, ug karon ang tanang mga Protestante nagayukbo na kaniya, kita n'yo, diha sa trese. Nakita ba ninyo kini? Ang tanan diha sa trese. Ang atong tibuok nasud, ang tanang uban pa, maoy trese, usa ka kalibutan nga iya sa babaye. Kita n'yo, ania kita, aduna kini kanato. Nahimo kining kalibutan nga iya sa babaye diha sa maong tanaman sa Eden, apan mamahimo kining kalibutan nga iya sa Dios sa umalabot. Himatikdi karon.

Karon, usab, gisulti na kini daan sa kaniadtong mga propeta ug ingon nianang mga butang.

214 Ug karon ang tanan misangko balik sa kung unsa kini kaniadto sa wala pa ang Dios naglihok ibabaw sa yuta, nahimo kini nga usa ka espirituhanong kagubot. Siguradong, mao gayud.

215 Ania himatikdi ang ikaduhang Eden nga gitipo nga halos kapareho sa nauna, nga malimbongan, halos bisan ang mga Pinili. Himatikdi karon, kana. Mangkumpara ako dinhi, sa pila lang ka minuto. Karon kinahanglan ko nang mohunong, tungod nga alas onse na, ug busa paminaw. Kining duha ka mga Eden, kung unsa nga kini nga Eden nagtipo, sama lang sa gibuhat ni Satanas sa sinugdanan, ngadto kang Eba didto sa tinuod gyud nga Eden, sa nahaunang Eden. Bantanyi kining duha, nga gikakumpara karon. Kita n'yo, nakuha na nato kini, karon klaro nang nasabtan sa tanan, nga usa ka siyentipikong Eden ang atong ginapuy-an karon. Kita n'yo? Karon, dili kini Eden nga iya sa Dios.

216 Ang Eden sa Dios wala nagaabot pinaagi sa siyensya, edukasyon, kamatutoan. Nagaabot kini pinaagi sa Pulong, kita n'yo, nga ginatawag ang tanan niining mga butang ingon nga nagalungtad bisan nga wala nagalungtad. Ug himatikdi, didto sa tanaman sa Eden. . . Medyo ikumpara lang nato sila. Karon himatikdi.

217 Ang lalaki ug ang iyang asawa (ang ulo sa. . . sa tanaman sa Eden), ang maong bana'g asawa hubo ug wala mahibalo niini. Husto ba kana? Didto sa Eden sa Dios, ang maong magtiayon hubo ug wala mahibalo niini.

218 Karon hubo na usab sila ug wala mahibalo niini, Pinadayag 3, sa Kapanahonan Sa Iglesiang Laodicea.

Kay ikaw . . . hubo, makalolooy, kabus, alaut, buta, ug mahibalo niini.

219 Karon, diha sa Eden sa Dios, mga hubo sila kaniadto ug wala mahibalo niini. Ug karon sa Eden ni Satanas, tungod man kini sa siyensya ug edukasyon, hubo na usab sila ug wala mahibalo niini. Grabeng pagkatuis!

220 Tan-awa ninyo sa karon. Tan-awa ninyo ang lalaki, naninguha nga isul-ob ang bisti pang-ilalum sa iyang asawa; ug ang asawa usab naninguhang isul-ob ang sinina sa iyang bana. Ug ginapataas sa lalaki ang iyang buhok awat-awat sa babaye; ug gipaputol pud sa babaye ang iyang buhok nga sama sa lalaki. Oh, oh, oh, grabe! Ang lalaki gustong mamahimong babaye, ang mga babaye gusto pud nga mamahimong lalaki, pagkatinuis gayud!

221 Mao sa gihapon ang ginabuhat sa iglesia, ingon niana usab, ang Kapanahonang Laodicea. Himatikdi.

222 Ang hinungdan nga wala sila mahibalo nga hubo sila kaniadto, sa sinugdanan, aduna didto ang Balaang Espiritu nga nagatabil kanila gikan sa pagkahubo. Wala sila mahibalo niini. Natakpan sa Balaang Espiritu ang ilang mga mata, wala sila'y bisan unsa man nga nakita kondili ang ila lang igsoong lalaki ug igsoong babaye, kita n'yo. Sa mga balaod, wala sila mahibalo nga hubo sila. Tungod sa Balaang Espiritu!

223 Karon ang espiritu sa di-pagkabalaan, pagkamahugaw ug kailibgon, maoy nagtabil kanila; ang edukasyon, siyensya, “Aba, siyentipiko kini. Ang pagsul-ob og mga short, mas bugnaw man gud.” Mas tudloan pa mo sa mga Indian kay sa niana. Ginaputos nila ang ilang kaugalingon sa habol, aron mairkundisyonan, kita n’yo, ug ginasul-ob nila kini. Kita n’yo, wala gyu’y duhaduha nga gibalik sila sa edukasyon ngadto sa panahon, ngadto sa mismong butang nga abi nila naghatud kanila sa kamatutoan ug sibilisasyon, pero gibalik diay sila ngadto sa pagkawalay-hibangkaagan, mas samot ka grabe kay sa una nilang kahimtang.

224 Pag-eskwela, edukasyon, tan-awa na ang mga eskwelahan! Tan-awa ninyo didto sa unibersidad, sa miaging gabii lang, kadtong mga batan-ong lalaki! Kung pila na ka buok nga mga bata ang natawo sa niining mga dalaga didto, sa kadtong mga dalaga matag tuig sa maong unibersidad! Hunahunaa n’yo! Moingon mo, “Mga basura kini sa kadalanan.” Ug kining batanon pa nga mga lalaki, og silang mga “twenty-one jewels,” sama sa tawag nila kanila, nga mga dalagang naka-lipstick, ug—ug naka-bangs ang mga buhok, ug may mga nakalukot pa sa ilang buhok nga mga pangkulong ug naga-istambay didto. Nag-ingon sila niana. Ug mga hugaw hangtud liog, pagkahugaw! Moingon mo, “Bueno, mga bugoy lang kana sa dalan.” Mao ba? Mga estudyante kini sa unibersidad.

225 Nangahubog sila, kagabii. Ug wala man sila’y nahibal-an kung unsay buhaton, ug busa, aron malingaw. Ug sa ilang pag-inum-inom ug mga kahilasan, ug tanan na nga sama niana, dili pa kadto igo alang kanila. Nangbuak sila og mga botelya, ug nangadto sa pultahan sa mga babaye, ug nanuktok didto sa pultahan; paggawas nila, gipangsumbag sila sa nawong. Bug-os gyud nga nadaut ang mata sa usa ka babaye, ug daghan pa kanila ang nangabalihan nga dili na maayo hangtud sa hangtud. Sa dahum n’yo ba ibutyag nila kana? Dili.

226 Ang duha sa ilang estudyanteng lalaki naglakaw-lakaw didto sa dalan, ug adunay duha ka batan-ong minyo na nga mga babaye ang nagalingkod didto ibabaw—ibabaw sa hagdanan, ug ilang gipang-insulto ang maong mga babaye. Gipangdakup sila sa mga pulis ug gibilanggo. Miadto na lang didto ang ilang dean. Ug ang maong butang nagasamut pa sa nianang unibersidad, mao na lang kana ang ginabuhat nila dinha. Miingon, “Mga estudyante ko sila. Buhii sila.” Gibuhian nila sila.

227 Tan-awa ninyo; sibilisasyon, edukasyon, ang paignan kamatayon ug kagubot, ug impiyerno. Ayaw gayud pagpatalinghug nianang butanga. Himatikdi karon.

228 Si Eba kaniadto medyo misilip lang og gamay, aron makita kung unsa gyud ang hitsura sa kalibutan. Kabalo mo, sa makadaghang higayon, “Medyo mosul-ob-sul-ob pud ta og mga

ingon niini.” O, kabalo na mo kung unsay akong pasabot, medyo mosilip lang og diyutay, aron makita lang. Karon diha sa San Juan o . . .

²²⁹ Nahaunang Juan 2:15, nag-ingon ang Dios, “Dili ninyo higugmaon ang kalibutan o higugmaon bisan ang mga butang nga anaa sa kalibutan, kay ang gugma sa Dios dili maanaa kaninyo.” Ang mga butang nga anaa dinha sa gawas patay. Gisirkunsisyon na kamo, giputol na gikan niini. Wala na kamo’y gusto sa mga butang nga iya sa kalibutan, patay na kamo niini. Mga patay kini. Ayaw na ninyo sa bisan unsa man nga patay. Dunot na kini. Baho na kini. Magustohan pa ba sa usa ka buhi ang butang nga pagkahugaw na nga sama niana? Kita n’yo, buhi kamo diha kang Cristo. Ang Pulong ang maoy nagapahimo kaninyo nga buhi.

²³⁰ Grabe, pagmahunahunaan ko kini sa niining panahon nga atong gikapuy-an, kining gitawag nga edukasyon! Dili ka na gani makawali sa pulpito gawas kung aduna ka’y Digri sa Pagka-Doktor, ug uban pa.

²³¹ Nagpahinumdum kini kanako mahitungod sa usa ka kapilyan, usa ka higayon, pagkagawas niya sa pagkasundalo. Miingon siya—mingon siya, “Igsoong Branham,” (Pagkahuman mismo kadto sa Nahaunang Giyera Pang-kalibutan.) miingon, estorya sa maong kapilyan, “miagi niadto ang sarhento ug giingnan ko, ‘Kapilyan, gusto mo bang mouban kanako didto sa unahan gyud sa pakiggubat, didto sa Argonne,” didto kana unahan pa sa La Salle, Lorraine, didto sa France, kabalo na mo. Ug ingon niya, “Paingon na ako didto sa kalasangan sa Argonne.” Ug ingon pa, “Ginaihap niya niadto kung unsa ka daghan na nga mga tangke-de-giyera ang nanggibuto.”

²³² Ug ingon, “Buntag kadto sa Pasko sa Pagkabanhaw.” Ingon pa, “Bag-o ko pa lang. . . Miadto ako didto nga uban ang usa ka nars, ug nanghatag siya niadtong nasamdan nga mga sundalo, og American rose, kabalo na mo, kanang naandan na sa Amerika. Gikuptan dayon sa mga sundalo ang kadtong rosas, ug basta na lang misiyagit ug mihilak, tungod nga kabalo sila nga gikan kadto sa ilang lugar.” Kita n’yo, gikan kadto sa ilang lugar.

²³³ Ug sa hunahuna ko ingon niana usab sa Pulong, kita n’yo, kupti Kini dayon, “Oh Dios!” Nagagikan Kini sa atong Puy-anan, kita n’yo.

²³⁴ Miingon, “Pagkamaanindot ang gibati ko *sulod* sa akong kasingkasing. . .” Ingon niya, “Migawas ako didto ug miingon. . . Ug ang—ang kapitan miadto didto aron ihapon kung unsa ka daghan na nga mga tangke-de-giyera ang nabungkag, ug mga butang nga ingon niana.” Ingon pa, “Miingon ang Balaang Espiritu, ‘Adtoi kanang gamay nga bato.’” Ug gilantaw niya kono didto. Miingon, “Nangsabwag sila niadto og mustard ug chlorine gas ug,” ingon pa, “nangasunog gyud ang tanang mga

dahon sa mga kahoy. Wala gyu'y ni usa ka butang nga buhi ang nahabilin, ug ania karon Pasko sa Pagkabanhaw pa gyud!” Ingon niya, “Grabe man nga Pasko sa Pagkabanhaw! Grabe man nga Pasko sa Pagkabanhaw, nga wala man lang ni sagbot diha sa yuta, wala gyud bisan unsa man lang!” Ug miingon nga adunay sa Usa ka butang nga nagapadani kaniya ngadto sa maong bato. Iya konong giibot didto kini nga bato, miingon, “Aduna man diay og usa ka gamay'ng bulak sa Pasko sa Pagkabanhaw ilalum niadto, nga padayon nakatago ilalum sa maong bato, bisan pa sa tanan niadtong hilo nga gas.” Ug miingon, “Napamalandongan ko, ‘Oh Dios, itago ako ilalum sa Bato sa mga Kapanahonan, hangtud nga nakalabay na ang tanan niining mga hilo, ug tugoti akong mamulak didto nianang Yuta.”

²³⁵ Puede na kita nga mohunong dinhi, kung gusto ninyo, tungod ako—aduna pa ako og daghan nga nahibilin dinhi, nga dili ko na gyud mahisgotan, bisan unsaon pa, kita n'yo, bahin sa niining mga butang. Busa tingali mobalik na lang ako ug ihatud kini kaninyo.

²³⁶ Oh, bag-o ra ko nahuman og wali sa miaging adlaw, “*Salaan Sa Usa Ka Tawong Nagahunahuna*,” kinahanglan ninyong tanan nga mabasa Kana, kita n'yo, “nagahatag kini og panilaw nga iya sa usa ka tawong balaan.” Hunahunaa, mga igsoon. Unsa man ang inyong pagabuhaton, hunahunaa usá! Mga Taga-Efeso 5:26, giingon dinha.

²³⁷ Ug nahisgotan nato, nahisgotan ang mahitungod sa pulong nga *gipili-nang-daan*, nakita n'yo, nga nakapandol sa daghan kanila. Pulong kini sa Dios. Siya, gigamit Niya kini, “kay kita gipili-nang-daan sumala sa Pulong sa Dios.” Ug kini, sa niana kita'y . . . Pag gipili-nang-daan ka, aba, kinahanglan matuman gyud kini, tungod ingon niana na kini. Ang Dios, gipili ka sa Dios tungod nga nasayod na Siya sa sinugdanan pa lang kung unsay buhaton mo.

²³⁸ Ug ayaw pahanugoti ang yawa nga i-esprey niya kaninyo ang edukasyon ug hilo, ug butang nga sama niana, “Kinahanglan mamahimo kang moderno. Kinahanglan mamahimo kang *ingon niini*.” Dili ka kinahanglan mamahimo og unsa man gawas nga mamahimo lang nga anak nga lalaki ug anak nga babaye sa Dios. Ug kung natawo ka sa Pulong, mamahimo gyud kang anak. Himatikdi kana nga esprey. Kung mokuha ka og usa ka binhi, maayong binhi, ug espreyhan mo kini, kini—patyon niini kini. Ug sa dihang i-esprey nila kining denominasyonhong butang diha kanimo, gubaon niini ang impluwensiya sa orihinal nga Pulong. Kung sultihan ka nila, “Kinahanglan mong buhaton *kini*. Aba, ginabuhat gani kini sa ubang mga babaye. Ginabuhat gani kini sa ubang mga lalaki.” Ayaw gayud toohi kana. Gubaon niini ang impluwensiya sa Dios sa Iyang Pulong diha kanimo. Kabalo mo niana.

239 Nagaingon ang atong teksto, “Ayaw’g pagpahiyun,” pagpa-espren, “kondili usba,” kanang binhi nga anaa sulod kanimo.

240 Ang mga tawo sa karon nagalihok nga daw sa wala gani sila nagatoo nga adunay Dios. Nakahibalo ba mo niana? Nagalihok sila nga sama niana. Karon, dili ko gustong tawgon sila ingon nga mga buangbuang, apan nagalihok sila nga mora og ingon niana. Tungod, ang Salmo 14:1 nagingon, “Ang buang diha sa iyang kasingkasing miingon, Walay Dios.” Dili mo angay’ng tawagon og buangbuang ang usa ka tawo. Apan klarong nagalihok sila nga ingon niana gyud sila, kay wala sila’y... Nagalihok sila nga mora og walay Dios. Wala gitagad ang Pulong.

241 Tan-awa, dinhi lang sa miaging adlaw, gitawag nila ako nga paadtoon didto sa pikas balay aron motan-aw og... Si Billy Paul, siguro kadto, o uban kanila, ang miingon nga adunay usa—usa ka programa pang-relihiyon diha sa telebisyon.

242 Wala kami telebisyon. Dili gyud mahitabo nga magkaaduna kami ni usa niini sa among balay, dili gayud. Apan aduna og... Kung gusto ninyo kini, bahala kamo. Apan nagsulti ang Dios kanako nga dili gayud.

243 Ug pagbalhin namo didto, nangabang ko sa niining buutan nga igsoong babaye didto, aduna siya’y telebisyon tungod kinahanglan nilang mapalitan nila siya niini aron maabangan ang iyang balay. Ug gitugotan ko silang motan-aw niining programa pang-relihiyon, mao nga ila—ila kong gitawag ug miingon nga adunay mga kalantahong pang-Ebanghelyo niadtong tungora.

244 Ug kung estoryahan lang ang pundok sa mga Ricky, mao na kadto sila nga nagalihok nga mora og mao gyud, nagapatawag sa ilang mga kaugalingon ingon nga mang-aawit sa Ebanghelyo! Usa kadto ka pagpakaulaw kang Jesus Cristo, ang makita sila nga kung unsa na lang ang ginapangbuhat, ginayugyog-yugyog pa ang ilang mga kaugalingon, ug—ug kadtong pang-Ricky nga mga alut ug tanan na, kabalo na mo. Basta, mora—mora gyud—mora gyud og usa ka pagpanamastamas!

245 Ingon niana nga tawo si Cain, relihiyoso sa binuhatan, sigurado. Apan dautan nga binhi ang anaa kaniya, kita n’yo, ug busa kini nga binhi namunga og kaliwat sa serpente. Gitilapan ni Satanas kini nga binhi didto sa Eden, ug mao nga naipanganak si Cain. Gibutangan niya kini sa iyang hilo.

246 Siya, si Cain, nasayod sa hingpit nga kabubut-on sa Dios. Nahibalo siya sa hingpit nga kabubut-on sa Dios. Kahibalo si Cain niini. Ngano man? Apan, mibalibad siya sa pagbuhat niini, gipamatud-an niya kung ingon niana nga binhi siya sa serpente. Sa diha nga nakita niya ang hingpit nga kabubut-on sa Dios, mibalibad siya niini. Nakita niyang gipanghimatud-an sa Dios ang mensahe ni Abel. Nasayran niya nga mao kadto ang

kabubut-on sa Dios. Kita n'yo? Nakita niyang gipanghimatud-an sa Dios ang mensahe ni Abel. Ug unsa man ang giingon sa Dios ngadto kaniya? Ug nag-ingon gyud ang Dios, miingon Siya, “Mao usab ang buhaton mo, magsimba ka sama sa pagsimba sa imong igsoon, ug—ug mamahimo kang okey.” Apan nakita n'yo, nakita niya na ang hingpit nga kabubut-on sa Dios, apan dili niya gusto kadto. Kita n'yo, gusto niyang dugangan kini.

²⁴⁷ Ug nakita sa niining mga teologo kining Biblia, nabasa nila Kini, apan dili nila gustong tumanon Kini. Kita n'yo? Ginapakita lang niini ang pagka-binhi sa serpente. Nakita na nila Kini nga gipanghimatud-an, ug ingon ka klaro sa atubangan sa mga tawo, pero medyo malisud kaayo para sa mga tawo nga ipaubos ang ilang mga kaugalingon ngadto sa Pulong sa Dios.

²⁴⁸ Dili ba ninyo mahimatikdan, pagmag-estoryahanay kamo, kamong mga babaye, kamong mga dalaga, mahitungod sa pagpataas og buhok, ug moingon sila, “Nganong taas man ang imong buhok?” Kita n'yo? “Nganong pagmosul-ob ka og palda, taas man?” Pagma-estorya mo sila, medyo wala lang kanila. Dili ba husto kana? Kita n'yo, nasayod sila nga husto kana, kung aduna—kung aduna man lang og unsa man nga pagka-gining diha kanila. Kita n'yo? Nahibalo sila nga husto kana. Apan, nakita n'yo, dili nila mapaubos ang ilang kaugalingon ngadto Niana. Kita n'yo, mao gyud kana.

²⁴⁹ Tan-awa kung unsa si Cain kaniadto? Dili niya mahimo nga ipaubos ang iyang kaugalingon sa gipanghimatud-an nga Pulong sa Dios. Dili niya kadto mahimo.

²⁵⁰ Oh, bisan ang mga Pentecostal nagaingon, “Himaya sa Dios! Hallelujah! Giputlan ko ang akong buhok, ug nagsulti sa laing mga dila!” Huh! Nagapakita kana mismo nga aduna gyu'y sayup, kita n'yo, lahi ang ginapagawas sa mao nga binhi.

²⁵¹ Dili kana mahimo sa Binhi. Ang Binhi sa Dios dili makapagawas og usa ka babayeng mubo-ang-buhok. Dili kini mahimo Niini. Dili gyud mahimo, tungod ingon niana man ang giingon sa Biblia. Kita n'yo, dili kini mahimo Niini. Dili, sir.

Karon medyo malisud gyud ang magpaubos ngadto sa Pulong sa Dios.

²⁵² Himatikdi kini diha sa Genesis 4:6 ug 7, sa pagbasa og pipila ka mga Kasulatan dinhi. “Buhata kung unsa ang gibuhat ni Abel.” Miingon Siya, “Kung imong—nakita mo kung unsay gibuhat sa imong igsoon...” Miingon, “Lakaw ug buhata kanang gibuhat ni Abel, buhata ang mao rang matang sa pagpangalagad nga iyang gibuhat, ug—ug panalanginan Ko ikaw. Kung ayaw mo, nagahigda ang sala sa ganghaan.” Karon, ang *sala* mao ang “dili-pagtoo.” “Kung dili mo buhaton ang gibuhat ni Abel! Nakita mo nang gipanghimatud-an Ko siya, ug gihimo siyang matarung. Karon kung dili mo buhaton kana, nan

nagapakita kana—kana ang sala, ang dili-pagtoo, nagahigda na sa ganghaan.” Kita n’yo?

²⁵³ Ug karon makita nila kung unsa ang ginapanghimatud-an sa Dios. Nakita nila kung unsa ang ginabuhat sa Dios. Nakita nila ang tanan niining mga butang nga nagakahitabo. Nahibalo sila niini. Ginapakita sa Dios ang Iyang mga ilhanan ibabaw sa langit ug dinhi ubos sa yuta, ug ang tanan niining mga butang nga sama niana, ug makita nila kung unsa ang nagakahitabo. Apan ayaw nilang buhaton kini. Kita n’yo, si Satanas, ang binhi sa serpente; maantigo, gikan sa mga seminaryo, edukado kaayo, ang matag pulong, ang tanan-tanan, tukma gyud pagmotindog na diha sa pulpito, ug ang matag pulong kinahanglan eksakto, tul-id kinahanglan ang grammar, ug ang tanan eksakto gyud. Kita n’yo? Siguradong, dili sila makapaubos sa ilang mga kaugalingon, ang usa ka tawo nga sama niana. Kita n’yo, dili nila kini mahimo. Dili gyud. Dili gyud nila kini mahimo.

²⁵⁴ Karon, “Kung dili, nagahigda ang sala sa ganghaan; nagahigda ang dili-pagtoo,” dayon nahimo na siyang tinuyo nga di-masinugtanon. “Ug sa diha nga nahibalo ka na sa maayo nga buhaton, ug dili mo kini buhaton, sala kini diha kanimo,” kung nasayod ka sa usay husto ug wala mo kini buhata. Kita n’yo? Kung ingon niana nahimo siyang masupilon human nga gipanghimatud-an na ang Pulong, dayon nalabang niya ang utlanan nga nagapahimulag, dayon gipalayas na siya didto sa Eden pagkalabang niya niadto. Adunay utlanan kon diin dinha ka lang hangtud, ug, kung malabang mo kana nga didto ka na sa pikas, nahigawas ka na. Nakahibalo mo niana, dili ba? Adunay utlanan. Kung wala kamo nagatoo niini, basaha ninyo ang Mga Hebreohanon 10:26. Mao kana ang Kasulatan nga akong ginapahinungan kaganina, kita n’yo.

*Kay kung magpakasala kita sa tinuyo human nga . . .
madawat nato ang kahibalo sa kamatuoran, wala na’y
nahibilin pa nga halad tungod sa mga sala,*

²⁵⁵ Ang Bag-ong Tugon kana. Husto ba? “Kung magpakasala kita sa tinuyo human nga madawat nato ang Kahibalo nga giwali kaninyo, gibasa kaninyo, gipamatud-an kaninyo; human nga makita nato ang kahibalo sa Kamatuoran, ug padayon ka lang sa gihapon ug wala mitoo, sa tinuyo, wala na’y halad para sa mga sala.”

*Apan usa ka . . . makalilisang nga paghulat . . . ngadto
sa mabangis nga kalayo, nga magalamoy sa kaaway.*

²⁵⁶ Husto ba kana? Puede mong malabang kana nga utlanan. Sama sa gibuhat sa mga anak ni Israel didto sa ilang panaw, sa pag-abot nila didto sa kamingawan, mao usab ang gibuhat sa Israel kaniadto. Human nga nadungog nila ang mensahe ni Moises ug nakita nga gipanghimatud-an kadto; naminaw man sa gihapon ngadto sa usa ka mini nga propeta nga

miingon, “Oh, tan-awa ninyo, mga anak, kitang tanan pareho ra. Magminyoanay kita sa usa’g usa, ug kinahanglan buhaton nato ang *ingon niini*.” Ug lahi man ang giingon ni Moises kanila, ug nakita nga gipanghimatud-an kadto sa Dios. Tungod kay, si Balaam mora og mas maayo man mosaysay kaysa kang Moises, kita n’yo. Gikan man siya sa usa ka bantogan nga nasud kon diin didto ang bantogan usab nga mga tawo, ug mga organisado kaayo, ang yuta sa Moab, gamhanang kasundalohan, ug aduna og bantogan nga mga butang nga gikahadlok sa mga tawo niadtong adlaw. Ug ania ang propeta nga taga-didto, usa ka propeta, usa ka dinihogan, usa ka dinihogan nga mini, kita n’yo, nga giadtoan ang usa usab ka dinihogan (tan-awa kung unsa ka halos magkapareho), ug gitudloan ang maong mga tawo, ug daghan kanila ang misunod kaniya. Ayaw gayud kalimti kana. Kita n’yo, ningsunod sila sa butang nga dili mao ang Pulong, ang gipanghimatud-an og gipamatud-an nga Pulong!

²⁵⁷ Ayaw tugoti nga adunay mosulod dinhi ug sultihan kamo og butang nga lahi. Bantayi kung unsa ang gipanghimatud-an ug ginapamatud-an sa Dios.

²⁵⁸ Karon kung kadto nga mga tawo nagbalik sa nangagi lang, ug moingon, “Kang Moises! Nagpakita ang Dios didto sa kawanangan. Ug nagsulti lang siya og nanungha, ang mga pulgas, ang mga langaw, ang mga baki; gitangtang gikan sa pagkatungha, ang mga hubag ug mga balatian. Gipabuka ang Dagat Nga Mapula, ug unsa nga kita’y . . . Ug gipakaon kita og mga manna nga gikan sa langit. Oh, ingon niana ang atong propeta!”

²⁵⁹ Apan ania ang usa na usab ka propeta didto, “Himaya sa Dios! Usa ako ka propeta, usab.” Moingon, “Karon, kamong tanan, sultihan ko kamo. Karon, nasabtan na ninyo karon, mas maayo nga grammar ang akong gigamit kay kang Moises. Ug *ingon niini* ako ug *ingon niana* ako, kita n’yo,” ug uban pa.

²⁶⁰ Ug mahibaloan mo na lang, nalugda na sila niini. Ug ang matag usa kanila nangamatay mismo didto sa kamingawan. Wala ni usa kanila ang nabuhi. Wala gyud sila nabuhi. Dili sila makaadto sa Langit, ni usa kanila. Ang giingon ni Jesus.

²⁶¹ Miingon sila, “Ang among mga ginikanan nanagpangaon man og manna didto sa kamingawan!” Kita n’yo, ang Pentecostal, husto sila, kita n’yo, nasinati na gyud nila kini tanan. Sila, “Ang among mga ginikanan nanagpangaon og manna didto sa kamingawan!”

²⁶² Miingon Siya, “Ug sila, tanan sila, nangamatay.” Ang *kamatayon* maoy “Eternal nga pagkahimulag.” Dili na sila makabangon pa, bisan nga naagihan nila ang tanan niini nga mga kasinatian. Kung ihulagway, nanagsulti sila og laing mga dila, ug nanagsayaw diha sa Espiritu, ug tanan na.

263 Apan pag-abot sa pagpakigsangka tali sa Pulong og tali sa maong duha ka propeta, ang usa kanila anaa sa Pulong, ug ang usa simang sa Pulong; pareho silang, mga propeta. Nasabtan ba ninyo? Moingon, “Amen.” [Nagaingon ang kongregasyon, “Amen.”—Ed.] Ang usa anaa sa Pulong, ug ang laing usa simang sa Pulong; pareho silang, mga propeta, napamatud-an nga mga propeta. Apan ang usa anaa sa Pulong, kita n’yo. Mini nga mga dinihogan sa kaulahiing mga adlaw, kita n’yo. Ang usa . . . Mga propeta, pareho silang, mga propeta; ang usa anaa sa Pulong ug ang usa (kining usa) gipanghimatud-an sa Pulong, ug ang usa usab wala gipanghimatud-an sa Pulong. Si Cain ug si Abel, na pud. Nakita n’yo ang maong duha, mini—ang mini ug ang matuod? Sige.

264 Apan ang matag usa kanila kaniadto nangadugta didto sa kamingawan, ug nangamatay. Patay ang ilang mga kalag, ug nangalaglag. Ug atua sila mismo sa ilang dalan sa pangatungdanan, nagasimba ug ginabuhat ang mismong mga butang nga gisugo sa Dios kanila nga buhaton, apan midawat og mini nga magtutudlo, nga wala gipanghimatud-an sa Pulong, aron mapamatud-an nga husto. Pero bisan pa man, Doktor siya sa Dibinidad, ug unsa pa man nga gusto ninyong itawag mahitungod sa usa ka tinuod nga propeta, apan sa espirituhanon wala gipamatud-an sa Pulong ug pinaagi sa mga ilhanan nga iya sa Dios. Ug nangamatay sila didto sa kamingawan; mga matarung, dungganon, relihiyosong mga tawo, nangamatay, ug dila gayud makasulod sa Langit.

265 Kita n’yo na kung asa kita angay’ng maglakaw? Nasabtan ba? [Nagaingon ang kongregasyon, “Oo.”—Ed.] Ayaw gyud ninyo kini nga ipalabay lang.

266 Mao usab niadtong panahon nga naghimo ang binhi-nga-Pulong ni Noe og usa ka nagalutaw nga sakyanang pagkausab gikan sa yuta paingon sa kawanangan. Mora kadto og binuang paminawon alang sa mga tawo, ang magkaaduna og usa ka pundok sama sa aduna si Noe kaniadto. Ug gisultihan niya sila, miingon, “MAO KINI ANG GINAINGON SA GINOO. Nagsulti ang Dios, ug adunay moabot nga ulan.”

267 Ang siyensya, ug ang mga edukado ug mga relihiyoso niadtong panahona, nanag-ingon, “Tan-awa ninyo kanang tigulang nga impostor. Nagkatigulang na siya, may problema na siya sa pangutok,”

268 Kita n’yo, pero husto siya, tungod nga usa siya ka gipanghimatud-an nga propeta. Ug dayon, sa katapusan na, gipanghimatud-an gyud sa tinuod ang iyang mensahe. Unsa ma’y iyang gibuhat? Siya giusab gikan sa yuta ngadto sa Kahimayaan, pinaagi sa arka, sa Pulong nga iyang giwali. Giusab.

269 Gipanglunod sa siyentipikong esprey ang tanang uban pa kanila ngadto sa paghukom. Nangadugta sila didto sa tubig sa paghukom, sa lunop.

270 Unsa man ang ginapaninguhaan sa mga tawo sa karon, sa niining dakung siyentipikong kapanahonan sa edukasyon, sa iglesiang Eden, nga naibalik kini sa pagka-Eden niini, sa pagka-siyentipikong kahimtang, imbis sa Pulong? Ginabayaw ba kaha nila ang Pulong sa Dios? Ginapaninguhaan ba sa mga tawo nga ituboy ang Pulong sa Dios, o ginapaninguhaan nilang ituboy ang ilang kaugalingon? Asa man niini? Makahibulong ba?

271 Ang iglesia usa ka hiwi na nga binhi: kahibalo, programa, ang nagpahinungdan sa tibuok kaliwatan pag-usab, tungod sa pagka-siyentipiko, nga mamahimong siyentipikanhong walay-hibangkaagan sa Pulong sa Dios. Siyentipikanhong walay-hibangkaagan sa Pulong sa Dios! Mabug-at kana paminawon, dili ba? Apan, ingon niana sila.

May moingon, “Dili kini mahimong mahitabo”?

272 Niadtong miabot si Jesus. Niadtong panahon nga miabot si Jesus, sila—sila nga mga tawo nahibalo na nianang Pulong sa Dios, diha sa letra lang. Dili ba? Sigurado. Apan wala gyud sila’y hibangkaagan kung Kinsa Siya, sa dihang nakita nila ang Dios diha sa mga pako sa salampati, nga nagapamuhat ug eksaktong ginabuhat kung unsa ang giingon Niyang pagabuhaton. Ug Iyang gibuhat kung unsa gyud ang gisulti sa Pulong, “Kung wala Ko ginabuhat ang mga buhat sa Akong Amahan, kung ingon niana dili ninyo Ako toohi.” Apan gibuhat Niya sumala gayud sa gisulti sa Pulong nga pagabuhaton Niya. Ug siyentipikong mga tawo sila niadtong panahona, apan siyentipikanhong walay-hibangkaagan, aron tinuyo nga magpakasala.

273 Gibutahan sa kailibgon. Gikinahanglan nila ang Pulong sa Dios aron maipakita kaniya, aron maipakita ang iyang pagkahubo. Diha sa Pinadayag 13, miingon, “Ginatambagan Ko ikaw nga magpalit Kanako og tambal, aron nga mabuksan ang imong mga mata, aron nga makita mo ang imong pagkahubo.”

274 Ang tambal mao ang Pulong sa Dios, ang pag-ayo sa mga mata nagadala kanimo gikan sa natural nga mga butang sa kalibutan, ug nagausb kanimo, pinaagi sa gahum sa Dios, ngadto sa Iyang Presensya. Dayon makita mo! Makaingon ka, “Kanhi ako nahisalaag, karon nahikaplagan na. Usa ako ka buta kaniadto, apan karon makakita na.” Kita n’yo, mamahimong lahi gyud kini.

275 Ingon niana kung unsa ang pagtawag sa iglesia sa karon, maoy, “Ginatambagan Ko ikaw nga magpalit Kanako og tambal nga ikadapat sa imong mga mata, aron nga madihogan ka pinaagi sa niining Akong tambal, ug dayon makakita ka.”

276 Tugoti nga mokunsad ang Balaang Espiritu sa kang kinsa man nga sinsirong aduna sa kung unsang butang diha sa

kinasuloran niya! Nagagikan sa sulod ang pag-ayo. Tugoti nga moabot kana nga pag-ayo gikan sa Balaang Espiritu nga anaa sa sulod ninyo. Kung usa kini ka tinuod nga Espiritu nga nagadihog sa tinuod nga Binhi, wala Kini buhaton og unsa man kondili ang manganak og usa ka anak nga lalaki o anak nga babaye sa Dios. Apan ang tinuod nga Espiritu puede usab mokunsad diha sa usa—usa ka binhi sa amorseko, mahimo man mohulog ang ulan diha sa amorseko, ug buhion niini kini ingon ka pareho nga nagakahulog kini ngadto sa trigo ug ginabuhi niini kini. “Kay pinaagi man sa ilang mga bunga maila mo sila.” Kita n’yo? Usa kita ka punoan nga nagapamunga, nga iya sa Dios, ginapamunga ang Iyang Pulong.

277 Nag-ingon si Jesus, “Idumili sa tawo ang iyang kaugalingon, ug magsunod Kanako. Idumili ang iyang edukasyon, idumili ang iyang kahibalo, idumili ang iyang mga titulo; magpas-an sa iyang krus ug magsunod Kanako.”

278 Nawala na sa mga tawo ang ilang kaligdong. Aduna ko’y ginabalikan nga diyutay’ng mga Kasulatan dinhi, para lang. . . Hatagan ko lang og mga lima ka minuto ang akong kaugalingon bahin niini, mga napulo, kita n’yo. Nawala na sa mga tawo ang ilang kaligdong alang sa usa’g usa. Sila—dili na sila pareho sa kung unsa sila kaniadto. Bisan mga tawong edaran na, mga igsoong lalaki ug ako, dinhi, nga mga naila, ug mga kababayan-an. Manglihok ang mga tawo nga dili na sama kaniadto. Nawala na kanila ang yanong pangisip. Ang—ang—ang pangisip—ang pangisip nga epekto ngadto sa mga tawo sa niining modernong siyentipikanhong adlaw nga atong gikapuy-an, nahimong hinungdan nga nawad-an og natural nga pangisip ang mga tawo. Dili na nila mahimong tagdon ang usa ka tawo, ang usa ka babaye, ingon nga igsoong babaye ug igsoong lalaki. Daw sa may kahilas na. Sa dihadiha nga ilang. . .

279 Ug ang mga babaye magbisti gyud og ingon ka imoral, pagmogawas na didto kauban sa mga tawo. Ug moingon sila, “Maayo man ako nga babaye.” Bueno, para man sa unsa diay nga nagbisti siya og ingon niana? Buta siya. Bueno, kon—kon ang inyong. . . Kung ang usa pa sa niining mga igsoong babaye dinhi, nga—nga medyo og parehong edad, kon ang inyong inahan o ang akong inahan kaniadto molakaw dinha sa dalan, nga nagbisti og pareho sa niining mga babaye sa karon, siguradong gibalhog na nila siya dinha sa balay sa mga buang; wala man lang gani siya og igong pangutok nga mahibal-an nga kinahanglan niyang magsul-ob og bisti. Bueno, kon kabuang man kini kaniadto, kabuang kini sa gihapon karon. Mao ra man gihapon nga matang sa babaye. Kita n’yo? Apan nawad-an na sila og kaligdong, ang tibuok nilang panabut. Nawad-an na sila. Ug tungod sa modernong mga pagpanabut, tungod sa kamatutoan, ug edukasyon, “Mas maayo man gud sa lawas, kung

ingon niini.” Makasasala kini ug kamatayon! Himatikdi. Sila, oh, dili na pareho sa kung unsa sila kaniadto. Sa dihang . . .

²⁸⁰ Ug himatikdi paghisgotan na ang bahin sa iglesia. Sa una, kung hisgotan ang bahin sa iglesia, sa kaniadtong panahon, pag ang propeta mosulti na og, MAO KINI ANG GINAINGON SA GINOO, mangatandog ang mga tawo. Kuptan nila Kini mismo. Madasig sila. Apan karon, “Dili ko gusto kanang tawhana. Ipalagpot siya.” Huh! Kita n’yo? Uh-huh. Kita n’yo, wala na sila’y mga pagpanabut. Ang mga tawo dili na matandog sa Espiritu sa Dios karon.

²⁸¹ Ang Pulong sa Dios mao ang Iyang Espiritu, ug ang Iyang Pulong nagaabot ngadto sa Iyang propeta. Ug ang Pulong mao ang magausab kaninyo gikan sa mga butang nga iya sa kalibutan, ngadto sa dagway ingon nga mga anak nga lalaki ug mga anak nga babaye sa Dios. Ug ang Pulong mahimo lang moabot pinaagi sa niining mga propeta, sa diha nga nagasulti sila. Ug gikinahanglan nga matandi kini sa Pulong, ug maipakita nga ang Pulong kini. Dayon kung dawaton mo kana nga Pulong, pagausbong ka Niini; gikan sa pagka-anak nga lalaki sa Dios, o pagka-anak nga babaye. . . o, gikan sa pagka-anak nga lalaki sa kalibutan, pagka-anak nga babaye sa kalibutan, ngadto sa pagka-anak nga lalaki ug pagka-anak nga babaye sa Dios.

²⁸² Tan-awa ang inyong kaugalingon dinhi. Pila na kaninyo ang nagkaaduna ug ingon niana nga kasinatian? Tanan kita. Nagkaaduna na niana nga kasinatian. Tungod kay, gisulti Kini, gitooan Kini, ug migawas ang Pulong ug misulod sa semilyahanan sa kasingkasing, ug mitubo Kini dinha mismo. Kita n’yo?

²⁸³ Ginausbong ang inyong kaugalingon, ginausbong sa Iyang Balaang Espiritu ang binhing Pulong ngadto sa pagkaliwat Niini. Sama sa usa ka kahoy’ng melocoton nga nagapamunga og melocoton, ang kahoy’ng mansanas nga nagapamunga og mansanas, mga butang nga sama niana; ang Iyang Pulong magapamunga usab og mga anak nga lalaki ug mga anak nga babaye sa Dios. Mao kana ang ginapaabot nga buhaton niini.

²⁸⁴ Usa ka adlaw sa diha nga ang kalibutan atua pa sa kangitngit ug kaawaaw niini, ang Espiritu sa Dios naglihok sa ibabaw niini, diha sa mga gipili-nang-daan nga binhi. Gipili-nang-daan nga binhi, ang gipili-nang-daan, giusab. Gikinahanglan niadto ang Isaias 9:6.

²⁸⁵ Karon, atua nagatindog kini nga propeta, siya usa—usa ka tawong may impluwensiya sa mga nasud, sa mga tawo. Nagtoo kaniya ang mga relihiyosong tawo sa iyang adlaw; pero dili tanan, may uban kanila nga wala gyud mitoo. Apan, kining usa na usab ka propeta, nakita nila kini nga tawo nga nagsulti og mga butang ug eksakto mismong nangatuman. Hingpit gyud ang gipangsulti niya, ug nangahitabo kadto. Ug, ania, kini nga

tawo kinahanglan motindog sa atubangan sa iyang katawhan, ug moingon, “Usa ka ulay ang magapanamkon,” oh, dili masabtan. Apan, nakita n’yo, dili ang Dios ang nagsulti kaniadto, Mismo, gisulti Niya kadto pinaagi sa Iyang mga propeta. Karon, walay bisan unsa nga nasulat sa Biblia nga sama niana, apan mitindog kini nga propeta, miingon, “Usa ka ulay ang...” Diha sa Isaias 9:6, “Kay alang kanato ang usa ka Bata natawo, alang kanato ang usa ka anak nga Lalaki gihatag; ang Iyang Ngalan pagatawgon ‘Magtatambag, Principe sa Pakigdait, Dios nga Makagagahum, Amahan nga Walay Katapusan.’” Karon kung “usa ka ulay magapanamkon,” kanang gisulti nga Pulong, nga usa kini ka binhi, kinahanglan aduna kini og semilyahanan nga masemilyahan niini, sa umalabot. Nangita kini sa tibuok kayutaan, wala gyud bisan usa. Gilatas niini ang mga kayutaan sa pagpangita, wala gyud bisan usa.

²⁸⁶ Ug human sa halos walo ka gatus ka tuig, kadto nga gipili-nang-daan nga binhi nakakaplag og semilyahanan, ug mitubo kini.

²⁸⁷ Sama lang sa gibuhay sa Dios sa sinugdanan, “Mahimo ang kahayag,” ug tingali walo ka gatus pa ka tuig human niadto mitungha ang kahayag. “Mahimo ang kahoy,” mitungha kini nga sama niana pag-usab, ang tanan nga Iyang gisulti.

²⁸⁸ Ania ang gipili-nang-daan nga binhi nga ginapatungha si *Emmanuel*, “Ang Dios nga kauban nato.” “Ug Kaniya mangita ang mga Gentil,” ug Siya Kanang ginapangita nato karon, si Jesus. Nakita n’yo, gipili-nang-daan nga binhi!

²⁸⁹ Gisulayan kadto nga espreyhan ni Satanas, sama sa gibuhay niya kaniadto kang Eba. Gisulayan niya nga espreyhan kadto, apan napakyas siya. Tungod sa Iyang pang-abog nga ania *nini*, usa Siya ka gipili-nang-daan nga binhi. Dili nila Siyang mahaylo nga magpamiyembro, aron himoon Siya nga usa ka Fariseo o usa ka Saduceo. Dili nila Siya mahaylo nga magpamiyembro sa bisan unsa man nga organisasyon. Siya ang gipili-nang-daan sa Dios, gilitok nga Pulong. Dili arang mapatakod ni Satanas ang iyang kawalay-pagtoo ngadto Kaniya. Aduna Siya og pang-abog nga anaa Kaniya.

Dios, espreyhi kami sa maong pang-abog, mao ang akong pag-ampo. Husto kana.

²⁹⁰ Dayon naglihok diha Kaniya ang Espiritu ug gihatud Siya ngadto sa Kalbaryo, didto sa krus, aron maghatud og Kahayag sa niining adlaw, ug Kahayag ngadto sa tanang mga ginili-nang-daan nga mga binhi sa Iglesia sa niining adlaw, nagapang-transform og mga anak nga lalaki ug mga anak nga babaye sa Dios, paingon sa Iyang Presensya.

²⁹¹ Ayaw gayud pagkapandol nianang pulong nga “predestinasyon.” Nahisgotan ko na kana, nakita n’yo. Gusto kong ipakita kaninyo, sa Mga Taga-Efeso 1:5.

292 Kita n'yo, sama lang sa kung atua kamo kaniadto, tan-awa, sama lang sa kung atua kamo kaniadto sa inyong amahan; sama sa gisulti ko sa miaging gabii, sama lang sa kung atua kamo sa inyong amahan sa sinugdanan. Kung wala kamo didto, dili kamo maania dinhi. Apan, nakita n'yo, gikinahanglan nga moagi kini sa usa ka semilyahanan, aron nga maipanganak kamo. Ug karon kamo iya nang anak nga lalaki, kamo iya nang anak nga babaye. Kita n'yo, usa kini ka binhi. Ug dayon kung kamo gayud . . .

293 Kung usa ikaw ka Cristohanon karon, usa ka tinuod nga gipili-nang-daan nga binhi, didto ka na daan sa Dios sa wala pa ang . . . Kanunay kang anaa na daan sa Dios. Ang binhi sa imong kinabuhi, maoy kinaiya sa Dios, nga maoy Iyang hunahuna.

294 Ingnon ta, pananglitan, kining matahum nga gining nga nagalingkod *dinhi*, kita n'yo. Miingon ang Dios, “Sa nianang adlaw adunay babaye, nga ang iyang ngalan *Ingon niini-ug-ingon niana*. Mamahimo siyang *ingon niini*, *ingon niana* ug *ingon niini*,” ug nahibalo Siya bisan sa niining taknaa mismo nga, “kini nga babaye magalingkod ug maminaw sa Mensahe, nga nagsul-ob og pula nga sinina.” Kita n'yo, Iya kadtong hunahuna. Bisang ngalan sa mamahimo mong bana, ug kung kinsa man siya; ug ipahitabo Niya kini nga paghiusa, ug nga molingkod ka dinhi sa—sa niining—sa niining siyudad sa niining adlaw. Walay bisan unsa mang paagi nga masipyat mo kini, kita n'yo, tungod kay nagatubo man ka. Ug basta nga ikaw usa ka binhi diha sa sulod, nga nagatubo, mamatuman gyud diha kanimo sa ingon ka eksakto kung unsa ang giingon na sa binhi nga pagabuhaton mo. Sa eksakto gyud. Iya kining Pulong; ginatuman Niya ang Iyang Pulong, ginabantayan Niya Kini.

295 Atua ka na kaniadto sa imong amahan, ingon nga usa ka binhi, ug migawas ka ingon nga usa ka anak nga babaye; ikaw, ikaw, tanan kamo, mga igsoong lalaki ug mga igsoong babaye, ninggawas na kamo. Kung wala kamo kaniadto sa inyong amahan, nan wala unta kamo dinhi karon.

296 Ug kung wala kamo kaniadto sa Dios . . . Kung nagatoo ka sa mensahe sa Biblia, ug sa ang-sa-karon nga adlaw nga Mensahe, nga mao ang kapanghimatuuran Niini; ang hinungdan nga nagalingkod ka dinhi karon, tungod kay gibut-an ka nang-daan nga magalingkod dinhi. Wala ka unta dinhi, siguro; didto ka unta sa kadalanan, ingon nga hubog tingali, ang uban kaninyo; ug siguro ang uban kaninyo dinhi ug nakigpuyo-puyo na sa asawa sa ubang lalaki; ug kamong mga kababayen-an dinha, nga mga minyo na, ug nakigpuyo-puyo usab sa bana sa ubang babaye, o butang nga sama niana. Kita n'yo, apan gibut-an na kamong daan nga maania dinhi. Kita n'yo, dili mo kini mapugngan. Aduna ka'y Amahan, Dios Siya, ug usa ikaw ka binhi.

297 Ug sa diha nga miabot na Siya sa punto, nga nahimo na Niya nga napaabot ka sa kung asa ka na karon . . . Atua ka Kaniya

kaniadto, ingon nga usa ka hunahuna, karon usa na ikaw ka persona nga makapag-fellowship na Kaniya. Kita n'yo? Ingon nga atua kamo, atua kamo kaniadto sa inyong mga amahan, sa sinugdanan, apan karon kamo mga anak na nga lalaki ug mga anak na nga babaye, aron nga makapag-fellowship na sa inyong ginikanan. Karon kita'y mga anak nga lalaki ug mga anak nga babaye sa Dios, nga makapag-fellowship na sa atong Amahan, ang Dios. Kita n'yo, pagkatahum gayud! Gusto ba ninyo kana? [Nagaingon ang kongregasyon, "Oo!"—Ed.] Dayon nahimo na kamong sama Kaniya. Ug kung kita'y mga anak, kung ingon niana mga kinaiya kamo, ug atua na sa Iyang porma didto sa sinugdanan.

²⁹⁸ Ug, hinumdumi, kung kamo atua na daan Kaniya sa sinugdanan; ug sa dihang si Jesus, nga mao ang Dios, ang Pulong nga nahimong unod ug miipon uban kanato; kung ingon niana kamo atua na daan Kaniya ug naangkon usab ang mga insulto nga naangkon Niya. Didto kamo sa Kalbaryo uban Kaniya, diha Kaniya. Namatay kamo, diha Kaniya. Nabanhaw kamo, diha Kaniya. Ug kamo karon nagalingkod sa mga Langitnong dapit, diha Kaniya. Kita n'yo?

²⁹⁹ Kung ako usa ka Amerikano, ginabarugan ko ang tanan niyang mga kaulawan, ginabarugan ko ang tanan niyang mga kadayeganan. Kung unsa man siya, mao pud ako. Usa ako ka lungsoranon sa Amerika. Ako'y . . . Ako'y midunggo sa Plymouth Rock. Oo, sir. Oo, midunggo ako kaniadto sa Plymouth Rock. Akong gipirmahan ang . . . Atua ako kaniadto sa dakung balay-tigumanan niadtong buntag sa dihang gipirmahan nila ang Pagpahayag sa Independensya. Gipirmahan ko kadto uban kanila. Kabahin ako sa iyang ekonomiya. Gipirmahan ko ang Pagpahayag sa Independensya. Husto kana. Kauban ko kaniadto si Washington, didto sa Valley Forge, sa dihang gitabok niya ang suba. Atua ako niadtong buntag. Nag-ampo ako uban kaniya. Atua ako. Didto usab kamo, ingon nga usa ka Amerikano. Kung usa ikaw ka Amerikano, atua ka kaniadto. Kay, ang tanan-tanan kung unsa ang Amerika, mao ikaw. Gipakayab ko ang bandila—ang bandila didto sa Guam. Gitabangan ko sila nga mabuhat kadto. Gisulong ko ang tanang kuta. Gipas-an ko ang iyang kaulawan, ingon nga usa ka rebolusyonaryo. Kung unsa man siya, mao pud ako.

³⁰⁰ Ug kung unsa man si Cristo kaniadto, mao ako. Kung unsa man Siya karon, mao ako. Oh Dios! Kung gipakaingon Siya nga usa ka panatiko, kinahanglan mao usab ako. Kung Siya kaniadto usa—usa ka ginganlan og Beelzebub, tungod sa Iyang mga buhat sa Iyang Espiritu, mao usab ako. Kung unsa man Siya, mao ako. Kung unsa man Siya, mao kamo.

³⁰¹ Kinahanglan nga mamahimo kitang mga tigpahigayon sa iyang pagkamalungtaron, sa iyang pagkagawasnon o sa iyang kadunganan, sa iyang kadayeganan o sa iyang kaulawan.

³⁰² Kinahanglan mamahimo kitang ingon niana. Kinahanglan nga mamahimo kita ang Iglesia, ang Pangasaw-onon ni Jesus Cristo. Nagkinabuhi ako kaniadto uban Kaniya dinhi sa yuta, niadtong ania Siya. Namatay ako uban Kaniya sa dihang namatay Siya. Nabanhaw ako uban Kaniya sa diha nga nabanhaw Siya. Ako’y nagkatigum ug naglingkod uban Kaniya karon diha mga Langitnong dapit, tungod nga kabahin Niya ako. Kung asa man Siya, didto ako. “Kung asa ang Akong alagad, didto usab Ako.”

³⁰³ Karon makapag-fellowship na Siya kanato ug pinaagi kanato, ug igasalig Niya ang Iyang Pulong diha kanato. Nga, kabahin kita sa Iyang Pulong. Kita...Kung Siya mao ang Pulong, ug kita kabahin Niya, nan kabahin kita sa Pulong.

³⁰⁴ Unsaon ko man paglimod nga aduna ko’y kamot? Bisan unsa pa sa mga bugok, pasayloa ko, bisan unsa pa pag-ingon sa siyensya nga—nga wala ako’y kamot; aduna ko’y kamot! Kabalo ko nga aduna ko’y kamot. Gigamit ko kini.

³⁰⁵ Ug kabalo ko nga aduna ko’y Dios. Aduna ko’y Manluluwas. Mabati ko Siya diha sa akong kalag. Ako, kabahin ako Kaniya. Ingon niana ang ginaingon sa niining Pulong, ingon niana ako. Ug kung ilimod ko ang usa ka bahin *Niini*, mamahimong sama kana nga ginalimod ko nga aduna ko’y kamot, dalunggan, mata. Dili ko mahimo kini ug nga magpabilin ingon nga tawo, sa husto kong hunahuna; dili ko usab mahimong ilimod ang bisan unsa mang Pulong sa Dios ug nga magpabilin diha sa akong husto, hustong Espiritu sa Dios. Kinahanglan kong toohan ba kung unsa ang ginaingon sa denominasyon o kung unsa ang giingon sa Dios bahin Niini. Kita n’yo? Dili mo mahimo kini.

³⁰⁶ Karon, “pag-usab.” Mahimo Niya kitang usbon pinaagi sa Iyang Pulong, nga mahimo natong saligan, tungod nga kabahin kita Niini.

³⁰⁷ Ug karon adunay daghang mga butang, paghisgotan ang bahin sa natural kong pagkahimugso, daghang mga butang sa akong natural nga pagkahimugso nga dili ko mahimong ipasigarbo. Sultihan ko kamo, wala gyud ko’y bisan unsa nga ipasigarbo. Makasasala ang akong inahan, sa sugod pa lang; makasasala ang akong amahan. Ug gikan sila sa usa ka pundok sa mga mamumuno ug mga mamumusil, ug daghan kanila ang nangamatay nga naka-botas pa; mga palahubog ug mga tigpahuyot og bino, ug tanan nang uban pa, didto sa Kentucky. Ang inahan ko, mistisang Indian. Ug ako—wala ako og bisan unsa man nga ipasigarbo. Dili ako mahimong magpasigarbo bahin sa akong pamilya.

³⁰⁸ Apan, himaya sa Dios, adunay usa ka butang nga mahimo kong ipasigarbo, ang Ikaduha kong Pagkahimugso, nga nagagikan kang Jesus Cristo. Makapasigarbo ako bahin sa nianang Ginikanan nga aduna kita, kay Siya mao man ang

akong Amahan. Siya ang akong Manluluwas. Siya ang akong Manunubos. Mahimo akong magpasigarbo bahin sa tanan-tanan nga Iyang—nga Iyang gihimo para kanako, tungod kay ako karon nahimo nang Iyang anak. Dili na ako anak ni Charles Branham, anak na ako ni Jesus Cristo. Husto kana. Makapasigarbo na ako karon bahin sa akong Pagkahimugso. Dili ako makapasigarbo sa nahauna kong pagkahimugso, nga wala gyu’y bisan unsa, gikaulaw ko kana. Apan wala ko gikaulawan ang Ikaduha kong Pagkahimugso. Wala, wala. Wala ko gikaulawan ang Ikaduha kong Pagkahimugso. Giunsa man Niya pagbuhat kadto? “Pinaagi sa paghugas sa tubig sa Pulong.” Husto kana.

³⁰⁹ Ang tinuod nga mga gipili-nang-daan nga mga magtotoo nagapabilin sa Pulong, ug dili nila Kini tuison. Dili Kini mahimong tuison. Oh, mga anak nga lalaki ug mga anak nga babaye sa Dios, nganong dili man nato mahimong ipahigayon kining dakung pagpakig-fellowship nga aduna kita unta, uban sa tanang mga anak nga lalaki ug mga anak nga babaye sa Dios? Kinahanglan mapahigayon nato kini. Apan wala gayud nila buhata kini, kana lang, tungod kay sa tinuod dili man sila mga anak nga lalaki ug mga anak nga babaye nga gikan sa . . .

³¹⁰ Kita n’yo, sama sa giingon ko sa miaging gabii, pagahisgotan ko unta . . . Nasulat ko na unta dinhi, apan wala na ako’y oras nga mabalikan kini. Pabiya na ako ug paundang na ako karon.

³¹¹ Kanang gamay’ng anaa sa kinasuloran, dinha ka nagsugod, nga mao ang imong *kalag*; dayon sunod niana, usa ikaw ka *espiritu*; ug dayon nahimo kang usa ka *tawong* buhi. Karon, ang *tawong* buhi adunay lima ka mga igbabati, aron sa pagkontak; ang *ikaduha* aduna usab og lima ka igbabati. Ang panggawas kana nga lawas: igtatan-aw, igititilaw, ighihikap, igsisimhot, ug igdudungog. Ang pangsulod nga lawas adunay gugma ug konsensiya, ug uban pa, lima usab ka mga igbabati. Apan ang kinasuloran gyud, toreng nagakontrolar, mahimo nga kini ang Dios o si Satanas.

³¹² Ug mahimo mong sundog-sundogon ang bisan unsa sa niining mga butang nga makontak mo, sama—sama sa, sama sa usa ka tawong Cristohanon; o mahimo kang magpagula og mga yawa, sama sa usa ka tawong Cristohanon. Apan ang kinasuloran nga toreng nagakontrolar, sa sugod pa lang, ang gigikanan niini, dili iya sa Dios, dili gyud kini mahimong mobalik sa Dios. Nasabtan ba ninyo kini? Dili ba si Judas nagpagula man usab og mga yawa? Dili ba si Caifas, ang naghukom kang Jesus ug nagpapatay Kaniya, nagpropesiya man gani? Apan dili siya makapabilin sa Pulong. Kita n’yo? Husto kana.

³¹³ Nausab gikan sa pagka-iglesia ug pagka-kalibutan, ngadto sa pagka-anak nga lalaki ug pagka-anak nga babaye sa Dios! Himatikdi kini, sa pagtapos karon.

³¹⁴ Ug kung unsa nga naglatagaw man ang mga anak sa Dios, naglatagaw dinha sa kalibutan, ang uban kanila sa *niining* denominasyon, gikan sa usa ka denominasyon ngadto sa usa na usab ka denominasyon, sama sa naglatagaw nga mga bitoon, dili makapuyo. Sama sa dahon ibabaw sa tubig sa panahon sa tingdagdag. Naandan na natong makita kini, Leo, didto sa Sidlakan kaniadto. Mangahulog ang mga dahon dinha, ug sa matag gamay lang nga huyop sa hangin mobalik kini gikan sa *niining* pikas paingon ngadto *nianang* pikas.

³¹⁵ Apan ang gusto sa Dios nga mamahimo kitang dili-mairog. “Nakaangkla kang Jesus, ang mga unus sa kinabuhi akong harongon. Nakaangkla kang Jesus, dili ako mahadlok sa mga hurus sa hangin o balud man,” kita n’yo, bisan unsa man kini. Daghan kaninyo ang makahinumdom sa Inch Cape bell, sa dihang nag-eskwela pa kamo, ingon nga bata pang lalaki ug babaye sa eskwelahan.

³¹⁶ Nausab kaniadto ang lawas ni Abraham ug ni Sarah, aron matagbo ang kundisyon sa gisaad nga Pulong. Kita n’yo, tigulang na sila. Nadawat ni Abraham ang saad, ug ni Sarah, niadtong setentay-singko na siya, ug si Sarah saisenta-singko na, nga lagpas na sa pagka-menopause; nagpuyo siya uban kaniya niadtong batang babaye pa siya, igsoon lang niya sa amahan. Ug, aron matuman kana nga saad, giusab ang pareho nilang mga lawas, gikan sa pagkatigulang nga lalaki ug babaye, ngadto sa pagkabatan-ong lalaki ug babaye, aron matagbo ang saad sa maong adlaw.

³¹⁷ Himaya sa Dios! Nagahatag kana kanako og maayo kaayong pagbati. Kita n’yo? Dili ko igsapayan kung unsa man ako kaniadto, dili ko igsapayan kung giunsa ko pag-anhi dinhi, mahimo kita usbon aron matagbo ang saad sa niining adlaw. Sa dihang, mahimo kitang magpuyo nga magkauban diha sa pagkahiusa ug pagkamalulot sa Balaang Espiritu, ug magkinabuhi ingon nga mga igsoong lalaki ug babaye.

³¹⁸ Si Enoch, giusab ang tibuok niyang lawas kaniadto, aron matuman ang usa ka tipo, diha sa Dios, ug gidala siya ngadto sa Langit nga wala man lang namatay, si Enoch. Mao man usab ang nahitabo kang Elias.

³¹⁹ Giusab kaniadto ang lawas ni Jesus gikan sa usa ka patay na, mabugnaw na nga porma, nilaparo, binunalan og ayo hangtud nga ang Iyang mga samad ug ang Iyang—ang Iyang mga gusok migim—aw pagawas sa Iyang likod. Ug—ug ang iyang kasingkasing gitusok, sa usa ka bangkaw nga mga *ingon niana* ka halapad, giduslak paingon diretso sa Iyang kasingkasing, ug mibugwak ang Dugo ug tubig. Bisan ang umog nga gikan sa iyang lawas, nahurot, ug miagas ang Dugo diha sa bangkaw, ug paingon sa Iyang tiil, ug mitulo hangtud sa yuta. Ug ingon niadtong Siya ka patay hangtud miingon mismo ang bulan ug mga bitoon

nga patay Siya, ang yuta nag-ingon nga patay Siya; miyukbo kini nga may kahadlok, ang—ang mga bato nangatay-og paukab sa yuta, ug ang tanan-tanan. Ang tanan-tanan nanag-ingon nga patay na Siya; bisan ang Dios gitakpan Niya ang Iyang nawong. Patay gyud Siya. Apan ang Iyang lawas nausab. Ngano man? Tungod nag-ingon ang Dios, “Dili Ko pagabiyaan ang Iyang kalag didto sa hades, ni itugot nga Ang Akong Balaan moagi sa pagkadunot.” Dili gyud mahimo nga mahitabo kana.

³²⁰ Usa sa niining mga adlaw, ang atong mga lawas ihaya na sa lungon. Mahimong moanha kita. . . Mahimong moanha ka ug tan-awon akong nakahaya diha sulod sa lungon. Mahimong moanha ko ug tan-awon ka, magsulti tingali og pipila ka panamilit nga mga pulong diha kanimo, o unsa man nga sama niana. Apan dili gayud ninyo kaming mapapabilin diha sa lubnganan. Mahimong patungan pa nila kamo og mga bato. Mahimong ilubong nila kamo didto sa dagat. Mahimo nilang buhaton ang gusto nila, apan ang Gahum sa Dios sa pagka-usab. . .

³²¹ Sa II Mga Taga-Tesalonica, nag-ingon, “Dili ko buot nga dili kamo makahibalo, mga igsoon, mahitungod sa kadtong mga nangatulog. Kay kini ginaingon namo kaninyo, usab, sumala sa Mga Sugo sa Ginoo, nga magatingog ang trumpeta sa Dios, ug ang mga nangamatay diha kang Cristo mangabanhaw pag-una; kita nga mga buhi ug nanghibilin,” sama sa giingon sa kalantahon niining buntag, “pagalalinon pagtingub ngadto sa ibabaw uban kanila, sa pagsugat sa Ginoo diha sa kawanangan.”

³²² Ang Gahum sa Dios sa pagka-usab, nga maoy nagkuha kanato gikan sa kagubot sa siyensya ug edukasyon, ug sa ingon nianang mga butang sa kalibutan, ug sa mga pagpanabut nga iya sa niining modernong panahon, ang nag-usab kanato karon ngadto sa pagka-anak nga mga lalaki ug pagka-anak nga mga babaye sa Dios. Ug bisan ang kamatayon mismo dili gayud makapapabilin kanato diha sa lubnganan. “Mangausab kita, sa kalit, sa usa lang ka pagpamilok.”

“Oh, unsa ma’y buot mong ipasabot?”

³²³ Ang buot kong ipasabot nga Kamatuoran kana! Si Jesus, kanang Pulong nga nagtindog kaniadto dinhi sa yuta, nga mao ang Pulong, ang Maong nabanhaw, ug nagbanhaw usab kang Lazarus. Miingon Siya, “Ako ang Pagkabanhaw ug ang Kinabuhi; ang nagatoo Kanako, bisan siya mamatay, mabuhi siya. Ug ang tanan nga buhi ug nagatoo Kanako dili na gayud mamatay.” Wala gyu’y paagi nga mapugngan ang buhi nga Pulong sa Dios! Siguradong mabanhaw gyud.

³²⁴ Ug gikan sa niining kagubot sa niining modernong siyentipikong Eden nga atong gikapuy-an, gikan sa kamatutoan ug—ug siyensya ug edukasyon, tanan na niining modernong mga butang, mangabanhaw kita! “Kining kupo sa unod atong

pagahukason, ug mangbangon ug magadawat sa ganting walay katapusan,” sa umalabot nga adlaw. Magakayab kita ngadto sa kawanangan, ug ang tanan niini mangatapos na. Kay ang Pulong sa Dios nga maoy nagpagawas kanato gikan sa modernong mga pangisip sa atong hunahuna, ang nag-usab sa atong hunahuna ngadto sa pagkabag-o sa atong mga kasingkasing paingon sa Dios, ug apil ang atong mga espiritu; ang mao rang Espiritu nga nagsulti niana, maoy nag-usab kanato hangtud sa niining kahimtang nato, ug Kini sa gihapon ang maoy modala kanato ngadto sa Iyang Presensya, ngadto sa Iyang Kahimayaan, diha sa usa ka gihimayang lawas.

³²⁵ “Sila magatukod og mga balay, sila’y magapuyo niini. Sila magatanum og mga kaparrasan.” Bisan na sa tanan natong mga siyentipikong pagtuki; manggitanum kita, pag-abot sa atong mga anak sila ang manghimulos sa bunga niini, ug pag-abot usab sa iyang mga anak sila na pud ang magapanag-iya niini. Ug mananum sila, ug ang uban ang mangaon; ug mangtukod sila, ug ang uban ang magpuyo. “Apan motaas ang mga adlaw sa Akong mga alagad, maanaa sila didto ug uban ang ilang mga kaliwat. Manggitukod sila, ug dili nga uban ang magapuyo. Mananum sila, ug dili nga uban ang mangaon niini.” Kay unsa man? Atong mismong Dios, ang mismong propeta nga nagsulti sa Pulong sa Dios nga “usa ka ulay ang magapanamkon,” ang nagsaad niini kanato!

³²⁶ Unsaon man nato pag-angkon niini? Sa potensiyal anaa na kita dinha karon, kita n’yo, tungod mao man ang giingon sa Dios. Kinahanglan matuman gyud kini. Sa diha nga gibanhaw Niya si Lazarus kaniadto, miingon, “Dili kamo matingala niini, kay moabot ang takna nga ang tanan nga anaa sa mga lubnganan managpakabati sa Tingog sa Anak sa tawo, ug mangbangon sila; ang uban mangbangon ngadto sa kaulawan, ug ang uban ngadto sa Kinabuhi.”

³²⁷ Unsa kini? Pagkausab, pagkausab tungod sa Pulong sa Dios, nga ginahimo kitang mga anak nga lalaki ug mga anak nga babaye sa Dios, ug nga hatagan usab kita og Kinabuhi diha sa umalabot. Oh, grabe! Unsa pa man ang masulti ko? Ayaw na’g paminaw sa ubang mga butang.

Covet not this world’s vain riches,
That so rapidly decay,
Build your hopes on things Eternal,
They will never pass away.

Hold to God’s unchanging hand! (Kantahon
nato kini!)
Hold to God’s unchanging hand! (*Ania* na!)
Build your hopes on things Eternal,
Hold to God’s unchanging hand!

When our journey is completed,
 If to God we have been true,
 Bright and fair our home in Glory,
 Our enraptured soul shall view.

Hold to God's unchanging hand! (Magpausab!)
 Hold to God's unchanging hand!
 Build your hopes on things Eternal,
 Hold to God's unchanging hand!

328 Ayaw tagda ang siyensya, bisan unsa pa ang mapamatud-an niini, kung supak kini sa Pulong. Kita n'yo? Ayaw tagda ang iglesia, bisan unsa pa ang ginasulti niini, kung supak kini sa Pulong.

Kay kita nagapanggunit sa walay-pagkabalhin nga kamot ngadto sa Dios!

329 Nagakausab ang mga panahon, nagakausab ang siyensya. Panggunit gayud nianang Kamot nga walay pagkabalhin!


Itukod ang inyong mga paglaum sa mga butang nga Eternal,
 Panggunit gayud sa walay-pagkabalhin nga kamot ngadto sa Dios.

330 Amahang Dios, diha sa Presensya Mo, samtang nagkatigum kami dinhi niining buntaga, nga nagdawat og taas-taas, madugay, napataas nga Mensahe, ug, Oh Ginoo, nagaampo ako nga Imong itanum kini nga mga Binhi dinha sa mga kasingkasing niining mga tawo. Hinumdumi, Ginoo, nagaampo kami, nga mahuyang kami, ug ang among kinatibuk-an mahuyang, ug kami. . . usahay dili kami mahibalo kung asa na kami molingi. Minahal nga Dios, lingion Mo kami ug pangunahi kami pinaagi sa Imong gamhanang Espiritu, Ginoo. Tabangi kami. Ayaw gyud kami biyai, Amahan. Nagsaad Ka nga dili Mo kami biyaan. "Dili Ko gayud kamo pagabiyaan o isalikway man. Pagaubanan Ko kamo."

331 Ug, Amahang Dios, nagaampo kami nga Imong giyahan ang among Igoong Leo, ug Gene. Himoa sila, Ginoo, ingon nga mga matang sa lider nga gusto Nimo nga mangulo niining mga tawo dinhi; nga dili gamiton ang kaugalingon nilang mga panghunahuna, kondili nga tugotan ang gamhanang Balaang Espiritu nga maoy motultol kanila kung unsay buhaton.

332 Panalangini kini nga mga kalalaken-an ug mga kababayen-an, kining mga bata, sama usab, Ginoo, kanako. Ug ako—ako—nagaampo ako nga padayon Mong lugwayan pa ang ilang kinabuhi. Tugoti, kung mahimo, Ginoo, tugoti kami nga mamahimong buhi aron nga makita ang Iyang Pag-abot. Nagatoo kaming mahimo namo, tungod nga makita namo ang tanan-tanan nga hapit na gyud kaayo. Hapit na gyud kaayo! Itugot kini, Amahan. Amo silang ginatugyan Kanimo, uban sa

among mga kaugalingon, karon, sa pagpangalagad Kanimong, sa Ngalan ni Jesus. Amen.

Pasayloa ko ninyo nga napadugay ko kamo. Igsoong Leo. 

GAHUM SA PAGBAG-O CEB65-1031M
(Power Of Transformation)

Kining Mensahe ni Igsoong William Marrion Branham, unang giwali sa Ingles niadtong Dominggo sa buntag, Oktobre 31, 1965, didto sa Pine Lawn Trailer Park sa Prescott, Arizona, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2018 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org